

## ରମିୟ ମଣ୍ଡଳୀ ନିମନ୍ତେ ପାଖଲକ ଲିଖିତ ପତ୍ର ରମିୟ କୁଲମିକି ପାଖୁଲ ରାଚାମାନି ଆକୁ ମୂଲୁ ହାଡ଼ା

ଜୀସୁ କ୍ରୀସ୍ତ ଜାର୍ନାଆଡ଼ି ଡାୟୁ ରମିୟ ପତି ୫୪ ଟିଏ ୫୮ ବାର୍ଯା ବିତ୍ରା ପାଣ୍ଡୁଆଡ଼ି ପାଖୁଲ ରାଚାମାଚେସି ଇଞ୍ଜିଁ ଇନେରି । ପାଖୁଲ ରମିୟା ହାନି ନକେଏ ଜୀହୁଦି ଅଡ଼େ ଜୀହୁଦିଆଆତି କ୍ରୀସ୍ତାନା ଲକୁଣି ଜାପୁହାଲି ଇ ଆକୁ ରାଚାମାଚେସି । ବାରେ କୁଡ଼ାତି ଲକୁ ଏନିକିଁ ଜୀସୁ କ୍ରୀସ୍ତଇଁ ନାମିନେରି ଇଞ୍ଜା ମାନି କିନେରି ୧୭:୨୭ ଏଡ଼ାଆଁତାକି ପାଖୁଲ କରଡ଼ି ଗାଡ଼ାତା ମାଚାଟି ରମିୟା ମାନି କ୍ରୀସ୍ତାନା ଲକୁଣି ଜାପୁହାଲି ଇ ଆକୁ ରାଚାମାଚେସି ।

ବାରେ ଟାୟୁଡି ବାରେ ବେଲାତି କ୍ରୀସ୍ତାନା ଲକୁତାକି ରମିୟ ର ଲଡ଼ାମାନି ପତି, ଏନାଆଁତାକି ଇଚିହଁ ମାର ଏନିକିଁ ଜୀସୁ କ୍ରୀସ୍ତ ତାଣାଟି ଗେଲ୍ପି ଆହାଲି ଆଡ଼ିନାୟି, ପାଖୁଲ ଅଜିକିହଁ ରଚାଣି ପିହୁଆନାହାଁ ତେଲ୍ପି କିହାମାନେସି । ପାଖୁଲ ପୁଃଇ ମେରାତି ଜୀସୁ କ୍ରୀସ୍ତତି ନେହଁ ବଲୁ ତଲେ ଆଟ୍‌ହାମାନେସି । ଇ ପତିତି ୧-୧୭ ପତ୍ରୁଡି ହାଡ଼େକା ବୁଦିଗାଟାରି ନେହଁକିଁ ଅଣ୍ପାନା ଝେସାମାନେରି, ଇ ବଲୁ ମାଦିତାୟି । ଇମ୍ପାଆଁ ଝେସ୍ପି ଆହାମାନେ, “ନାନୁ ନେହଁ ବଲୁ ଝେକ୍‌ହାଲି ଲାଜା ଆଅଁ ଏନାଆଁତାକି ଇଚିହଁ ଆମିନି ଗାଟାରି ନାମିନେରି ବାରେଜାଣା ତାକି ଇଦି ମାହାପୁରୁଡି ବାଡ଼ୁୟୁ । ନକେଏ ଜୀହୁଦି ଲକୁକି ଡାୟୁ ଜୀହୁଦିଆଆତି ଲକୁତାକି ଜିକେଏ ।”

ମୂଲୁ ବାଗା ୧-୧୨ ହାଡ଼େକା ମାହାପୁରୁଡି କାତା ଅଡ଼େ ଅର ବାଗା ୧୩-୧୫ କ୍ରୀସ୍ତାନା ଜୀହୁତା ଲଡ଼ାମାନି କାତା ଜାପିନାୟି ମାନେ ।

### ପତିତା ମାନାୟି

୧. ପାଖୁଲ ତାନି କାତା ପୁଣ୍ଡି କିହାନା, ଆମ୍ପାଆରାକି ଆକୁ ରାଚିମାଚେସି ଏଡ଼ାଆଁ ଝେସାନା ଆକୁ ରାଚିନାୟି । ୧:୧-୧୫

- ୨. ମାଣସି କୃତାତି ରାଜି ଅଡ଼େ ଜୀସୁ କ୍ରୀସ୍ତ ତାଣାଟି ଗେଲ୍‌ପି ଆନାୟି । ୧:୧୬-୧୧:୩୬
- ୩. କ୍ରୀସ୍ତାନା ଲକୁ ଏନିକିହିଁ ନୀତିନାୟି ଏ କାତା ହାଟ୍‌ରକା ଜାପୁହାମାନେସି । ୧୨:୧-୧୫:୧୩
- ୪. ରମ୍‌ତା ମାନି କୁଲମିକାଣି ଜହରା କିହାନା ରାପୁନାୟି । ୧୬

**ପାଞ୍ଚୁଲତି ଜହରା ୱେହ୍‌ନି କାତା**

<sup>୧</sup> କ୍ରୀସ୍ତ ଜୀସୁତି ହଟ୍‌ଲେଏସି ଅଡ଼େ ମାହାପୁରୁ ହୀହାମାନି ନେହ୍ଁ ବଲୁ ୱେକ୍‌ହାଲି ପାଣ୍ଡୁଝି ଆହ୍ଁ ଆଚାନା ହାଟ୍‌କି ଆହାମାନି ସୀସୁ ପାଞ୍ଚୁଲତି ଆକୁ ।

<sup>୨</sup> ଦାମ୍‌ ସାପ୍‌ସ୍ତେରିତା ରାସ୍‌କି ଆହାମାନି ଲେହେଁ ଇ ନେହ୍ଁ କାରୁତି କାତା ତଲି କାଲ୍‌ଗିଏ ମାହାପୁରୁ ଅଣ୍‌ପୁତି ବଲୁ ୱେହ୍‌ନାରି ତାଣାଟି ଆଞ୍ଜାମାଚେସି । <sup>୩</sup> ଇଦି ମାହାପୁରୁ ମୀରଏଣାଟି କାତା, ମା ପୁରୁ ଜୀସୁ କ୍ରୀସ୍ତ ମାଣସି ଆହ୍ଁ ଏଞ୍ଜସି ଦାଞ୍ଜୁଦ କୃତାତା ଜାର୍‌ନା ଆଚେସି । <sup>୪</sup> ସାମା ତାନି ଲାକପୁରୁତି ସୁଦୁଜୀଞ୍ଜୁ ତାକି, କାଜା ହାକିଟି ନିଜାନା ଏଞ୍ଜସି ବାଡ଼ୁୟୁ ତଲେ ଜୀସୁ ମାହାପୁରୁତି ମୀରଏସି ମସିହା\* ଇଞ୍ଜି ୱେଜ୍‌ଚେସି, <sup>୫</sup> କ୍ରୀସ୍ତ ତାକି, ମାହାପୁରୁ ନାଜେ ପାଣ୍ଡୁଝିଆହାମାନି ସୀସୁ ଲେହେଁ ହାଟ୍‌ନା, ବାରେ କୃତାତି ଲକୁତାଣା ନେହ୍ଁ ବଲୁ ୱେକ୍‌ହାଲି ପାରୁ ହୀହାମାଞ୍ଜାନେସି, ଏନିକିହିଁ ଏଞ୍ଜାରି କ୍ରୀସ୍ତ ଜୀସୁ ତାଣା ନାମାନା ତାଜେ ମାନଝି ଆହାନା ଡ଼ୟିନେରି । <sup>୬</sup> ରମ୍‌ ଗାଡ଼ାତା ବାସାଆହାମାନି ଲକୁଚେରି, ମୀରୁ ଜିକେଏ ଜୀସୁ କ୍ରୀସ୍ତତି ଲକୁ ଆହାଲି ହାଟ୍‌କି ଆହାମାଞ୍ଜେରି ।

<sup>୭</sup> ରମ୍‌ତି ଆମିନି ଲକୁଣି ମାହାପୁରୁ ଜୀଞ୍ଜୁ ନହାମାନେସି ଇଞ୍ଜା ତାନି ଲକୁ ଆହାଲିତାକି ହାଟ୍‌ମାନେସି, ଏ ବାରେ ଲକୁତାକି ନାନୁ ଇ ଆକୁ ରାଟିମାଜ୍, ମା ଆବା ମାହାପୁରୁ ଅଡ଼େ ପୁରୁ ଜୀସୁ କ୍ରୀସ୍ତ ତାଣାଟି ମିଜେ କାର୍‌ମାମେହ୍‌ନାୟି ଅଡ଼େ ହିଡ଼ି ଆୟାପେ ।

**ଜହରା କିନି ପ୍ରାତାନା**

---

\* ୧:୪ ୧:୪ କ୍ରୀସ୍ତ

୮ ମୂଲ୍ୟ, ମୀ ନାମୁତି ନେହଁ ହାଡ଼ା ବାରେ ଦାର୍ତ୍ତିତା  
 ଝେଙ୍ଗିମାନେ, ଏଦାଆଁତାକି ନାନୁ ମୀ ବାରେଜାଣା ତାକି ଜୀସୁ  
 କ୍ରୀସ୍ତ ତାଣାଟି ନା ମାହାପୁରୁଇଁ ଜହରା କିହିମାଇଁ । ୯ ନା ବାରେ  
 ହିୟାଁ ଜୀସୁତଲେ ନାନୁ ଆମିନି ମାହାପୁରୁତି ସେବା କିହିମାଇଁ ଇଞ୍ଜା  
 ଆମିନି ମାହାପୁରୁତି ମୀରଏଣାଟି ନେହଁ କାରୁ ଝେକହିମାଇଁ, ଏ  
 ମାହାପୁରୁ ନା ସାକି । ୧୦ ପ୍ରାତାନା କିନାଟି ନାନୁ କାଲେଏ ମିଙ୍ଗେ  
 ଅଣ୍ପାଇଁ ଇଞ୍ଜା ମୀ ତାଣା ଖାହାଲି ନାଙ୍ଗେ ପାରୁ ହିୟାନି ମାହାପୁରୁ  
 ତାଣା ବାତିମାଲିମାଇଁ । ୧୧ ଇତିହଁ ନାନୁ ମିଙ୍ଗେ ଆଣ୍ଡାଲି ହାରେକା  
 ମନ କିହିମାଇଁ, ଇଞ୍ଜା ମିଙ୍ଗେ ର ଜୀସୁତି ବର ହିୟାଇଁ, ଏନିକିଁ ମୀରୁ  
 ତାରିଆହାନା ମାଞ୍ଜେରି । ୧୨ ଇଦାଆଁ ତଲେ ମୀର ରଅତଞ୍ଜି ରଅଣା  
 ନାମୁତି ଆର୍ଘା କିହାଲି ଆଡ଼ିନାୟି ।

୧୩ ଏ ତାୟିୟାଁ ଅଡ଼େ ତାଙ୍ଗିସ୍ତାତେରି, ମୀ ତାଣା ଖାହାଲି ତାକି ନାନୁ  
 ହାରେକା ଦେବା ଅଣ୍ପାମାଇଁ, ସାମା ହାରେକା ବାଦା ବେଟାଆଡାକି,  
 ନୀର୍ବ ପାତେକା ଖାହାଲି ଆଡାଆଡେର୍ବ । ଏଟକା କୁଡାତି ଲକୁଡାଣା  
 ଜିକେଏ ବଲୁ ଝେକହାନା ଏନିକିହଁ ପାଡ଼େୟି ବେଟାଆହାମାଇଁ, ମୀ  
 ତାଣା ଜିକେଏ ଏଲେକିହାଲି ନା ଅଣ୍ପୁ । \* ୧୪ ଏଦାଆଁତାକି ଇତିହଁ  
 ବୁଦିଗାଟାରି† ଅଡ଼େ ପାଙ୍ଗାତାରି‡ ଜାପିତାରି ଅଡ଼େ ଜାପାଆତି ଲକୁ  
 ବାରେ ଗତିତି ଲକୁତାକି ନା ଦାୟିପତି ମାନେ । ୧୫ ଏଦାଆଁତାକି ରମ୍  
 ଗାଡ଼ା ତାତେରି ମୀରୁ, ମୀ ତାଣା ଜିକେଏ ନେହଁ ବଲୁ ଝେକହାଲି  
 ନା ଅଣ୍ପୁ ।

**ନେହଁ କାରୁତି ବାଡ଼ୁୟୁ**

୧୬ ଇତିହଁ ନାନୁ ନେହଁ କାରୁ ଝେକହାଲି ଲାଜା ଆଆଁ, ଏଦି  
 ନାମିମାନି ବାରେ ଲକୁତାକି ଗେଲ୍ପି ଆହାଲିତାକି ମାହାପୁରୁତି  
 ବାଡ଼ୁୟୁ, ମୂଲ୍ୟ ଜୀହୁଦି ଅଡ଼େ ତାୟୁ ଜୀହୁଦିଆଆତି ନାମିତି ଲକୁତାକି  
 ।\* ୧୭ ମାଣସି ଏନିକିହଁ ମାହାପୁରୁ ନକିତା ଦାମ୍ବୁଗାଟାସି ଇଞ୍ଜା  
 ତଞ୍ଜାଆନେସି, ଏ ଉପେୟି ଏମ୍ବାଆଁ ତସ୍ପି ଆହାମାନେ । ମୂଲୁଟିଏ  
 ରାନି ପାତେକା ଗେଲ୍ପିଆନାଣି ବେଟାଆନି ଉପେୟି ନାମୁ ।

\* ୧:୧୩ ୧:୧୩ କାମା ୧୯:୨୧ † ୧:୧୪ ୧:୧୪ ଗ୍ରିକ ‡ ୧:୧୪ ୧:୧୪ ବୁଦି ହିଲଆ  
 ଗାଟାରି, \* ୧:୧୭ ୧:୧୭ ମାର୍କ ୮:୩୮

ଦୀର୍ଘ ସାସ୍ତ୍ରୋତ୍ତରା ରାସ୍ତା ଆହାମାନେ, “ଦୀର୍ଘଗାଟାସି ନାମୁତଲେ ନୀଡନେସି ।”<sup>୯୮</sup>\*

**ପାପୁ ତାକି ମାହାପୁରୁତି କାର୍ବି**

<sup>୧୮</sup> ଆମିନି ଲକୁ ବାରେ ଲାଗେଏ କାମାଟି ସାତାଈ ଆଜ୍ଞିମାନେରି, ଏଞ୍ଜାରି କପାଟି ଲାକପୁରୁଟି ମାହାପୁରୁତି କାର୍ବି ତଞ୍ଜା ଆହାମାନେ । <sup>୧୯</sup> ଏଦାଆଁତାକି ଇତିହିଁ ମାହାପୁରୁତି କାତା ଏଦାଆଁ ପୁନାୟି ମାତେ, ଏଦାଆଁ ଏଞ୍ଜାରି ପୁଞ୍ଜାମାନେରି, ମାହାପୁରୁ ଏଞ୍ଜାରି ନକିତା ଏଦାଆଁ ଝେସାମାନେସି । <sup>୨୦</sup> ମାହାପୁରୁ ଦାରତି ଗାଡ଼ିକିତି ତାଣାଟିଏ, ତାନି ତଞ୍ଜା ଆଆଗାଟି ଗୁଣ୍ଡାୟି, ତାନି ରାଆଗାଟି ବାଡ଼ୁରୁ ଅଡ଼େ ଲାକପୁରୁତି ଗୁଣ୍ଡା ନେହିଁ କିଁ ତଞ୍ଜା ଆହିମାନୁ; ତାନି ଗାଡ଼ିକିତାଆଁ ବାରେ ଏଞ୍ଜାଆଁ ମେସାଲି ଆଡ଼ିନାୟି । ଏଦାଆଁତାକି ଏଞ୍ଜାରି ପୁଞ୍ଜାହିଲଅମି ଇଞ୍ଜିଁ ଇଞ୍ଜାଲି ଆଡ଼ଅରି । <sup>୨୧</sup>\* ଏଞ୍ଜାରି ମାହାପୁରୁଈଁ ପୁଞ୍ଜା ଜିକେଏ ଏଞ୍ଜାଣାଈଁ ଗାଞ୍ଜୁରମି କିଆତେରି କି ଏଞ୍ଜାଣାଈଁ ଜହରା କିଆତେରି । ସାମା ଏଞ୍ଜାରି ଅଣ୍ପୁ ବାରେ ଉଜେଏତି ଅଣ୍ପୁ ଅଡ଼େ ଏଞ୍ଜାରି ତେଲହାଆଗାଟି ମନ ଆନ୍ଦେରି ଆହାମାନେ । \* <sup>୨୨</sup> ଏଞ୍ଜାରି ଜାହାରାଈଁ ବୁଦିଗାଟାତମି ଇଞ୍ଜିଁ ଇନେରି, ସାମା ସାତା ତଲେ ଏଞ୍ଜାରି ବୁଦି ହିଲାଆ ଗାଟାରି; <sup>୨୩</sup> ଅଡ଼େ ନାସା ଆଆଗାଟି ମାହାପୁରୁତି ଗାଞ୍ଜୁରମିତି ନାସା ଆନି ମାଣସି, ସାରିଗଟା କତାୟି ଗାଟି ଜନ୍ତୁ, ପଟାୟି ଅଡ଼େ ରାସ୍ତା କୁଡ଼ାତି ବମାୟି କିହାନା ଏଞ୍ଜାଆଁତି ପୂଜା କିହିମାନେରି ।\*

<sup>୨୪</sup> ଏଦାଆଁତାକି ମାହାପୁରୁ ଏଞ୍ଜାରାଈଁ ହିୟାତି ଲାଗେଏତି ଜୁପକାତାକି ଏଞ୍ଜାରାଈଁ ଲାଗେଏତି ତାଣା ହେରପିତେସି, ଏନିକିହିଁ ଏଞ୍ଜାରି ଆଜ୍ଞା ରଅସି ରଅଣି ତଲେ ଲାଜାଗାଟି କାମା କିହିମାନେରି । <sup>୨୫</sup> ଏଞ୍ଜାରି ମାହାପୁରୁ କାତାତି ସାତା ପିସାନା ମିତିତି ବାସୁଁ କିହିମାନେରି । ଗାଡ଼ିକିତି ମାହାପୁରୁଈଁ ପୂଜା କିଆନା, ଗାଡ଼ିଆଡ଼ି ଦିଶସୁ ପୂଜା କିହିମାନେରି; ଏ ଗାଡ଼ି କିତାଣାଈଁ କାଲାକାଲାତାକି ଜହରା । ଆମେନ୍ ।

<sup>୨୬</sup> ଏଞ୍ଜାରି ଏଲେକିତାକି ମାହାପୁରୁ ଏଞ୍ଜାରାଈଁ ଲାଜାଗାଟି ପାପୁ କାମାତା ହେରପିତେସି, ଇତିହିଁ ଏଞ୍ଜାରି ଡକ୍ରିସିକା ଡକ୍ରିୟା ତଲେ

\* **୧:୧୭** ୧:୧୭ ଏଡ଼ି ୨:୪   \* **୧:୨୧** ୧:୨୧ ଏପିସି ୪:୧୭,୧୮   \* **୧:୨୧** ୧:୨୧ ଏପିସି ୪:୧୭,୧୮   \* **୧:୨୩** ୧:୨୩ ଝେ ମେରା ୪:୧୭-୧୮

କୃତାଳି ପିସାନା ଏଢ଼ି ତାମ୍ବୁ ତାମ୍ବୁ କିଆଗାଟି ଲାଜା କାମାୟା କିତୁ ୨୭ ଏଲେକିହି ଏ ଆବାୟା ଜିକେଏ ଜାହାରା ତକ୍ତି ତଲେ କୃତାଆନା ଜାହା ଜାହାରା ବିତ୍ରା ଲାଗେଏତି କାମା କିତେରି । ଆବା ଆବାୟା ତଲେ ଲାଜା ଆନି କାମା କିତେରି, ଏଦାଆଁତାକି ଏଞ୍ଜାରି ଲାଗେଏ କାମାତି ତଣ୍ଡ ବେଟା ଆହିମାନେରି ।

୨୮ ଅଡ଼େ ଏନିକ୍ ଏଞ୍ଜାରି ମାହାପୁରୁତି ବୁଦିତି କୃହାଲିଏ, ଏଲେକିହି ଏ ମାହାପୁରୁ କିଆଗାଟି କାମା କିହାଲି ଏଞ୍ଜାରାଇଁ ଲାଗେଏତି ଅଣ୍ଡପୁତା ହେରପିତେସି । ୨୯ ଏଞ୍ଜାରି ଦାମ୍ବୁ ହିଲାଆଗାଟାୟି, ଲାଗେଏ ପଲେଏ, ଜୁପକା ଅଡ଼େ ଇରସା, ଲକୁଇ ପାୟିନାୟି, ଗଡ଼ହା କିନାୟି, ନାଡ଼ିକିନାୟି ଅଡ଼େ ଲାଗେଏତି କାମା ନେଞ୍ଜାମାନେ; ୩୦ ଏଞ୍ଜାରି ଉଡୁପାତି, ନିଦା କିନାରି, ମାହାପୁରୁଇଁ ଅପାଆଗାଟାୟି, ଲାଗେଏତି କାମା କିନାୟି, ଏଞ୍ଜାରି ଲାଗେଏ କାମା କିହାଲି ପାରୁ ପାରିନେରି; ଏଞ୍ଜାରି ତାଲି ତାଞ୍ଜିଇଁ ମାନି କିଆଗାଟାରି, ୩୧ ଏଞ୍ଜାରି ବୁଦି ହିଲାଆ ଗାଟାରି, ଜାହାରା ହାତିକାତା ଆହୁଅରି । ଇଞ୍ଜା ଏଟକାତାରାକି ଇଚାଣି କାର୍ମା ହିଲେଏ । ୩୨ ଏଞ୍ଜାରି ପୁଞ୍ଜାମାନେରି, ମାହାପୁରୁତି ମେରା ଲେହେଁ ଇଲେତି ଲକୁ ହାନି ତଣ୍ଡ ପାଣିନାୟି ମାନେ, ଇଦାଆଁ ପୁଞ୍ଜାହାଁ ଜିକେଏ ଏଞ୍ଜାରି ଏଲେକିହି ଏ ଲାଗେଏତି କାମା କିହେମାନେରି, ଅଡ଼େ ଏଲେତି କାମା କିହିମାନି ଲକୁତଲେ ରାହାଁତଲେ ଆଣ୍ଡିନେରି ।

## ୨

### ମାହାପୁରୁତି ନାହାଁୟି

୧ \*ଏ ତାୟି ଅଡ଼େ ତାଞ୍ଜି, ମୀମ୍ବୁ ଏନାଆଁ ଏଟକା ଲକୁଣି ନାହାଁୟି କିହିମାଞ୍ଜେରି ? ମୀରୁ ଆମ୍ବାଆତେରି ଆଡ଼ିଜିକେଏ, ଇଲେ କିନାୟି ମିଙ୍ଗେ ତାକି ନେହେ ଆଏ, ଏଟକା ଲକୁଣି ଦହ ଦସାନା ମୀମ୍ବୁ ଏଲେତି କାମା କିହାନା ଏମ୍ବାଟି ମୀରୁଏ ଦହ କିହିମାଞ୍ଜେରି । \* ୨ ଆମିନି ଗାଟାରି ଇଲେତି କାମା କିନେରି, ମାହାପୁରୁ ଏଲେତି ଲକୁଣି ସାତା ତଲେ ନାହାଁୟି କିନେସି, ଇଦାଆଁ ମାମ୍ବୁ ପୁଞ୍ଜାମାନମି । ୩ ଏ

☆ ୨:୧ ୨:୧ ମାତି ୭:୧; ଲୁକ ୭:୩୭

☆ ୨:୧ ୨:୧ ମାତି ୭:୧; ଲୁକ ୭:୩୭

ତାହି ଅଡ଼େ ତାଜି, ଆମିନି ଗାଟାରି ଲାଗେଏତି କାମା କିନେରି, ଏଝାରାଇଁ ନାହାଁୟି କିହାନା, ମୀମ୍ବୁ ଏଲେତି କାମା କିହିମାଞ୍ଜେରି, ମୀରୁ ମାହାପୁରୁତି ନାହାଁୟିତି ଜୀଣା ଆନାୟି ଇଞ୍ଜି ଅଣ୍ପିମାଞ୍ଜେରି କି ? ୪ ଆଆତ, ମାହାପୁରୁତି ହାରେକା କାର୍ମାମେହନାୟି ମୀ ହିୟାଁ ବାଦଲି କିନି ୱାକି ଅହାଲି ଅଣ୍ପିନେ, ଇଦାଆଁ ପୁନାଆନା ମୀରୁ କି ତାନି କାର୍ମାମେହନାଣି, ସାସା, ଅରହାନା ଡ଼ୟିନି ଲେହେତି ଦନଇଁ ଅପିହିଲଅତେରି କି ? ୫ ସାମା ମୀରୁ ମୀ ଆଟ୍ଝା ଅଡ଼େ ବାଦଲିଝି ଆଆଗାଟି ହିୟାଁ ଲେହେ, ଆମିନି ଦିନା ମାହାପୁରୁତି ନାହାଁୟି ତଞ୍ଜାଆନେ, ଏ କାର୍ବିତି ଦିନାତାକି ଜାହାରାତାକି କାର୍ବି କୃତି କିହିମାଞ୍ଜେରି; ୬ ଏଝାସି ବାରେ ଲକୁତାକି ତାମି କିହାମାନି କାମାତି ପାଡ଼େୟି ହୀନେସି; ୭ ଆମିନି ଗାଟାରି ସାସାତଲେ ନେହଁ କାମା କିହାନା ଗାଝୁରମି, ମାନି ଇଞ୍ଜା ହାଆଗାଟାଣି ପାରିନେରି, ଏଝାରାକି କାଲାକାଲାତି ଜୀଝୁ ହୀନେସି, ି ଆମ୍ବାଆରି ୱାରଇ ତାମ୍ଜେ ଅଣ୍ପିନେରି, ଇଞ୍ଜା ସାତାତି ମାନଝି ଆଅରି, ସାମା ଲାଗେଏତାଣି ମାନଝି ଆନେରି; ଏଝାରାକି କାର୍ବି ଅଡ଼େ କପା ୱାନେ, ି ଆମ୍ବାଆରି ଲାଗେଏତି କାମା କିହିମାନେରି ଏଝାରାକି କାକୁଲି ଅଡ଼େ କସ୍ତୁତି ଦିନା ୱାହିମାନେ, ମୁଲୁଏ ଜୀହୁଦି ଲକୁତାକି ଇଞ୍ଜା ତାୟୁ ଜୀହୁଦିଆଆତି ଲକୁତାକି ଆନେ । ୧୦ ସାମା ମୁଲୁଏ ଜୀହୁଦି ଲକୁକି ଅଡ଼େ ଜିକେଏ ଜୀହୁଦିଆଆତି ଲକୁତାକି, ନେହଁ କାମା କିହାମାନି ବାରେଜାଣା ତାକି ଗାଝୁରମି, ମାନି ଇଞ୍ଜା ହିଡ଼ି ହିୟାନେସି । ୧୧ ଇତିହଁ ମାହାପୁରୁ ତାଣା ପାରଡ଼ା ବାଟି କିନାୟି ହିଲେଏ ।\*

୧୨ ଜୀହୁଦିଆଆତି ଲକୁକି ମସାତି ନେରା ହିଲାଆନା ପାପୁ କିହାମାନେରି; ଏଝାରି ଜିକେଏ ମସାତି ନେରା ହିଲାଆନା ନାସା ଆନେରି, ଅଡ଼େ ଏତେକା ଜୀହୁଦି ଲକୁକି ମସାତି ନେରା ପୁଞ୍ଜାମାନାକି; ଏଝାରି ପାପୁ କିହାମାନେରି ଅଡ଼େ ଏ ନେରା ତଲେ ନାହାଁୟି କିଝିଆନେରି । ୧୩ ଇତିହଁ ନେରାତି ୱେଞ୍ଜାନା ଲକୁ ମାହାପୁରୁ ନକିତା ଦାର୍ମୁଗାଟାରି ଆଅରି, ସାମା ନେରାତି ମାନଝି ଆଡ଼ିସାରେ ଦାର୍ମୁଗାଟାରି ଆନେରି । ୧୪ ଜୀହୁଦିଆଆତି ଲକୁକି ନେରା

☆ ୨:୬ ୨:୬ ପାରୁ ୨୨:୧୨ ☆ ୨:୧୧ ୨:୧୧ ୱେ ନେରା ୧୦:୧୨

ହିଲୀଆତିହ କିକେଏ ଏତିବେଲା ଏଝାରି ଦେରାତା ମାନି ଲେହେଁ କାମା କିନେରି, ଏତିବେଲା ଏଝାରି ଦେରା ବେଟା ଆଆତିହ କିକେଏ ତାମ୍ଲେ ଦେରା ଲେହେଁ ଆନେ; ୧୫ ଏଝାରି କିହିମାନି କାମାଟି ଇଦି ନେହଁ ତଲେ ତଞ୍ଜା ଆହିମାନେ, ଦେରାତି ମାନି ଏଝାରି ହିୟାତା ରାସ୍‌କି ଆହାମାନେ । ଇ କାତାତି ସାତା ଏଝାରି ଅଶ୍‌ପୁତା କିକେଏ ପାରମାଣା ସାତା ତଲେ ଅଶ୍‌ପିନାଟି ଅଶ୍‌ପିନି ଅଶ୍‌ପୁ ଏଝାରି କାତାତା ରାଜି ଆହିମାନେ, ସାତା ଅଶ୍‌ପୁ ଅଶ୍‌ପିନାଟି ଅଶ୍‌ପୁ ଏଝାରାଇଁ ନେହଁରି କିନେ, ଲାଗେଏତି ଅଶ୍‌ପୁ ଅଶ୍‌ପିନାଟି ଦହ କିହିମାନେ । ୧୬ ଏମିନି ଦିନା ମାହାପୁରୁ କ୍ରୀସ୍ତ ଜୀସୁ ତାଣାଟି ମାଣ୍‌ସିତି ଡଗ୍‌ମାନି କାତା ବାରେ ନୀହଁୟି କିନେସି, ଏ ଦିନା ନାନୁ ଝେକ୍‌ହିମାନି ନେହଁ କାରୁ ଲେହେଁ ଇ ବାରେ ଆନେ ।

### ଜୀହୁଦି ଲକୁ ଅଡେ ଦେରା

୧୭ ମୀରୁ ଜାହାରାଇଁ ଜୀହୁଦିତମି ଇଞ୍ଜାକତିମାଞ୍ଜେରି; ଦେରାତି ବାର୍ସୁ ଇଟାମାଞ୍ଜେରି ଅଡେ ମାହାପୁରୁ ତାଣା ବଡପଣ କିହିମାଞ୍ଜେରି; ୧୮ ଅଡେ ମସାତି ଦେରାଟି ଜାପାନା ଏଝାଣି ଅଶ୍‌ପୁ ପୁଞ୍ଜିମାଞ୍ଜେରି, ଇଞ୍ଜା ନେହଁଣି ଲାଗେଏତାଣି ବାଟି କିହିମାଞ୍ଜେରି, ୧୯ ସାତେଏ ମୀରୁ ନେହଁ କିହିଁ ପୁଞ୍ଜାମାଞ୍ଜେରି, ମୀରୁ କାଣାୟାଣି ଜିରୁ ତହ୍‌ନାତେରି, ଆନ୍ଦେରିତା ମାନି ଲକୁତାକି ଉଜେଡି ଲେହେଁ, ୨୦ ବୁଦି ହିଲୀଆ ଲକୁଣି ଝେହ୍‌ନାତେରି, ପୁନାଆତି ଲକୁଣି ଜାପ୍‌ନାତେରି । ମୀ ନାମ୍, ଦେରାଟି ମୀରୁ ସାତା ଅଡେ ବୁଦି ଦେଡା ଆହାମାଞ୍ଜେରି । ୨୧ ମୀରୁ ଏଟକାତି ଲକୁଣି ଜାପ୍‌ହି ମାଞ୍ଜେରି, ସାମା ଜାହାରାଇଁ ଏନାଆଁତାକି ଜାପ୍‌ହି ହିଲଅତେରି ? ସରୁ କିଆଦୁ ଇଞ୍ଜିଁ ଜାପ୍‌ହାନା ମୀରୁଏ ଏନାଆଁତାକି ସରୁ କିହିମାଞ୍ଜେରି ? ୨୨ ଦାରି କିଆଦୁ ଇଞ୍ଜିଁ ଇଞ୍ଜାନା ମୀରୁଏ ଦାରି କିହିମାଞ୍ଜେରି ? ମୀରୁ ପେଶ୍‌କା ବମାୟା ପୁଜା ଅପାଆନା ଦେଝୁଡିକାତି ଦିଶ୍‌ସୁ ମାଣ୍‌ଟି ହିଲଅତେରି କି ? ୨୩ ମୀରୁ ମାହାପୁରୁତି ଦେରା ବେଟା ଆହାମାନମି ଇଞ୍ଜିଁ ବଡପଣ ଆହିମାଞ୍ଜେରି, ସାମା ଏଦାଆଁ ମାନି କିଆନା ମାହାପୁରୁଇଁ ଲାଜା ପାଣ୍‌ପି କିହିମାଞ୍ଜେରି କି ? ୨୪ ସାସ୍‌ପୁରିତା ରାସ୍‌କି ଆହାମାନେ, “ମିଲେ ତାକି ଜୀହୁଦିଆଆତି

ଲକ୍ଷ୍ମୀତାଣା ମାହାପୁରୁ ଦରୁ ନିନ୍ଦା ବେଟା ଆହିମାନେ ।”<sup>୬</sup>\*

<sup>୭୫</sup> ମୀରୁ ମେରାତି ମାନି କିହିମାଟିସାରେ, ମୀ ତଲୁ ଦାପିଆନାୟି ଲାବା ମାନେ । ସାମା ମେରାତି ମାନି କିଆସାରେ, ମୀ ତଲୁ ଦାପି ଆଡାୟି ତଲୁ ଦାପିଆଆତି ଲକ୍ଷ୍ମୀତଲେ ସମାନା । <sup>୭୬</sup> ର ଜୀହୁଦିଆଆତି ଲକ୍ଷ୍ମୀ ମେରାତି ହୁକୁମିକା ମାନି କିତିସାରେ ମାହାପୁରୁ ଏଞ୍ଜାଣାଇଁ ତଲୁ ଦାପି ଆଡାସି ଲେହେଁ ଇନଅସି କି ? <sup>୭୭</sup> ଏଦାଆଁତାକି ଆଜ୍ଞା ତଲେ ତଲୁ ଦାପିଆଆତି, ଆମିନି ଜୀହୁଦିଆଆତାରି ମସାତି ମେରା ମାନି କିନେରି, ଆତିହୁଁ ମସା ରାଡିତି ମେରା ଅଡେ ତଲୁ ଦାପି ଆଡିଜିକେଏ ମେରା ମାନି କିହିହିଲଅଡେରି, ଏଞ୍ଜାରି ମିଜେ ବିଚାରା କିୟାନେରି । <sup>୭୮</sup> ଖାରଇ ଆଜ୍ଞା ତଲେ ତଲୁ ଦାପି ଆହାନା ପାଜ୍ଞାତା ଜୀହୁଦି ଇଞ୍ଜିହୁଁ ତସାକଡିମାନି ଲକ୍ଷ୍ମୀ ଜୀହୁଦି ଆଏ । <sup>୭୯</sup> ଆମ୍ବାଆସି ହିୟା ବିତ୍ରା ଜୀହୁଦି, ଏଞ୍ଜାସି ସାତା ତଲେ ଜୀହୁଦି, ଅଙ୍କରି ତଲେ ଆଏ, ଜୀହୁ ଅଡେ ହିୟା ତଲେ ଆମ୍ବାଆସି ତଲୁ ଦାପି ଆଡାସି, ଏଦି ସାତା ତଲୁ ଦାପି ଆନାୟି । ଏଲେତି ଲକ୍ଷ୍ମୀ ମାଣସି ତାଣାଟି ମାନି ବେଟାଆଅସି, ସାମା ମାହାପୁରୁ ତାଣାଟି ମାନି ବେଟା ଆନେସି ।

## ୩

<sup>୧</sup> ଆତିହୁଁ ଜୀହୁଦିଆଆତି ଲକ୍ଷ୍ମୀ କିହାଁ ଜୀହୁଦି ଲକ୍ଷ୍ମୀ ଏନାୟି ଗାତି ଲାବା ମାନେ ? ତଲୁ ଦାଃନାୟି ଏନି ଲଡାମାନେ ? <sup>୨</sup> ହାଡେକାତି, ମୂଲୁଏ ମାହାପୁରୁ ତାନି ନେହୁଁ କାରୁ ଝେକ୍‌ହାଲି ଦାୟିପତି ଜୀହୁଦି ଲକ୍ଷ୍ମୀ ହେରପିଡେସି । <sup>୩</sup> ଆତିହୁଁ ଏନାୟି ? ଜୀହୁଦିଜ୍ଞା ତାଣାଟି ଏତରଜାଣା ନାମାଆସାରେ, ଏଞ୍ଜାରି ମାନି କିଆଗାଟାୟି ଏନାଆଁ ମାହାପୁରୁ ନାମୁତି ଉଜେଏ କିନେ ? <sup>୪</sup> ଏଲେଆହୁଁ ଆଆପେ, ଲକ୍ଷ୍ମୀ ବାରେଜାଣା ମିତିତାରି ଆତିହୁଁ ଜିକେଏ ମାହାପୁରୁ ସାତା । ସାପ୍ତେରିତା ରାସ୍‌କି ଆହାମାନେ;

“ନୀ ବଲୁ ତଲେ ନୀନୁ ଦାମ୍ବୁ ଗାଟାତି ଇଞ୍ଜିଁ ଝେଜିଦି,

ନୀହାୟି ଆନି ବେଲାତା ନୀନୁ ଜୀଣା ଆଦି ।”<sup>୫</sup>\*

<sup>୫</sup> ମା ଲାଗେଏତି କାମା ମାହାପୁରୁତି ନେହୁଁ କାମାତି ପାରମାଣା କିନେ, ଆତିହୁଁ ମାରୁ ଏନାଆଁ ଇନାୟି ? ଆମିନି ମାହାପୁରୁ



ଲାଗେଏତି କାମାତାକି ଡଣ୍ଡ ହାନେସି, ଏଞ୍ଜାସି କି ଦାମ୍ନୁ ହିଲାଆଗାଟାସି ? ନାନୁ ମାଣସିଲେହେଁ ଝେସିମାଲ୍ ।<sup>୬</sup> ଏଲେଆହୁଁ ଆଏ । ମାହାପୁରୁ ଦାମ୍ନୁଗାଟାସି ଆଆତିହୁଁ, ଏଞ୍ଜାସି ଏନିକିହୁଁ ଦାର୍ତତି ନିହାଁୟି କିନେସି ?

<sup>୭</sup> ସାମା ନା ମିତି ତଲେ ମାହାପୁରୁତି ସାତାତାୟି ତାନି ଗାଞ୍ଜୁରମି ତାକି ହାରେକା ଗାତି ଆତେ, ଆତିହୁଁ ନାନୁ ପାପୁ ଗାଟାତେଏଁ ଇଞ୍ଜୁଁ ଏନାଆଁତାକି ନିହାଁୟି କିଞ୍ଜି ଆଲ୍ ? 「ମାର ଏନାଆଁତାକି ଏଲେଇନାଆୟି, “ଞ୍ଜାଦୁ ମାର ଲାଗେଏତି କାମା କିନ, ଆତିହୁଁ ମାଞ୍ଜେତାକି ନେହେଁ ଆନେ ?” ନାନୁ ଇଲେତି କାତା ଝେସିମାନାକି ଦାଞ୍ଜା କିହାନା ଏରେକା ଲକୁ ନାଞ୍ଜେ ନିନ୍ଦା କିହିମାଞ୍ଜାନେରି, ଏଞ୍ଜାରି ଇଦାଆଁତାକି ଆମିନି ଡଣ୍ଡ ପାଣ୍ଡନାୟି ମାନେ, ସାତାତଲେ ବେଟାଆନେରି ।

### ଦାମ୍ନୁଗାଟାସି ଆମ୍ବାଆସି ହିଲଅସି

<sup>୮</sup> ଆତିହୁଁ ଜୀହୁଦି ଲକୁ ଜୀହୁଦିଆଆତି ଲକୁ କିହାଁ ହାରେକା ନେହାଁରି ମାନେରି ? ଏରେଲାଞ୍ଜା ଆଏ, ନାନୁ ନକେଏ ଝେସାମାଞ୍ଜାଲ୍ ଜୀହୁଦି ଅଡେ ଜୀହୁଦିଆଆତି ଲକୁ ପାପୁତି ବାଡ଼ୁୟିତା ମାନେରି,  
<sup>୯</sup> ଦାମ୍ନୁ ସାସ୍ତ୍ରିତା ରାସ୍ତକି ଆହାମାନେ;

“ଦାମ୍ନୁଗାଟାସି ଆମ୍ବାଆସି ହିଲଅସି, ରଅସି ଜିକେଏ ହିଲଅସି,✱

<sup>୧୧</sup> ରଅସି ଜିକେଏ ବୁଦିଗାଟାସି ହିଲଅସି;

କି ମାହାପୁରୁଲ୍ ପାରିନାସି ହିଲଅସି ।

<sup>୧୨</sup> ଏଞ୍ଜାରି ବାରେଜାଣା ମାହାପୁରୁ ତାଣାଟିଏ ହେକ ହାଜାମାନେରି;

ଏଞ୍ଜାରି ବାରେଜାଣା ଲାଗେଏ ଜିରୁତା ହାଜାମାନେରି;

ଆମ୍ବାଆସି ଜିକେଏ ରଅସି ସାତାପାଣାତି କାମାକିନାସି ହିଲଅସି

।

<sup>୧୩</sup> ଏଞ୍ଜାରି ହାଡା ଦେପିଆଡି ମାଡ଼ହା ମୁହନି ଗାୟୁ,

ଏଞ୍ଜାରି ଗୁଡିଟି ମିତି କାତା ହଡ଼ିମାନେ,

ଲୁଡା ଡ଼ଇ ଅରୁ କାଡ଼ାମାନି ରାଚୁତି ବୀସାମାନେ ।✱

✱ ୩:୧୦ ୩:୧୦ ପାରୁ ୧୪:୧-୩; ୫୩:୧-୩ ✱ ୩:୧୩ ୩:୧୩ ପାରୁ ୫:୯; ୧୪୦:୩

- ୧୪ ଏଝାର ଗୁଡ଼ିକ କାତା କାମ୍ବୋଲି ଗାଟାୟି ଇଞ୍ଜା ବାକା ତଲେ ନେଞ୍ଜାମାନେ । ☆
- ୧୫ ଏଝାରି ଇରହାଲି ଅଡ଼େ ପାୟାଲି ଦେବୁଣିଏ ହନେରି । ☆
- ୧୬ ଏଝାରି ଆମ୍ବିୟାଝାକି ହାନେରି, ଏମ୍ବାଆଁ ନାସା ଇଞ୍ଜା ସାସ୍ତି ବେଟାଆନେରି ।
- ୧୭ ଏଝାରି ହିଡ଼ଡ଼ିତି ଜିରୁ ପୁଞ୍ଜାହିଲଅରି,  
 ୧୮ ମାହାପୁରୁଇଁ ଆଜିନାୟି ଏଝାରିତାଣା ହିଲେଏ ।”☆
- ୧୯ ମାର ପୁଞ୍ଜାମାନାୟି, ମେରା ମାନି କିହିମାନେରି, ଏମ୍ବାତି ବାରେ ହୁକୁମିଇଁ ଏଝାରି ମାନି କିନାୟିମାନେ । ମାହାପୁରୁ ଏତିବେଲା ବାରେ ଦାରଡ଼ିତି ବିଚାରା କିନେସି, ମେରାତି ମାନି କିଆଗାଟି ଲକୁ ଜାହାରାଇଁ ଦହ ହିଲାଆ ଗାଟାତମି ଇଞ୍ଜା ଇଞ୍ଜାଲି ଆଡ଼ଅରି । ୨୦ ☆ସାମା ମେରା ତଲେ କିନି କାମା ମାନି କିହାଁ ଆମ୍ବାଆସି ଜିକେଏ ମାହାପୁରୁ ନକିତା ଦାମ୍ବୁଗାଟାସି ଆହାଲି ଆଡ଼ଅସି । ଇତିହୁଁ ମେରାଟି ମାଣସି ଝାରଇ ପାପୁତି ପୁଞ୍ଜାଲି ଆଡ଼ିମାନେସି । ☆

**ନାମୁତଲେ ଦାମ୍ବୁଗାଟି ଲକୁ ଆନାୟି**

୨୧ ମାହାପୁରୁ ମାଣସିଇଁ ତାନିତଲେ ନେହୁଁକିଁ ଆଣ୍ଡାଲି ତାକି ମେରା ପିସ୍‌ପେ ଏନାଆଁ କିହାମାନେସି, ଏଡ଼ି ନାଏଁ ତଞ୍ଜା ଆହିମାନେ । ଏ କାତା ମସାତି ମେରା ଇଞ୍ଜା ମାହାପୁରୁ ଅଣ୍‌ପୁତି ବଲୁ ଝେହନାରି ଜିକେଏ ସାକି ହୀହାମାନେରି । ୨୨ ☆ଝାରଇ ଜୀସୁ କ୍ରୀସ୍ତ ତାଣା ନାମିତାକି ଲକୁ ମାହାପୁରୁ ନକିତା ଦାମ୍ବୁଗାଟାରି ଆନେରି । ମାହାପୁରୁ ଆମ୍ବାଆରାଇଁ ପାରଡ଼ା ବାଟି କିଆନା କ୍ରୀସ୍ତଇଁ ନାମିତି ବାରେ ଜାଣାକି ର ପାରୁ ହୀନେସି । ☆ ୨୩ ବାରେଜାଣା ପାପୁ କିହାମାନେରି ଅଡ଼େ ମାହାପୁରୁତି ଗାଝୁରମିଟି ହେକ ଆହାମାନେରି । ୨୪ ସାମା, ଏଝାରି ଉଜେଏ ମାହାପୁରୁତି କାର୍ମାମେହନି ଦାନା ତଲେ କ୍ରୀସ୍ତ ଜୀସୁ ତାଣା ଆମିନି ଗେଲପି ଆନାୟି ମାନେ, ଏଦାଆଁ ତଲେ ଦାମ୍ବୁଗାଟାରି ଆନେରି । ୨୫ ମାହାପୁରୁ ଜୀସୁଇଁ ଦାନା ହୀତେସି, ଏନିକିଁ ଏଝାଣି

---

☆ ୩:୧୪ ୩:୧୪ ପାରୁ ୧୦:୭ ☆ ୩:୧୫ ୩:୧୫ ଜିସା ୫୯:୭,୮ ☆ ୩:୧୮ ୩:୧୮ ପାରୁ ୩୬:୧ ☆ ୩:୨୦ ୩:୨୦ ଗାଲା ୨:୧୭ ☆ ୩:୨୦ ୩:୨୦ ପାରୁ ୧୪୩:୨; ଗାଲା ୨:୧୭ ☆ ୩:୨୨ ୩:୨୨ ଗାଲା ୨:୧୭ ☆ ୩:୨୨ ୩:୨୨ ଗାଲା ୨:୧୭

ହାକି, ଏଞ୍ଜାଣି ତାଣା ନାମାମାନି ଲକ୍ଷ୍ମୀତାକି ପାପୁ ମେଣ୍ଟଜିନି ଉପେୟି ଆନେ । ମାହାପୁରୁ ଅରହାନା ଲକ୍ଷ୍ମୀ କିହାମାନି ତଲିତି ପାପୁତି ତସାହିଲଅସି । ୨୭ ସାମା ନୀର୍ଦ୍ଦେଶି ଏଞ୍ଜାସି ଜାହାରା ଦାର୍ମ୍ଭି ଗାଟାଣି ତସାଲି ତାକି ପାପୁ ମେଣ୍ଟଜିନି ମେରା କିହାମାନେସି । ଇଦାଆଁ ତଲେ ମାହାପୁରୁ ତସାମାନେସି, ଏଞ୍ଜାସି ତାନୁଏ ଦାର୍ମ୍ଭିଗାଟାସି ଇଞ୍ଜା ଆମ୍ବାଆସି ଜୀସୁ ତାଣା ନାମିନେସି, ଏଞ୍ଜାସି ବାରେଜାଣାତି ଦାର୍ମ୍ଭି ଗାଟାରିଲେହେଁ ଆବିନେସି ।

୨୭ ଆତିହୁଁ ଆମିନି କାତାତା ମାର ବତପଣ ଆନାୟି ? ଆଏ, ଏଲେତି କାତା ଏନାୟି ହିଲେଏ । ବତପଣ ଆହାଲିତାକି ମା ତାଣା ଏନାୟି ମାନେ ? ମାର ବାରେ ହୁକୁମି ମାନୁଞ୍ଜି ଆହିମାନାୟି ଇଞ୍ଜିହୁଁ କି ? ଆଏ, ଖାରଇ ନାମୁଏ ମା ବତପଣ ଆନେ । ୨୮ ମାର ନେହୁଁକିଁ ତେଲହାଲି ଆଡିନାୟି. ରଅସି ଖାରଇ ତାନି ନାମୁତଲେ ମାହାପୁରୁ ନକିତା ଦାର୍ମ୍ଭିଗାଟାସି ଇଞ୍ଜିଁ ଖେଜିନେସି, ମେରାତି ମାନି କିତିସାରେ ଆଏ । ୨୯ ମାହାପୁରୁ ଖାରଇ ଜୀହୁଦି ଲକ୍ଷ୍ମୀତି ମାହାପୁରୁକି ? ଏଞ୍ଜାସି ଜୀହୁଦିଆଆତି ଲକ୍ଷ୍ମୀତି ମାହାପୁରୁ ଆଏକି ? ସାତେଏ ଏଞ୍ଜାସି ବାରେ ଲକ୍ଷ୍ମୀତି ମାହାପୁରୁ । ୩୦ ଏନାଆଁତାକି ଇତିହୁଁ, ମାହାପୁରୁ ରଅସିଏ, ଅଡେ ଏଞ୍ଜାସି ଜୀହୁଦି ଇଞ୍ଜା ଜୀହୁଦିଆଆତି ଲକ୍ଷ୍ମୀତି ନାମୁ ତାକି ଏଞ୍ଜାସି ଏଞ୍ଜାରାଇଁ ଦାର୍ମ୍ଭି ଗାଟାରିଲେହେଁ ଆବିନେସି । ୩୧ ଆତିହୁଁ, ମାର କି ନାମୁତଲେ ମସାତି ମେରା ମେଣ୍ଟଜି ମାନାୟି ? ଏଡି ଏରେଲା ଜିକେଏ ଆଆପେ, ସାମା ମାର ନାମୁତଲେ ମସାତି ମେରାଇଁ ଜାଣେ ତୀରି କିହିମାନାୟି ।

## ୪

### ଅବ୍ରାହାମତି ମାଣ୍ଡକି

୧ ଆତିହୁଁ ଆଜ୍ଞା ତଲେ ମା ଆକୁ ଅବ୍ରାହାମ ଏନାଆଁ ବେଟାଆହାମାନେସି ଇଞ୍ଜିହୁଁ ମାର ଏଲେଇନାୟି ? ୨ ଅବ୍ରାହାମ ତାନି ଜାହାରା କାମାତି ମାହାପୁରୁ ତାଣା ଦାର୍ମ୍ଭିଗାଟାସି ଆହା ମାତିହୁଁମା, ଏଞ୍ଜାଣାକି ବତପଣ କିନି କାତା ମାତେ । ସାମା

☆ ୩:୩୦ ୩:୩୦ ଖେ ମେରା ୨:୪; ଗାଲା ୩:୨୦

ମାହାପୁରୁ ଝାକିଟି ଏହି ଆହାହିଲିଆଡେ । ୩ ☆ଦାର୍ମୁ ସାସ୍ତେରି ଲେହେ, “ଅବ୍ରାହାମ ମାହାପୁରୁଇଁ ନାମିତେସି, ଅଡ଼େ ଏ ନାମୁତାକି ମାହାପୁରୁ ଏଝାଣାଇଁ ଦାର୍ମୁ ଗାଟାଣି ଲେହେଁ ଅପିତେସି ।” ୪ ଆମ୍ବାଆସି କାମା କିନେସି, ଏଝାଣାକି ତାନି କୂଲି ମେଡ଼ାଆଡ଼େ, ଏଡ଼ି ଦାନା ହୀନାୟି ଆହାଲି ଆଡ଼େଏ, ଏଡ଼ି କାମାତି ପାଡ଼େୟି ଇଞ୍ଜିଁ ଇଣ୍ଡି ଆନେ । ୫ ସାମା ଆମ୍ବାଆସି ତାନି କାମାତା ଆସା କିଆନା, ଦାର୍ମୁ ହିଲିଆଗାଟାଣାଇଁ ଏମିନି ମାହାପୁରୁ ଦାର୍ମୁଗାଟାସି ଇଞ୍ଜିଁ ଆବିନେସି, ଏଝାଣି ତାଣା ନାମିନେସି, ଏଝାଣି ନକିତା ଏଝାଣି ନାମୁ ଦାର୍ମୁଗାଟାୟି ଇଞ୍ଜିଁ ଝେଙ୍ଗିନେ । ୬ ଆମିନି ଲକୁଇଁ କାମା ଲଡ଼ାତି ସିନି କିଆନା ମାହାପୁରୁ ଏଝାଣାଇଁ ଦାର୍ମୁଗାଟାସି ଇଞ୍ଜିଁ ଆବିନେସି, ଏଝାଣାଇଁ ନେହାସି ଇଞ୍ଜିଁ ଦାଝୁଦ ଏଲେଇଞ୍ଜା ମାନେସି;

୭ ☆“ଆମ୍ବାଆରି ଦହ ମେଣ୍ଟି କିଞ୍ଜିଆହାମାନେ,

ଆମ୍ବାଆରି ପାପୁ ମେଣ୍ଟି କିଞ୍ଜିଆହାମାନେ, ଏଝାଋକି ନେହେଁ ।

୮ ପୁରୁ ଆମ୍ବାଆରି ପାପୁ ଆହୁଅସି, ଏଝାଣାକି ନେହେଁ !”

୯ ଇମ୍ବାଆଁ ଦାଝୁଦ ଆମ୍ବାଆରାଇଁ ନେହେଁ ଇଞ୍ଜିଁ ଝେସାମାନେସି, ଏଝାରି କି ଝାରଇ ତଲୁ ଦାପି ଆଡ଼ି ଲକୁ ମାଚେରି ? କି, ତଲୁ ଦାପିଆଆଡ଼ି ଲକୁ ଜିକେଏ ନେହାରି ଆହାଲି ଆଡ଼ିନେରି । ମାଡ଼ ଏଲେ ଇଞ୍ଜିମାନାୟି, “ଅବ୍ରାହାମ ନାମୁତଲେ ଦାର୍ମୁଗାଟାସି ଇଞ୍ଜିଁ ଝେଙ୍ଗିତେସି ।” ୧୦ ଆଡ଼ିହୁଁ ଏଡ଼ି ଏଚେଲା ଆହାମାଚେ ? ଅବ୍ରାହାମ ତଲୁ ଦାପି ଆଡ଼ି ତାୟୁ କି, ତାନି ନକେଏ ? ତଲୁ ଦାପି ଆଆନକେଏ, ତାୟୁ ଆଏ । ୧୧ ତଲୁ ଦାପି ଆଡ଼ି ନକେଏ ଅବ୍ରାହାମ ନାମୁ ତାକି ମାହାପୁରୁ ଏଝାଣାଇଁ ଦାର୍ମୁ ଗାଟାଣା ଲେହେଁ ଆବା ମାଚେସି । ଇଦାଆଁ ପୁଣ୍ଡି କିହାଲିତାକି ର ସିନାଲେହେଁ ଅବ୍ରାହାମ ଇ ତଲୁ ଦାପିଆନି ମେରା ବେଟାଆହା ମାଚେସି, ଇଚିହୁଁ, ଆମିନି ଗାଟାରି ତଲୁ ଦାପି ଆଆନା ଜିକେଏ ମାହାପୁରୁ ତାଣାଟି ଦାର୍ମୁଗାଟାସି ଇଞ୍ଜିହୁଁ ଆବିତାସି, ସୁଦୁ ମାଣକିଟି ଅବ୍ରାହାମ ଏଝାରି ତାଞ୍ଜି । ☆ ୧୨ ଆବା ଅବ୍ରାହାମ ତଲୁ ଦାପି ଆଡ଼ି ନକେଏଟିଏ ଆମିନି ନାମୁତି କାତା ତସାମାଚେସି,

☆ ୪:୩ ୪:୩ ମୂଲୁ ୧୫:୬; ଗାଲା ୩:୬

☆ ୪:୭ ୪:୭ ପାଚୁ ୩୨:୧,୨

☆ ୪:୧୧ ୪:୧୧

ତଲୁ ଦାପିଆଥାତି ଲକୁ ଜାହାରା ଜୀଝୁତା ଏଲେତି ନାମୁ ତସାଲି ଆଡ଼ିସାରେ, ଅବ୍ରାହାମ ଏଝାରାକି ଜିକେଏ ତାଞ୍ଜି ଆନେସି ।

ମାହାପୁରୁତି ଆଞ୍ଜାମାନାଣି ନାମୁତଲେ ବେଟାଆନାୟି

୧୩ ✨ଅବ୍ରାହାମ ମେରାତି ମାନି କିହାମାନାକି ଆଏ । ଝାରୁଇ ତାନି ନାମୁ ତାକି ମାହାପୁରୁ ତାଣାଟି ଦାମ୍ବୁଗାଟାସି ଇଞ୍ଜିଁ ଝେଙ୍ଗାମାତେସି ଇଞ୍ଜାଁ ଏଦାଆଁତାକି ତାନି ମୀରୁକା ମାସ୍କା ଦାରୁତିତି ଅଦିକାରା ବେଟାଆନେରି ଇଞ୍ଜିଁ ମାହାପୁରୁ ଆଞ୍ଜାମାତେସି । ✨ ୧୪ ✨ଆମ୍ବାଆରି ମେରାତି ମାନି କିନାରି, ଝାରୁଇ ଏଝାରି ମାହାପୁରୁତି ଦାନା ବେଟାଆନେରି ଇତିସାରେ, ମାଣସିତି ନାମୁ ଉଜେଏ, ମାହାପୁରୁ ଆଞ୍ଜାମାନାୟି ଜିକେଏ ଉଜେଏତାୟି ଆନେ । ✨ ୧୫ ✨ଇତିହୁଁ ମସାତି ମେରା ଉରିନି ତାଣାଟି ମାହାପୁରୁତି କାରୁବି ଗାଟାସି ଆନେସି, ସାମା ଆମ୍ବିୟା ମେରା ହିଲେଏ, ଏମ୍ବାଆଁ ମେରା ଉରିନି କାତା ହିଲେଏ ।

୧୬ ✨ଏଦାଆଁତାକି ମାହାପୁରୁତି ଆଞ୍ଜାମାନାୟି ନାମୁ ଅଡେ କାର୍ମାତି ଲାକ ଇଟ୍‌କି ଆହାମାନେ । ଆମିନି ଗାଟାରି ମେରାତି ମାନି କିନେରି, ଝାରୁଇ ଏଝାରାକିଦେହେଁ ମାହାପୁରୁତି ଆଞ୍ଜାମାନାୟି ଆଏ । ଅବ୍ରାହାମ ଲେହେଁ ନାମିମାନି ବାରେ ଲକୁତାକି ଜିକେଏ ଆନେ, ଏନାଆଁତାକି ଇତିହୁଁ ଅବ୍ରାହାମ ଏଝାରି ସୁଦୁ ମାଣକିତି ତାଞ୍ଜି; ✨ ୧୭ ✨ଆମିନି ମାହାପୁରୁଇଁ ଅବ୍ରାହାମ ନାମିମାତେସି, ଆମ୍ବାଆସି ହାଡାରାଇଁ ଝେଣ୍ଡେ ଜୀଝୁ କିନେସି, ଅଡେ ହିଲାଆଗାଟି ଦିଶ୍‌ସୁତି ମାନି ଲେହେଁ ହାଡିନେସି, ଏ ମାହାପୁରୁ ନକିତା ଏଝାସି ମା ତାଞ୍ଜି ଆହାମାନେସି, ଇ କାତା ଦାମ୍ବୁ ସାସ୍ତେରିତା ରାସ୍କି ଆହାମାନେ, “ନିଜେ ହାରେକା କୃତାତି ଲକୁତି ତାଞ୍ଜି କିହାମାଞ୍ଜାନମି ।” ✨ ୧୮ ✨ଆସା କିନାୟି ଏନାୟି ହିଲାଆତି ଜିକେଏ ଅବ୍ରାହାମ ନାମିତେସି ଇଞ୍ଜାଁ ଆସା ଇତିତେସି, ଏଦାଆଁତାକି “ହାରେକା କୃତାତି ତାଞ୍ଜି” ଆଡେସି । ଦାମ୍ବୁ ସାସ୍ତେରିତା ରାସ୍କି ଆହାମାନେ, “ନୀ କୃତା ହୁକାୟାଁ ଲେହେଁ ଏପାଆନେରି ।” ✨ ୧୯ ✨ଏଝାଣାକି ଏଚିବେଲା ପାସାକଡ଼ି ବାର୍ଯା ଆହାମାଗାକି ଏଝାସି ତାନି ଆଙ୍ଗାତି ହାଡାୟି ଇଞ୍ଜାଁ

✨ ୪:୧୩ ୪:୧୩ ଗାଲା ୩:୨୯ ✨ ୪:୧୩ ୪:୧୩ ମୂଲୁ ୧୭:୪-୬; ୨୨:୧୭,୧୮; ଗାଲା ୩:୨୯  
✨ ୪:୧୪ ୪:୧୪ ଗାଲା ୩:୧୮ ✨ ୪:୧୪ ୪:୧୪ ଗାଲା ୩:୧୮ ✨ ୪:୧୭ ୪:୧୭ ଗାଲା ୩:୭ ✨ ୪:୧୭ ୪:୧୭ ଗାଲା ୩:୭ ✨ ୪:୧୭ ୪:୧୭ ମୂଲୁ ୧୭:୫ ✨ ୪:୧୮ ୪:୧୮ ମୂଲୁ ୧୫:୫

ସାରା ଅଡ଼େ କକାରି ପଦାଁ ଆନି ଗାରା ଜିକେଏ ହାଡ଼ାୟି ଇଞ୍ଜି  
 ଅଶ୍ପତି ଜିକେଏ ନାମୁତା ଉଣା ଆଆଡେସି । ☆ ୨୦ ଏଞ୍ଜାସି ତାନି  
 ନାମୁପିହୁଆଡେସି, କି ମାହାପୁରୁ ଆଞ୍ଜାମାନାଣି ଆନାମାନା ଆଆଡେସି  
 । ଏଞ୍ଜାସି ନାମୁତା ବାଡ଼ୁୟୁ ଆଡେସି ଇଞ୍ଜା ମାହାପୁରୁଇଁ ଜହରା  
 କିଡେସି । ୨୧ ମାହାପୁରୁ ଏନାଆଁ ଆଞ୍ଜାମାଡେସି, ଏଞ୍ଜାସି ଏନାଆଁ ମାନି  
 କିନେସି ଇଞ୍ଜି ଏଞ୍ଜାଣାକି ଜାଣ୍ଡେ ନାମୁ ମାଡେ । ୨୨ ଏନାଆଁତାକି  
 ତାନି ନାମୁତଲେ ଅବ୍ରାହାମ, “ମାହାପୁରୁ ତାଣାଟି ଦାର୍ମୁଗାଟାସି  
 ଆହାମାଡେସି ।” ☆ ୨୩ “ଅବ୍ରାହାମ ଦାର୍ମୁଗାଟାସି ଇଞ୍ଜି ଝେଙ୍ଗାମାଟି”  
 କାତା ଖାରଇ ଏଞ୍ଜାଣି ତାକିଏଦେଁ ରାସ୍‌କି ଆହାହିଲେଏ । ୨୪ ସାମା ଇ  
 କାତା ମାଙ୍ଗେତାକି ଜିକେଏ ରାସ୍‌କି ଆହାମାନେ; ଇତିହୁଁ ଆମ୍ବାଆସି  
 ମା ପ୍ରବୁ ଜୀସୁଇଁ ହାଡ଼ାରି ତାଣାଟି ନିକହାମାନେସି, ଏଞ୍ଜାଣି ତାଣା ମାର  
 ନାମିମାନାୟି, ମାଙ୍ଗେତାକି ଜିକେଏ ଏଡି ଆନେ । ୨୫ ଏ ପ୍ରବୁ ଜୀସୁ  
 ମା ପାପୁତି ବାଡୁଲି ହାହାଲି ହେରପିଆହା ମାଡେସି ଇଞ୍ଜା ମାହାପୁରୁ  
 ନକିତା ମାଙ୍ଗେ ଦାର୍ମୁ ଗାଟାତାୟି କିହାଲି ଝେଣ୍ଡେ ନିଜିଡେସି । ☆

### ୫

#### ମାହାପୁରୁ ନକିତା ନେହୁଁ ତଞ୍ଜା ଆନାୟି

୧ ନୀଏଁ ନାମୁତଲେ ମାର ମାହାପୁରୁ ନକିତା ଦାର୍ମୁ ଗାଟାତାୟି  
 ଆହାମାନାୟି ଇଞ୍ଜା ପ୍ରବୁ ଜୀସୁ କ୍ରୀସ୍ତ ତାଣାଟି ମାହାପୁରୁ ତଲେ ମାର  
 ହିଡ଼ଡି ତଲେ ମାନାୟି; ୨ ଏମିନି କାର୍ମାତା ମାର ମାଞ୍ଜାମାନାୟି, ଏମ୍ବାଟି  
 ଏଞ୍ଜାଣି ତାଣାଟି ନାମୁତା ଜିକେଏ ମାନାୟି; ଇଞ୍ଜା ମାର ମାହାପୁରୁତି  
 ଗାଞ୍ଜୁରମିତି ବାର୍ସୁତା ବଡପଣ କିହିମାନାୟି । ୩ ଖାରଇ ଏଡି ଆଏ,  
 ବାରେ ଦୁକୁ କସ୍ତତା ଜିକେଏ ମାର ରାହାଁ କିହିମାନାୟି, ଇତିହୁଁ  
 କସ୍ତତି ସାସା ଖାନ୍ନେ, ୪ ସାସାଟି ବାଡ଼ୁୟୁ ମାଣକି ଖାନ୍ନେ ଇଞ୍ଜା ବାଡ଼ୁୟୁ  
 ମାଣକିଟି ବାର୍ସୁ ଖାନ୍ନେ । ୫ ବାର୍ସୁ ମାଙ୍ଗେ ହାଣି ଆହାଲି ହିୟେଏ,  
 ଏନାଆଁତାକି ଇତିହୁଁ ମାହାପୁରୁ ମାଙ୍ଗେ ସୁଦୁଜୀଞ୍ଜୁ ହାହାନା ମା  
 ହିୟାତା ତାନି ଜୀଞ୍ଜୁ ନନାଣି ହାହାମାଞ୍ଜାନେସି ।

☆ ୪:୧୯ ୪:୧୯ ମୂଲୁ ୧୭:୧୭ ☆ ୪:୨୨ ୪:୨୨ ମୂଲୁ ୧୫:୬ ☆ ୪:୨୫ ୪:୨୫ ଜିସା ୫୩:୪,୫

୬ ଏତିବେଲାତା ମାର ଏନି ଉପେୟି ହିଲାଆଗାଟାତାୟି ମାରାୟି, ଏତିବେଲା ମାହାପୁରୁ ତୀରି କିହାମାଟି ବେଲାତା କ୍ରୀସ୍ତ ପାପୁ ଲକୁତାକି ହାଡେସି । ୭ ଦାମ୍ଭୂତି ଲକୁତାକି ଆମ୍ବାଆସି ଜିକେଏ ହାଅସି, ନେହୁଁ ଲକୁତାକି ଆମ୍ବାଆସି ଜୀଝୁ ହୀହାଲି ଅଣ୍ପିନେସି । ୮ ସାମା ମାର ପାପୁଗାଟି ଲକୁ ମାଗାଟି ଜିକେଏ କ୍ରୀସ୍ତ ମା ତାକି ତାନି ଜୀଝୁ ହୀତେସି, ଇଦାଆଁ ତଲେ ମାହାପୁରୁ ମାଙ୍ଗେ ଏଚେକା ଜୀଝୁନହୁଁ ମାଞ୍ଜାନେସି, ଏଦାଆଁ ତସାମାଞ୍ଜାନେସି । ୯ ଏଦାଆଁତାକି ଇ କାତା ସାତା, ମାର ନୀଏଁ ଏଝାଣି ନେତେରି ତଲେ ଦାମ୍ଭୂ ଗାଟାତଝି ଆହାମାନାକି ଏଝାଣି ତାଣାଟି ମାହାପୁରୁତି କପାଟି ଗେଲ୍ପି ଆହାଲି ଆଡିନାୟି । ୧୦ ମାର ମାହାପୁରୁତି ସାତୁୟାଁ ମାରାୟି, ସାମା ମାର ତାନି ମୀର୍ଏଣା ହାକିଟି ତାନିତଲେ ଆଣ୍ଡିତାୟି, ନୀଏଁ ମାର ମାହାପୁରୁ ତଲେ ଆଣ୍ଡାନା କ୍ରୀସ୍ତତି ଜୀଝୁତଲେ ଗେଲ୍ପି ଆନାୟି । ୧୧ ଝାରଇ ଏଚେକା ଆଏ, ସାମା ପ୍ରୁ ଜୀସୁ କ୍ରୀସ୍ତତି ତାକି ମାର ନୀଏଁ ମାହାପୁରୁ ତଲେ ଆଣ୍ଡାମାନାୟି; ଏଝାଣି ତାଣାଟି ମାର ମାହାପୁରୁ ତାଣା ବତପଣ ଜିକେଏ ଆହିମାନାୟି ।

### ଆଦମ ଅଡେ କ୍ରୀସ୍ତ

୧୨ ରଅଣି ତାଣାଟି ପାପୁ ଦାର୍ତତିତା ଝାଡେ ଅଡେ ପାପୁ ତଲେ ହାକି ଝାଡେ, ବାରେଜାଣା ପାପୁ କିତାକି ହାକି ବାରେ ମାଣ୍ଡସିତାକି ଝାଡେ, ଇଞ୍ଜା ବାରେଜାଣା ପାପୁ କିତେରି । ☆ ୧୩ ମେରା ହୀପ୍କି ଆଡି ନକେଏ ଦାର୍ତତିତା ପାପୁ ମାଚେ; ସାମା ମେରା ହିଲାଆଟି ପାପୁତି ଏଜିକିଝି ଆହି ହିଲାଆତେ । ୧୪ ଆଦମ ତାଣାଟିଏ ମସା ପାତେକା ଆମ୍ବାଆସି ଜିକେଏ ଆଦମ ଲେହେଁ ହୁକୁମି ମାନି କିଆନା ପାପୁ କିହାହିଲାଆତୁଁ ଜିକେଏ ବାରେଜାଣା ହାକିଟି ତଇ ମାଚେରି; ଆମିନିଗାଟାସି ଝାନାୟି ମାଚେ, ଆଦମ ଏଝାଣି ର ଝାଣା ।

୧୫ ସାମା ଦହ ଏନିକିଁ, ମାହାପୁରୁତି କାର୍ନା ଜିକେଏ ଏଲେକିଁ, ଏଡି ଆଏ, ଇତିହୁଁ ରଅଣି ଦହ ତାକି ହାରେକା ଲକୁତି ହାକି ଆଡେ, ଆତିହୁଁ ମାହାପୁରୁତି କାର୍ନା ଅଡେ ର ମାଣ୍ଡସି ଇତିହୁଁ ଜୀସୁ କ୍ରୀସ୍ତ ହୀତି କାର୍ନାଟି ଦାନା ହାରେକା ଲକୁତାକି ହାରେକା ଗାଡି ଆଡେ । ୧୬ ର ମାଣ୍ଡସି ପାପୁ କିତାକି ଏନିକିଁ ପାଡେୟି ଆଡେ, ଇ ଦାନାଟି

☆ ୫:୧୭ ୫:୧୭ ମୂଲୁ ୩:୬

ପାଠେଇଁ ଏଲେକିଆଏ, ଇଚିହିଁ ରଥଣି ତାକି ଏମିନି ନୀହାଁୟି, ଏମ୍ବାତି ପାଠେଇଁ ତଣ୍ଡ ଆଡେ, ସାମା ହାରେକା ଲକ୍ଷୁତି ଦହ ତାକି ଏମିନି କାର୍ମାତି ଦାନା, ଏମ୍ବାତି ପାଠେଇଁ ଦହ ହିଲୀଆଗାଗାୟି ଆଡେ । ୧୭ ର ମାଣ୍ଡିତି ପାପୁ ତାକି, ହାକି ସାଲ୍‌ଝି କିତେ; ସାମା ଅର ରଥସି ଇଚିହିଁ ଜୀସୁ କ୍ରୀସୁ ଏନାଆଁ କିହାମାନେସି, ଏଡି ଏଚେକା କାଜାୟି । ଆମିନି ବାରେଜାଣା ମାହାପୁରୁତି ହାରେକା କାର୍ମାମେହନାୟି ଉଜେଏ ମେଡା ଆନାଣି ତଲେ ମାହାପୁରୁତି ନକିତା ଦାର୍ମୁଗାଗାରି ଇଞ୍ଜିଁ ଝେଙ୍ଗିନେରି, ଏଞ୍ଜାରି କ୍ରୀସୁ ତଲେ ଜୀଣାଆହାନା ନୀତିନେରି ।

୧୮ ରଥଣି ପାପୁ ଏନିକିହିଁ ବାରେ ମାଣ୍ଡି କୂଡାଲ୍ ତଣ୍ଡ ବେଟା ଆଝିକିତେ, ଏଲେକିହିଁ ଏ ରଥଣି ଦାର୍ମୁତି କାମା ବାରେ ମାଣ୍ଡି କୂଡା ତାକି ଗେଲପି ଆନାଣି ଇଞ୍ଜା ରାଆଗାଟି ଜୀସୁ ତାଗାହାତେ । ୧୯ ରଥସି ମାନି କିଆତାକି ଏନିକିହିଁ ହାରେକା ଲକ୍ଷୁ ପାପୁ ଗାଗାରି ଆଡେରି, ଏଲେକିହିଁ ଏ ରଥଣି ମାନି କିନାଣି ତଲେ ବାରେଜାଣା ମାହାପୁରୁ ନକିତା ଦାର୍ମୁଗାଗାରି ଆନେରି ।

୨୦ ଇଦାଆଁ ପିସପେ ମେରା ଜିକେଏ ଝାଡେ, ଏନିକିହିଁ ଦହ ହାରେକା ଗାତିଆନେ; ସାମା ଆମ୍ବିୟା ପାପୁ ପାତାଆଡେ, ଏମ୍ବାଆଁ ମାହାପୁରୁତି କାର୍ମାମେହନାୟି ଜିକେଏ ହାରେକା ପାତାଆଡେ ।

୨୧ ଏନିକିହିଁ ପାପୁ ହାକି ତଲେ ସାଲ୍‌ଝି କିତେ, ଏଲେକିହିଁ ଏ ମାହାପୁରୁତି କାର୍ମାମେହନାୟି ଜୀସୁ କ୍ରୀସୁ ତାଣ୍ଡାଟି ମାଙ୍ଗେ ଦାର୍ମୁ ଗାଗାତାୟି କିହାଁ ରାଆଗାଟି ଜୀସୁ ହିୟାତେ ।



### ପାପୁତି ହାକି କ୍ରୀସୁ ତାଣ୍ଡାଟି ଜୀସୁ

୧ ଆତିହିଁ ମାର ଏନାଆଁ ଇନାୟି ? ମାହାପୁରୁତି କାର୍ମାମେହନାୟି ଏନିକିହିଁ ହାରେକା ଆନେ, ଏଦାଆଁତାକି କି ପାପୁତେଏ ମାଞ୍ଜେମାନାୟି ? ୨ ଏଡି ଏଚେଲ୍‌ ଜିକେଏ ଆଆପେ । ପାପୁ ତାକି ମାର ହାହାମାନାୟି, ଏନିକିହିଁ ଏମ୍ବାଆଁ ଅଡେ ମାର ନୀତିନାୟି ? ୩ ମାର ଏଚେକା ଲକ୍ଷୁତାୟି କ୍ରୀସୁ ଜୀସୁ ତାଣ୍ଡା ବାପ୍ତିସ୍ମ\* ଅହାମାନାୟି,

\* ୬:୩ ୬:୩ମୁଞ୍ଜିନାୟି



ବାରେ ଜାଣାତାୟି ତାନି ହାକିତା ବାପ୍ତିସ୍ମା† ଅହାମାନାୟି, ଇଦାଆଁ କି ମୀରୁ ପୁଞ୍ଜାହିଲଅତେରି ? ୪ ✨ଏଦାଆଁତାକି ମାର ବାପ୍ତିସ୍ମା‡ ଅହାନା ହାକିତା ତାନିତଲେ ମୁସ୍ତପି ଆହାମାନାୟି, କ୍ରୀସ୍ତ ଏନିକିହ୍ମ ଆବାତି ଗାଝୁରମି ତଲେ ହାଡାରି ତାଣାଟି ଝେଣ୍ଡେ ନିଜ୍ଜିତେସି, ମାର ଜିକେଏ ଏଲେକିହ୍ମ ଏ ପୁଞ୍ଜନି ଜୀଝୁତି ମାଣ୍ଡକି ତଲେ ନୀତିନ ।☆

୫ ଏନାଆଁତାକି ଇତିହ୍ମ ମାର ଏଝାଣି ହାକିତା ଆଣ୍ଡାନା ଏଝାଣିତଲେ ରଣ୍ଡିଏ ଆହାମାନାୟି, ଆତିହ୍ମ ସାତେଏ ଏଝାସି ଝେଣ୍ଡେ ନିଜ୍ଜିତି ଲେହେଁ ମାର ଜିକେଏ ନିଜ୍ଜାନା ଏଝାଣିତଲେ ରଣ୍ଡିଏ ଆନାୟି । ୬ ମାର ପୁଞ୍ଜାମାନାୟି, ପାପୁତି ହଲିୟାଜା ଆଆପ, ଇଦାଆଁତାକି ପାପୁତି ଆଜା ନାସା କିହାଲିତାକି ମା ପ୍ଲୁଝଇ ମାଣ୍ଡକି ତାନିତଲେ ପାସି ମୁଣ୍ଡାତା ହାହାମାନେ । ୭ ଏନାଆଁତାକି ଇତିହ୍ମ ମାଣ୍ଡସି ହାଡିସାରେ, ପାପୁତି ବାଡୁୟୁଟି ଗେଲ୍ପି ଆନେସି । ୮ ସାମା ମାର କ୍ରୀସ୍ତ ତଲେ ହାଡାକି, ତାନିତଲେ ମାର ଜିକେଏ ନୀତିନାୟି ଇଞ୍ଜି ନାମାମାନାୟି । ୯ ମାର ପୁଞ୍ଜାମାନାୟି, କ୍ରୀସ୍ତ ହାକିଟି ନିଜ୍ଜାମାନାକି, ଏଝାସି ଅଡେ ଝେଣ୍ଡେ ହାଅସିଦେଁ, ଏଝାଣାଇଁ ଅଡେ ହାକି ସାଲ୍ଡି କିହାଲି ଆଡେଏ । ୧୦ ଏଝାସି ଆମିନି ହାକିତା ହାଡେସି, ଏଦାଆଁ ତଲେ ପାପୁତି ବାଡୁୟୁଟି ରଣ୍ଡିଏ ଦେବେଏ ଜୀଣା ଆଡେସି । ଅଡେ ନୀର୍ସି ଆମିନି ଜୀଝୁତଲେ ନୀତାମାନେସି, ଏଡି ମାହାପୁରୁ ତଲେ ଆଣ୍ଡିତି ଜୀଝୁ । ୧୧ ଏଲେକିହ୍ମ ଏ ମୀରୁ ଜିକେଏ ପାପୁତା ହାହାମାଞ୍ଜେରି ଇଞ୍ଜି ଅଣ୍ଡାଦୁ । ସାମା କ୍ରୀସ୍ତ ଜୀସୁ ତାଣାଟି ଆଣ୍ଡାନା ମାହାପୁରୁ ତାକି ଜୀଝୁ ଗାଟାତମି ଇଞ୍ଜୁ ।

୧୨ ମୀ ହାନ୍ତି ଆଜାତା ପାପୁ ସାଲ୍ଡି କିୟାଆପେ; ମୀରୁ ଅଡେ ଆଜାତି ଲାଗେଏତି ଅଣ୍ଡୁ ତଲେ ତାକାଆଦୁ । ୧୩ ମୀ ଆଜା ଉଡେଲିତି ଲାଗେଏ କାମାତି ଜୁତି ଲେହେଁ ପାପୁ କାମାତା ହେରପାଆଦୁ, ସାମା ହାଡାରି ତାଣାଟି ନୀତାମାନି ଲେହେଁ ଜାହା ଜାହାରାଇଁ ମାହାପୁରୁ ନକିତା ହେରପା କତାଦୁ, ଇଞ୍ଜା ଜାହା ଜାହାରା ଆଜା ଉଡେଲିତି ଦାମ୍ବୁତି ଜୁତି ଲେହେଁ ମାହାପୁରୁ ନକିତା ହେରପାଦୁ

† ୭:୩ ୭:୩ମୁଞ୍ଜନାୟି ✨ ୭:୪ ୭:୪ କଲସି ୨:୧୨ ‡ ୭:୪ ୭:୪ମୁଞ୍ଜନାୟି ☆ ୭:୪ ୭:୪ କଲସି ୨:୧୨

। ୧୪ ପାପୁ ମିଙ୍ଗେ ସାଳୁଝି କିୟାଆପେ, ମୀରୁ ଅଡ଼େ ମସାତି ନେରା ଡ଼ଇ ହିଲଅତେରି, ସାମା ମାହାପୁରୁତି କାର୍ମାତି ଡ଼ଇ ମାଞ୍ଜେରି ।

### ଦାମ୍ଭୁତି ହଲିୟାଙ୍ଗା

୧୫ ଆତିହ୍ମ ଏନାଆଁ ? ମୀରୁ ମସାତି ନେରା ଡ଼ଇ ହିଲଆୟି, ସାମା ମାହାପୁରୁତି କାର୍ମାମେହ୍ନି ଡ଼ଇ ମାନାୟି, ଇଦାଆଁତାକି କି ପାପୁ କିନାୟି ? ଏଲେଆହ୍ମ ଏରେଲା ଜିକେଏ ଆଆପେ । ୧୬ ମୀରୁ ସାତେଏ ପୁଞ୍ଜାମାଞ୍ଜେରି, ମୀରୁ ରଅଣି ହଲିୟାଙ୍ଗା ଆହାନା ଏଞ୍ଜାଣି କାତା ମାନୁଝି ଆଡ଼ିସାରେ, ଆତିହ୍ମ ମୀରୁ ଏଞ୍ଜାଣି ହଲିୟାଙ୍ଗାତେରି, ପାପୁତି ହଲିୟାଙ୍ଗା ଆଡ଼ିସାରେ, ପାପୁ ମାଣକିତି ହାକି ଖାନେ; ଦାମ୍ଭୁତି ଜେଚ ହାତିସାରେ, ଜୀଝୁ ବେଟାଆଦେରି । ୧୭ ସାମା ମାହାପୁରୁଇଁ ଜହରା କିହିମାଇଁ, ମୀରୁ ର ଦିନା ପାପୁତି ହଲିୟାଙ୍ଗାତେରି ମାରେରି, ମୀରୁ ନୀଏଁ ନେହ୍ମ ବଲୁତି ଜାପୁନି ତାଣା ହେରପିଆହା ମାଞ୍ଜେରି, ଅଡ଼େ ହିୟା ତଲେ ଏମ୍ବାତି ମାନି କିହିମାଞ୍ଜେରି । ୧୮ ପାପୁତି ପିସପି ଆହାନା ଦାମ୍ଭୁତି ହଲିୟାଙ୍ଗା ଆହାମାଞ୍ଜେରି । ୧୯ ମୀ ଆଙ୍ଗାତି ବାଡ଼ୁୟୁ ହିଲଆକି ମାଣସିତି ହାଡ଼ାତଲେ ଖେସିମାଞ୍ଜାଇଁ; ମୀରୁ ଏନିକିହ୍ମ ଲାଗେଏତି କାମାତାକି ଜାହାରା ଆଙ୍ଗା ଉଡ଼େଲିତି ପଲେଏତି ଇଞ୍ଜା ଦାମ୍ଭୁ ହିଲଆତାଣା ହଲିୟାଙ୍ଗା ଲେହେଁ ହେରପାମାରେରି, ଏଲେକିହ୍ମ ଏ ନୀଏଁ ଜାହାରା ଆଙ୍ଗା ଉଡ଼େଲିତି ସୁଦୁଜୀଝୁ ତାକି ଦାମ୍ଭୁତି ନକିତା ହଲିୟାଙ୍ଗା ଲେହେଁ ହେରପାଦୁ ।

୨୦ ମୀରୁ ପାପୁତି ହଲିୟାଙ୍ଗା ମାଗାଟି, ଦାମ୍ଭୁତାକି ନେଲା ପିସପି ଆହାମାରେରି । ୨୧ ଆତିହ୍ମ ନୀଏଁ ମିଙ୍ଗେ ଆମିନି କାମା କିହାଲିତାକି ଲାଜା ହଡ଼ିମାଞ୍ଜାନେ, ଏତିବେଲା ବାରେ କିହିମାରେରି, ଏଦି ଏମ୍ବାତି ଏନାଆଁ ଲାବା ବେଟାଆଡ଼େରି ? ଏ ବାରେ କାମାତି ପାଡ଼େୟି ହାକି । ୨୨ ସାମା ନୀଏଁ ମୀରୁ ପାପୁତି ପିସପି ଆହାନା ମାହାପୁରୁତି ହଲିୟାଙ୍ଗା ଆହାମାଞ୍ଜେରି । ଇଦାଆଁତି ଲାବା ଆହିମାନେ, ମାହାପୁରୁ ତାଣା ସୁଦୁଜୀଝୁ ତଲେ ହେରପି ଆନାୟି ଇଞ୍ଜା ରାଆଗାଟି ଜୀଝୁ ବେଟାଆନାୟି । ୨୩ ଏନାଆଁତାକି ଇତିହ୍ମ ପାପୁତି କୁଲି ହାକି, ସାମା

ମାହାପୁରୁତି କାର୍ମାମେହନି ଦାନା ମା ପ୍ରବୁ ଜୀସୁ କ୍ରୀସ୍ତ ତଲେ ଆଣ୍ଟିନି ତାଣା ରାଆଗାଟି ଜୀସୁ ମାନେ ।



**ବୀହା ଆନି କାତା**

<sup>୧</sup> ତାୟି ତାଙ୍ଗିସ୍ତାତେରି, ନୀଏଁ ଏନାଆଁ ଖେସାଲି ଅଣ୍ଟପିମାଲ୍, ଏଦାଆଁ ମୀରୁ ତେଲ୍‌ହିଦେରି, ଏନାଆଁତାକି ଇଚିହିଁ ମୀରୁ ପୁଞ୍ଜାମାଞ୍ଜେରି, “ମେରା” ଏନାୟି । ମାଣ୍ଟସି ଖାରଇ ତାନି ନୀତାମାନି ପାତେକା ମେରାତି ଡଲ ଡୟିନେସି । <sup>୨</sup> ତକ୍ରା ନୀତାମାନି ପାତେକା ତାନି ତକ୍ତି ଏଞ୍ଜାଣିତଲେ ବୀହା ମେରା ତଲେ ଦସ୍‌ପି ଆହାନା ଡୟିନେ । ସାମା ତକ୍ରା ହାଡ଼ିସାରେ, ଏଞ୍ଜାଣି ତକ୍ତି ଇ ମେରାଟି ପିସ୍‌ପି ଆନେ । <sup>୩</sup> ତକ୍ରା ନୀତା ମାନାଟିଏ, ତକ୍ତି ଅର ରଅଣାକି ବୀହା ଆଡ଼ିସାରେ, ଏଦାନି ଦାରେଣି ଇଞ୍ଜିଁ ଇନେରି; ସାମା ତକ୍ରା ହାଡ଼ି ତାୟୁ ମେରାଟି ପିସ୍‌ପି ଆନେ, ଅଡ଼େ ଏଦି ଅର ରଅଣାକି ବୀହା ଆଡ଼ିସାରେ, ଏଦି ଦାରେଣି ଆଏ । <sup>୪</sup> ଇଦାଆଁତାକି ତାୟି ତାଙ୍ଗିସ୍ତାତେରି, କ୍ରୀସ୍ତୁଟି ଆଙ୍ଗା ତଲେ ମୀରୁ ଜିକେଏ ମେରାତାକି ହାହାମାଞ୍ଜେରି, ଏନିକିହିଁ ମୀରୁ ଏଟକାତାରି ତଲେ ଆଣ୍ଟିଦେରି, ଇଚିହିଁ ମା ମାହାପୁରୁ ତାକି ପାଡ଼େୟି ଆୟାଲି ଆମ୍ବାଆସି ହାଡ଼ାରି ତାଣାଟି ନୀତାମାନେସି, ଏଞ୍ଜାଣିତଲେ ଆଣ୍ଟାଦୁ । <sup>୫</sup> ଏଚରଦିନା ପାତେକା ମାର ଆଙ୍ଗାତି ମାଣ୍ଟକି ତଲେ ମାଚାୟି, ଏଚରଦିନା ପାତେକା ମସା ମେରାଟି ପାପୁତି ଜୁପ୍‌କା ମା ଆଙ୍ଗା ବିତ୍ରା ଜୀସୁତି ହାଡ଼ି କିହାଲି କାମା କିହିମାଚେ । <sup>୬</sup> ସାମା ଏନାଆଁତଲେ ଦସ୍‌ପି ଆହାମାଚାୟି, ଏମ୍ବାଟି ହାହାନା ନୀଏଁ ମାର ମେରାଟି ଅଦିକାରାଟି ମୁକ୍‌ଲଞ୍ଜି ଆହାମାନାୟି; ମାର ଅଡ଼େ ତଲିତିଲେହେଁ ରାସ୍‌କି ଆହାମାନି ମେରାତି ସେବା କିହି ହିଲାଆୟି, ସୁଦୁଜୀସୁ ତସାମାଞ୍ଜାନି ପୁଞ୍ଜନି ଜିରୁତା ନୀଏଁ ତାକି ମାନାୟି ।

**ମେରା ଅଡ଼େ ପାପୁ**

<sup>୭</sup> ଆତିହିଁ ଏନାଆଁ ଇନାୟି, ମେରା ପାପୁ ଗାଗାୟି ? ଏଦି ଏଚେଲାଞ୍ଜା ଆଏ । ସାମା ପାପୁ ଏନାୟି, ଏଦାଆଁ ମେରା ନାଙ୍ଗେ ଖେସା ମାଞ୍ଜାନେ, “ଏଟକା ଲକ୍ତୁତି ଦିଶ୍‌ସୁ ଜୁପ୍‌କା ଆଆଦୁ,” ଇ ହୁକୁମି ମେରା ଖେସା ମାଞ୍ଜାଆତିହିଁ ମା, ଜୁପ୍‌କା ଏନାୟି, ନାନୁ ପୁନାଆତେଏଁମା

।<sup>୫୮</sup> ଯାମା ପାପୁ ପାରୁ ବେଟାଆହାନା ହୁକୁମି ତଲେ ନା ତାଣା ବାରେଲେହେଁତି ଜୁପକା କିନାଣି ହିୟାତେ, ମେରା ପିସପେ ପାପୁ ହାଡାୟି ।<sup>୫୯</sup> ର ଦିନା ନାନୁ ମେରା ପୁନାଆନା ନୀତିମାଚେଏଁ, ସାମା ହୁକୁମି ଖାହାଲିଏ ପାପୁ ନୀତିତେ, ଇଞ୍ଜା ନାନୁ ହାଡେଏଁ; <sup>୬୦</sup> ଆମିନି ମେରା ଜୀଝୁ ହାହାଲିତାକି ଚିକାଣା ତାୟି ମାଚେ, ଏଦି ନା ଜୀଝୁତା ହାକି ଖାଡେ ।<sup>୬୧</sup> ଇତିହଁ ପାପୁ ପାରୁ ବେଟାଆହାନା ହୁକୁମିଟି ନାଙ୍ଗେ ନାଡ଼ି କିୟାତେ ଇଞ୍ଜା ଏମ୍ପାଟି ନାଙ୍ଗେ ପାୟାତେ ।<sup>୬୨</sup>

<sup>୬୩</sup> ମେରା ସୁଦୁଗାଟାୟି, ଏଦାଣି ହୁକୁମିକା ବାରେ ସୁଦୁ ଗାଟାଇ, ଦାମ୍ପୁଗାଟାୟି ଇଞ୍ଜା ନେହାୟି । <sup>୬୪</sup> ଆତିହଁ, ଏନାୟି ନେହାୟି, ଏଦି କି ନାଙ୍ଗେ ହାଡ଼ି କିୟାନେ ? ଏଦି ଏରେଲାଖା ଆଆପେ, ପାପୁଏ ଏଦାଆଁ କିତେ, ନେହଁ ମେରାତି ଲେମ୍ପାନା ପାପୁ ନାଙ୍ଗେ ହାଡ଼ି କିୟାତେ, ଏଦାଆଁ ତଲେ ପାପୁତି ସାତା ଖାଣା ତଞ୍ଜାଆଡେ, ଏଦାଆଁତାକି ମେରା ତଲେ ପାପୁ ହାରେକା ଆଜିହପେତାୟି ପୁଣ୍ଡିଆଡେ ।

**ମାଣ୍ଡସି ଆଙ୍ଗାତା ମାନି ଗଡ଼ହା**

<sup>୬୫</sup> ମସାତି ମେରା ସୁଦୁଜୀଝୁ ଗାଟାୟି, ଇଦାଆଁ ମାର ପୁଞ୍ଜାମାନାୟି; ସାମା ନାନୁ ପାପୁତି ଆଙ୍ଗାତା କଡ଼ଝିଆଡ଼ି ହଲେଏଣାତେଏଁ । <sup>୬୬</sup> ନାନୁ ଏଦାଆଁ କିହିମାଇଁ, ଏଦାଆଁ ନାନୁ ପୁଞ୍ଜିହିଲଅଁ; ଏଦାଆଁ କିହାଲି ନା ଅଣ୍ପୁ, ଏଦାଆଁ ନାନୁ କିଅଁ; ସାମା ଏଦାଆଁ ଅପଅଁ, ଏଦାଆଁ କିଇଁ ।<sup>୬୭</sup> ସାମା ଏଦାଆଁ ନାନୁ ଅଣ୍ପଅଁ, ଏଦାଆଁ କିତିସାରେ, ଆତିହଁ ମସାତି ମେରା ନେହାୟି ଏଦାଆଁ ନାନୁ ଜଲିମାଇଁ । <sup>୬୮</sup> ଏଦାଆଁତାକି ଏ କାମା ସାତେଏ ନାନୁ କିଆନା ନା ବିତ୍ରାମାନି ପାପୁଏ ଏଦାଆଁ କିହିମାନେ । <sup>୬୯</sup> ନାନୁ ପୁଞ୍ଜାମାଇଁ, ନା ବିତ୍ରା ଇତିହଁ ମାଣ୍ଡସି ମାଣକିତା ନେହାୟି ଏନାୟି ଜିକେଏ ହିଲେଏ, ଇତିହଁ ନେହଁ କାମା କିହାଲି ନାଙ୍ଗେ ଅଣ୍ପୁ ମାତିହଁ ଜିକେଏ ଏଦାଆଁ କିହାଲି ଆଡ଼ଅଁ । <sup>୭୦</sup> ଇତିହଁ ଏମିନି ନେହଁ କାମା କିହାଲି ନାନୁ ମନ କିଇଁ, ଏଦାଆଁ କିଅଁ, ସାମା ଏମିନି ଲାଗେଏତି କାମା କିହାଲି ନାନୁ ମନ କିଅଁ, ଏଦାଆଁ କିଇଁ ।

☆ ୭:୭ ୭:୭ ହାନାୟି ୨୦:୧୭; ଖେ ମେରା ୫:୨୧ ☆ ୭:୧୧ ୭:୧୧ ମୂଲୁ ୩:୧୩ ☆ ୭:୧୫ ୭:୧୫ ଗାଲା ୫:୧୭ ☆ ୭:୧୫ ୭:୧୫ ମୂଲୁ ୫:୧୭

୨୦ ନାନୁ ଏନାଆଁ ଅଶ୍ଵି ହିଲଅଁ, ଏଦାଆଁ କିହିମାଇଁ, ଆତିହିଁ ଏଦାଆଁ ନାନୁ ଅଡ଼େ କିଅଁ, ସାମା ନା ତାଣା ବାସା କିହାମାନି ପାପୁ ଏଦାଆଁ କିନେ ।

୨୧ ଏଦାଆଁତାକି ନାନୁ ନେହିଁ କାମା କିହାଲି ମନ କିହିମାଇଁ, ଏରିବେଲା ନା ତାଣା ଖାରଇ ଲାଗେଏତାୟି ତଞ୍ଜା ଆହିମାନେ, ଇଦାଆଁ ମେରାତା ମେସିମାଇଁ । ୨୨ ଇତିହିଁ ହିୟାତା ଅଶ୍ଵିନି ମାଣସିଲେହେଁ, ମାହାପୁରୁତି ମେରା ମାନି କିହାଲି ନାଙ୍ଗେ ରାହାଁ, ୨୩ ସାମା ନାନୁ ନା ଆଙ୍ଗାତା ଅର ରଲେତି ମେରା ତଞ୍ଜା ଆହିମାନେ, ଏଡ଼ି ନା ମନତି ମେରା କପାଟି ଜୁଜୁ କିହିମାନେ, ଅଡ଼େ ନା ଆଙ୍ଗାତା ଏମିନି ପାପୁତି ମେରା ମାନେ, ନାଙ୍ଗେ ଏମ୍ବାଆଁ ଦସ୍‌ପାନା । ୨୪ ଆୟତା, କାର୍ମା କପଲ ହିଲାଆଗାଟି ମାଣସିତେଏଁ ନାନୁ ! ଇ ହାଝିକିନି ଆଙ୍ଗାଟି ନାଙ୍ଗେ ଆମ୍ବାଆସି ଗେଲ୍‌ପାନେସି ? ୨୫ ମା ପ୍ରବୁ ଜୀସୁ କ୍ରୀସ୍ତ ତାଣାଟି ଗେଲ୍‌ପି ଆହାମାନାକି ମାହାପୁରୁଇଁ ଜହରା ଆପେ । ଏନାଆଁତାକି ଇତିହିଁ ନାନୁଏ ନା ମନତଲେ ମାହାପୁରୁତି ମେରାତି ହଲେଏଶାତେଏଁ, ସାମା ଆଙ୍ଗା ତଲେ ପାପୁ ମେରାତି ହଲିୟା ଆହାମାନେ ।

## ୮

### ସୁଦୁଗାଟି ଜୀସୁ

୧ ଆମିନି ଗାଟାରି କ୍ରୀସ୍ତ ଜୀସୁତଲେ ଆଶ୍ଵାନା ନୀତିମାନେରି, ଏଞ୍ଜାରାକି ନୀଏଁ ଏନି ତଣ୍ଡୁ ହିଲେଏ । ୨ ଇତିହିଁ ଜୀସୁ ହିୟାନି ଜୀସୁତି ମେରା କ୍ରୀସ୍ତ ଜୀସୁ ତାଣା ଆଶ୍ଵାନା ମିଙ୍ଗେ ପାପୁ ଅଡ଼େ ହାଝିକିନି ମେରାଟି ମୁକ୍‌ଲଝି କିହାମାଞ୍ଜାନେ । ୩ ମାଣସିତି ଆଙ୍ଗାତା ବାଡ଼ୁୟୁ ହିଲାଆକି ମସା ହୀହାମାନି ମେରା ଏନାଆଁ କିହାଲି ଆଡ଼ାଆତେ, ମାହାପୁରୁ ଏଦାଆଁ ତାନି ମାର୍‌ଏଶାଲ୍ ପାପୁଗାଟି ମାଣସିଲେହେଁ ପାପୁଇଁ ନାସା କିହାଲି ପାଶ୍ଵାନା ଆଙ୍ଗାତି ପାପୁତି ତଣ୍ଡୁ ହୀହାଲି କିତେସି । ୪ ଏଦାଆଁତାକି ମାର୍ ମାଣସିତି ମାଣକିତା ମାନାଆନା ସୁଦୁଜୀସୁତି ମାଣକିତା ମାଞ୍ଜାନା ଇଞ୍ଜା ଇଦାଆଁ ତଲେ ମାର୍ ମେରାତି ପାଶାପାଟୁ ମାନି କିହିମାନାୟି । ୫ ଆମିନି ଗାଟାରି ଆଙ୍ଗାତି ମାଣକି ତଲେ ନୀତିନାରି ଏଞ୍ଜାରି ଆଙ୍ଗାତି ମାଣକିତି କାତାତା ମନ ହୀନେରି, ସାମା

ଆମିନି ଗାଗାରି ସୁଦୁଜୀଝୁତି ମାଣକି ତଲେ ନୀତିନେରି, ଏଝାରି ହିୟାଁ ସୁଦୁଜୀଝୁତି କାତାତା ମନ ହୀନେରି ।<sup>୬</sup> ଇତିହିଁ ଆଜ୍ଞାତି ମାଣକିତି ମନ ହାଝିକିନେ; ସାମା ସୁଦୁଜୀଝୁତି ମାଣକିତି ମନ ଜୀଝୁ ଇଞ୍ଜା ହିତଡ଼ି ହିୟାନେ ।<sup>୭</sup> ଇତିହିଁ ଆଜ୍ଞାତି ମନତଲେ ନୀତିନାସି ମାହାପୁରୁ କପାଟି ସାତୁ ଆନେସି; ଇତିହିଁ ଏଝାସି ମାହାପୁରୁ ମେରାତି ମାନି କିଅସି; ଇଞ୍ଜା ଏଝାସି ମାନଝି ଆହାଲି ଆଡ଼ଅସି ।<sup>୮</sup> ଆମିନି ଗାଗାରି ଆଜ୍ଞାତି ମାଣକି ତଲେ କାମା କିନେରି, ଏଝାରି ମାହାପୁରୁଇଁ ରାହାଁ କିହାଲି ଆଡ଼ଅରି ।

<sup>୯</sup> ମାହାପୁରୁତି ସୁଦୁଜୀଝୁ ସାତା ତଲେ ମୀ ତାଣା ମାଟିସାରେ, ମୀରୁ ଅଡ଼େ ଆଜ୍ଞାତି ମାଣକି ଲେହେଁ ନୀତଅଡ଼େରି, ସାମା ସୁଦୁଜୀଝୁତି ହୁକୁମି ମାନି କିହିମାଞ୍ଜେରି । କ୍ରୀସ୍ତତି ଜୀଝୁ ଆମ୍ବାଆରି ତାଣା ହିଲେଏ, ଏଝାସି ଏଚେଲା ଜିକେଏ ଏଝାଣି ଲକୁ ଆହାଲି ଆଡ଼ଅସି ।<sup>୧୦</sup> ସାମା କ୍ରୀସ୍ତ ମୀ ତାଣା ମାଟିସାରେ, ମୀ ଆଜ୍ଞା ପାପୁ ତାକି ନାସା ଆହାଲି ହାଜିମାଟିହିଁ ଜିକେଏ, ସୁଦୁଜୀଝୁ ମିଙ୍ଗେ ଜୀଝୁ ହୀୟାନେ, ଏନାଆଁତାକି ଇତିହିଁ ମାହାପୁରୁ ନକିତା ମୀରୁ ଦାମ୍ବୁଗାଟାଡ଼େରି ଆହାମାଞ୍ଜେରି ।<sup>୧୧</sup> ✨ଆମ୍ବାଆସି ହାଡ଼ାରି ତାଣାଟି ଜୀସୁଇଁ ନିକ୍‌ହେସି, ଏଝାଣି ଜୀଝୁ ମୀ ତାଣା ମାଟିସାରେ, ଆତିହିଁ ଆମ୍ବାଆସି ହାଡ଼ାରି ତାଣାଟି କ୍ରୀସ୍ତ ଜୀସୁଇଁ ନିକ୍‌ହେସି, ଏଝାସି ମୀ ତାଣା ମାନି ତାନି ଜୀଝୁତଲେ ମୀ ହାଡ଼ି ଆଜ୍ଞାତି ଜିକେଏ ନୀଟନେସି ।

<sup>୧୨</sup> ଏଦାଆଁତାକି, ତାୟି ତାଞ୍ଜିସ୍ତାଡ଼େରି, ମାର ରୀଶାଗାଟାତାୟି, ସାମା ଆଜ୍ଞାତି ମାଣକି ତଲେ ନୀତାଲି ଆଏ ।<sup>୧୩</sup> ଇତିହିଁ ଆଜ୍ଞାତି ମାଣକି ତଲେ ମୀରୁ ନୀତିଦେରି, ଆତିହିଁ ସାଡ଼େଏ ହାଦେରି, ସାମା ସୁଦୁଜୀଝୁତି ସାୟେମି ତଲେ ଆଜ୍ଞାତି କାମା ବାରେ ନାସା କିଦେରି, ଆତିହିଁ ନୀତିଦେରି ।<sup>୧୪</sup> ଆମିନି ଗାଗାରି ମାହାପୁରୁତି ସୁଦୁଜୀଝୁ ତଲେ ତାକିନେରି, ଏଝାରି ମାହାପୁରୁତି ମୀରକା ।

<sup>୧୫</sup> ✨ଇତିହିଁ ମୀରୁ ଖେଣ୍ଡେ ଆଜାଲି ହଲିୟାଜ୍ଞାତି ଜୀଝୁ ବେଟାଆହା ହିଲଅଡ଼େରି, ସାମା ମୀରଏଣାତି ଜୀଝୁ ବେଟାଆହାମାଞ୍ଜେରି; ଏମ୍ବାଟି ମାର “ଆବା ତାଞ୍ଜି” ଇଞ୍ଜିହିଁ

✨ ୮:୧୧ ୮:୧୧ ୧କର ୩:୧୭ ✨ ୮:୧୫ ୮:୧୫ ଗାଲା ୪:୫-୭ ✨ ୮:୧୫ ୮:୧୫ ମାର୍କ ୧୪:୩୬; ଗାଲା ୪:୬

ହାଡ଼ିମାନାୟି । ୧୭ ମାର ମାହାପୁରୁତି ମୀରକା ମାସକା ଇଞ୍ଜି ଏ ଜୀଝୁଏ ମା ଜୀଝୁତଲେ ଆଣ୍ଡାନା ସାକି ହାହିମାନେ । ୧୭ ଏନାଆଁତାକି ଇତିହିଁ ମାର ମାହାପୁରୁତି ମୀରକା ମାସକାତାୟି, ତାନି ଲକୁତାକି ଲଡ଼ାମାନି ବରତି ବାଗା ପାଣ୍ଡନାୟି, ଇଞ୍ଜା କ୍ରୀସ୍ତ ତଲେ ଗାଝୁରମି ବେଟାଆହାଲି ମାର ଜିକେଏ ଏଞ୍ଜାଣିତଲେ ଦୁକୁ କସ୍ତ ପାଣ୍ଡନାୟି ମାନେ, ଆତିହିଁ ମାହାପୁରୁତି ବରତି ବାଗା ଅଡ଼େ କ୍ରୀସ୍ତ ତଲେ ବାଗାତା ଆଣ୍ଡାଲି ଆଡ଼ିନାୟି ।

**ଝାହିମାନି ଗାଝୁରମି**

୧୮ ଅଣ୍ଡପାଦୁ, ଆମିନି ଗାଝୁରମିତା ଝାହିମାନି ଦିନାତା ମାର ଏଗାହାନାୟି, ଏଦାଆଁ କିହାଁ ନୀଏଁତି ଦୁକୁ କାକୁଲି ଇଚାୟି ଜିକେଏ ଆଏ, ଏତିବେଲାତା ମାହାପୁରୁ ତାନି ମୀରକା ମାସକାଣି ତହୁନେସି । ୧୯ ମାହାପୁରୁ ତାନି ମୀରକା ମାସକାଣି ତଞ୍ଜାଆନାଣି ମେସାଲି ବାରେ ଗାଡ଼ି ଆଡ଼ାୟି କାପୁ କାଚାମାନେ । ୨୦ ଏନାଆଁତାକି ଇତିହିଁ ଗାଡ଼ିଆଡ଼ାୟି ମାହାପୁରୁ ତାଣାଟି ବାକା ବେଟାଆହାନା ତାନି ଏଗାହାନି ଚାନ୍ଦୁ ବାଣା ଆହାମାନେ । ଆଡ଼ିଜିକେଏ ତାନି ଆସା ମାନେ, ୨୧ ଅଡ଼େ ଏଦି ବାସୁଁ ବେଟାଆଡ଼େ, ଇଞ୍ଜା ଗାଡ଼ି ଆଡ଼ାୟି ତାନୁଏ ଜିକେଏ ମାହାପୁରୁତି ମୀରକା ଗାଝୁରମି ତାକି ପିସପି ଆହାଲିତାକି ନାସା ଆନି ହଲିୟାଟି ପିସପି ଆନେ ୨୨ ସାମା ନୀଏଁ ପାତେକା ବାରେ ଦାରତି ଜାନା କିନି ବୀସା ତଲେ କସ୍ତ ପାଣ୍ଡନି ଲେହେଁ କସ୍ତ ତାକି ଡ଼ାହିମାନେ । ୨୩ ☆ସାମା ମାର ମୂଲୁତି ପାଡ଼େୟି ଲେହେଁ ସୁଦୁଜୀଝୁତି ବେଟାଆହାମାନାୟି, ଆତିହିଁ ଜିକେଏ ମାର ମାହାପୁରୁତି ମୀରକା ଇତିହିଁ ଜାହା ଜାହାରା ଆଙ୍ଗାଟି ବାରେଜାଣା ଗେଲ୍‌ପି ଆୟାଲିତାକି କାପୁ କାଚାନା ମା ହିୟାତା ଡ଼ାହି ମାନାୟି । ୨୪ ଏନାଆଁତାକି ଇତିହିଁ ବାସୁଁତି ମାର ଗେଲ୍‌ପି ଆହାମାନାୟି; ସାମା ଏନାୟି ତଞ୍ଜା ଆନାୟି, ଏଦାଆଁତାକି ବାସୁଁ ଇଚିନାୟି ଏଦି ସାତାତି ବାସୁଁ ଆଏ, ଇତିହିଁ ଏନାଆଁ ମେସିମାନାୟି ଏଦାଆଁତାକି ଏନାଆଁତାକି ବାସୁଁ ଇଚିନାୟି ? ୨୫ ସାମା ମାର ଏନାଆଁ ମେସି ହିଲାଆୟି ଏଦାଆଁତାକି ବାସୁଁ ଇଚିନାୟି, ଆତିହିଁ ମାଙ୍ଗେ ସାସାତଲେ କାପୁ କାଃଆନାୟି ମାନେ ।

☆ ୮:୨୩ ୮:୨୩ ୨କର ୫:୨-୪

୨୭ ମାର ବାଡ଼ନ୍ତୁ ହିଲାଆଗାଟାତାୟି, ସାମା ସୁଦୁଜୀଝୁ ମାଙ୍ଗ ସାୟେମି କିୟାନେ; ଏନିକିହିଁ ପ୍ରାତାନା କିନାୟି, ଏଦାଆଁ ମାର ପୁଞ୍ଜାହିଲାଆୟି, ଏଦାଆଁତାକି ସୁଦୁଜୀଝୁ ଜଲିନି ହାଡାତଲେ ମା ତାକି ମାହାପୁରୁଇଁ ଗହାରା କିନେ; ୨୮ ଆମ୍ବାଆସି ମା ହିୟାଁ ବିତ୍ରା ମାନାଣି ପୁନାସି, ଏଞ୍ଜାସି ସୁଦୁଜୀଝୁତି ଅଣ୍ପୁ ଏନାୟି ଏଦାଆଁ ପୁନେସି, ଇତିହିଁ ଏଞ୍ଜାସି ମାହାପୁରୁତି ଅଣ୍ପୁ ତଲେ ମାହାପୁରୁ ଲକୁଡାକି ଗହାରା କିନେସି । ୨୯ ମାର ପୁଞ୍ଜାମାନାୟି, ଆମିନି ଗାଟାରି ମାହାପୁରୁଇଁ ଜୀଝୁ ନନେରି ଇଞ୍ଜାଁ ମାହାପୁରୁତି ଲଡ଼ା ତାକି ବାଟି କିଞ୍ଜି ଆହାମାନେରି, ଏଞ୍ଜାରାକି ବାରେ ନେହାୟି ଆନେ । ୩୦ ଆମ୍ବାଆରାଇଁ ମାହାପୁରୁ ହାଟାମାନେସି, ଏଞ୍ଜାରାକି ତାନି ମୀରଏଣା ଖାଣା ଲେହେଁ ଆହାଲି ତଲିଟିଏ ତାରି କିହାମାନେସି, ଆତିହିଁ ମାହାପୁରୁତି ମୀରଏସି, ଏନିକିହିଁ ଏଞ୍ଜାସି ହାରେକା ତାୟି ତାଙ୍ଗିସ୍ତା କିହାଁ ମୁଲୁ ଜାନାଁ ଆଡାସି ଆନେସି । ୩୧ ଆମ୍ବାଆରାଇଁ ନକେଏ ଆଟାମାତେସି, ଏଞ୍ଜାରାଇଁ ଏଞ୍ଜାସି ହାଟିତେସି, ଏଞ୍ଜାରି ମାହାପୁରୁ ନକିତା ଦାମ୍ବୁଗାଟାରି ଇଞ୍ଜାଁ ତଞ୍ଜି କିତେସି, ଅଡ଼େ ଆମିନି ଗାଟାରାଇଁ ଦାମ୍ବୁଗାଟାରି ଇଞ୍ଜାଁ ତଞ୍ଜି କିତେସି ଏଞ୍ଜାରାଇଁ ଜିକେଏ ଏଞ୍ଜାସି ଗାଝୁରମି କିତେସି ।

### ମାହାପୁରୁତି ଜୀଝୁନନାୟି

୩୨ ଆତିହିଁ ଇ ବାରେତି ମେସାନା ମାର ଏନାଆଁ ଇନାୟି ? ମାହାପୁରୁ ମା ଝାକି ମାଟିସାରେ, ଆମ୍ବାଆସି ମା କପାତଲେ ନିଙ୍ଗିନେସି ? ୩୩ ଆମ୍ବାଆସି ତାନି ମୀରଏଣାଇଁ ଜିକେଏ ଗେଲ୍ପାଆତେସି, ସାମା ମା ବାରେତାକି ଏଞ୍ଜାଣାଇଁ ହେରପିତେସି, ଏଞ୍ଜାସି ଏନିକିହିଁ ଏଞ୍ଜାଣିତଲେ ମାଙ୍ଗେ ଜିକେଏ ବାରେ କାର୍ମାତି ଦାନା ହିୟଅସିକି ? ୩୪ ମାହାପୁରୁ ହାଟାମାନି ଲକୁ କପାତଲେ ଆମ୍ବାଆସି ଦହ ଦସାଲି ଆଡିନେସି ? ଏଞ୍ଜାରି ଦହ ହିଲାଆ ଗାଟାରି ଇଞ୍ଜାଁ ମାହାପୁରୁ ତାନୁଏ ଝେକ୍‌ହା ମାନେସି । ୩୫ ଆମ୍ବାଆସି ତଣ୍ଡ ହାନେସି ? କ୍ରୀସ୍ତ ଜୀସ୍ତ ହାଡାରି ତାଣାଟି ଝେଣ୍ଡେ ନିଙ୍ଗାନା ମାହାପୁରୁତି ଚିଝିନି ଟଟତା ମାଞ୍ଜାନା ମାଙ୍ଗେତାକି ଗହାରା କିହିମାନେସି । ୩୬ ଆତିହିଁ ଆମ୍ବାଆସି ମାଙ୍ଗେ କ୍ରୀସ୍ତ ଜୀଝୁ ନନି ତାଣାଟି ଏଟକା କିୟାନେସି ? ଦୁକୁ, କସ୍ତ, କାକୁଲି



କି କାତାରା, ହାକି, ଏସକି, ସନି କି କାଣ୍ଡା, ଏନାୟି ଜିକେଏ ଏଦାଆଁ କିହାଲି ଆଡେଏ । ୩୭ ସାଢ଼େସ୍ତରିତା ରାସକି ଆହାମାନେ;

“ମିଙ୍ଗେ ତାକି ମାମ୍ବୁ ରୁରେଦିନା ହାକିତି ନକିତା,

ହାହାଲି ହାଜିମାନି ମେଣ୍ଡା ଲେହେଁ ମାମ୍ବୁ ତୁଞ୍ଜା ଆହିମାନମି ।”

୩୭ ଆଡ଼ିଜିକେଏ ଆମ୍ବାଆସି ମାଙ୍ଗେ ଜୀଝୁ ନୟାତେସି, ଏଞ୍ଜାଣି ସାଢ଼େମି ତଲେ ମାରୁ ଛ ବାରେତି ଲାକ ଜୀଣା ଆହାମାନାୟି । ୩୮ ନାନୁ ସାତେଏ ନେହଁ କଁ ପୁଞ୍ଜାମାଲ୍ ତାନି ଜୀଝୁ ନନି ତାଣାଟି ମାର ଏତେଲା ଜିକେଏ ଏଟକା ଆଆୟି, ହାକି କି ଜୀଝୁ, ଲାକପୁରୁତି ଦୂତୁୟାଁ କି ସାଲୁଞ୍ଜି କିହିମାନାଇ କି ବାଡ଼ୁୟାଁ ଗାଟାଇ, ନୀଏଁ କି ଖାନି ଦିନା କି ଏନି ବାଡ଼ୁୟାଁ, ୩୯ ଲାକପୁରୁତି କାତା କି ତୁଇପୁରୁତି କାତା ଏନାୟି ଜିକେଏ; ବାରେ ଗାଡ଼ିଆଡ଼ି ଦିଶସୁ ପ୍ରବୁ କ୍ରୀସୁ ଜୀସୁ ତାଣାଟି ତଞ୍ଜାଆହାମାନି ମାହାପୁରୁତି ଜୀଝୁ ନନି ତାଣାଟି ମାଙ୍ଗେ ଏଟକା କିୟାନେ ।

### ୯

#### ମାହାପୁରୁ ଅଡ଼େ ତାନି ଲକୁ

୧ ନାନୁ କ୍ରୀସୁତି ଲକୁ ଆହାମାନାକି ସାତା ଝେସିମାଲ୍, ମିତି ଝେସିହିଲଅଁ । ସୁଦୁଜୀଝୁତି ସେଡନା ହାନାଣି ତଲେ ନା ଅଶ୍ପୁ ଇଦାଣିତି ସାକି । ୨ ନାନୁ ଏଚେକା ଦୁକୁ ଅଡ଼େ କସ୍ତତଲେ ନା ହିୟାତା ଏଚେକା ବଦୁ ଆହାମାନେ, ଇଦାଆଁ ନାଡ଼ିକିହାଁ ଝେସିହିଲଅଁ । ୩ ନା ଜାହାରା କୂଡ଼ାତି ତାୟିୟାଁକି ନାନୁ କ୍ରୀସୁ ତାଣାଟି ଏଟକା ଆହାନା ମାହାପୁରୁ ତାଣାଟି ବାକା ବେଟାଆହାଲି ନା ଅଶ୍ପୁ, ଇତିହଁ ଏଞ୍ଜାରି ମାହାପୁରୁତି ଲକୁ । ୪ ଏନାଆଁତାକି ଇତିହଁ ଏଞ୍ଜାରି ଇସାୟେଲ ଲକୁ; ତାନି ମୀରକା ଲେହେଁ ଆବାନା ଏଞ୍ଜାରି ନକିତା ତାନି ଗାଝୁରମି ତସାମାଚେସି; ଏଞ୍ଜାରିତଲେ ରାଜିମାନା ଆହାନା ଏଞ୍ଜାରାକି ମେରା ହୀହାମାଚେସି, ଏଞ୍ଜାରି ସାତା ତଲେ ସେବା କିନାରି; ଏଞ୍ଜାରି ମାହାପୁରୁ ତାଣାଟି ଆଞ୍ଜାମାନାଣି ବେଟାଆହାମାନେରି; ୫ ଏଞ୍ଜାରି ବାରେଜାଣା ଝେଙ୍ଗାମାନି ଆକୁ ଆବାୟାଁତି ମୀରକା ଇଞ୍ଜା ମାଶ୍ସି ଖାଣାଟି କ୍ରୀସୁ ଏଞ୍ଜାରି ତାଣାଟି ଜାର୍ନା ଆହାମାଚେସି; ବାରେ ଅଦିକାରାଗାଟି ମାହାପୁରୁକି କାଲାକାଲାତାକି ଜହରା ଆପେ । ଆମେନ ।

୬ ମାହାପୁରୁତି ବନ୍ଧୁ ଉଦ୍ଦେଶ୍ୟ ଆହ୍ୱାନାନେ ଇଞ୍ଜି ନାନୁ  
 ଝେସିହିଲଅଁ, ଇତିହିଁ ଇସ୍ରାୟେଲ କୃତାତି ବାରେ ଲକୁ ମାହାପୁରୁତି  
 ଲକୁ ଆଏ, ୭ ଅବ୍ରାହାମ କୃତାତି ବାରେ ଲକୁ ମାହାପୁରୁ ମୀରକା  
 ମାସ୍କା ଏଡ଼ି ଆଏ; ମାହାପୁରୁ ଅବ୍ରାହାମଇଁ ଝେସାମାଚେସି,  
 “ଇସାହାକ ତାଣାଟି ନୀ କୃତା ଝେଙ୍ଗିନେରି ।” ୮ ଇଦାଣି କାତା  
 ଇଦି, ମାଣ୍ସି ମୀରକା ମାସ୍କା ମାହାପୁରୁ ମୀରକା ମାସ୍କା ଆହାଲି  
 ଆଡ଼ଅରି, ମାହାପୁରୁତି ଆଞ୍ଜାମାନି ଲେହେଁ ଜାର୍ନୀ ଆହାମାନି ମୀରକା  
 ମାସ୍କା ମାହାପୁରୁ ନକିତା ସାତା ମୀରକା ମାସ୍କା ଲେହେଁ ଆନେରି  
 । ୯ ମାହାପୁରୁ ଇଦାଆଁ ଆଞ୍ଜାମାଚେସି, “ଇ କାଲମିତା ମାମ୍ବୁ ଝେଞ୍ଜେ  
 ଖାନମି, ଏଚିବେଲତା ସାରା ର ମୀରକାଣାଇଁ ଜାର୍ନୀ କିହାମାଣ୍ସିନେ  
 ।” ୧୦ ଅଡ଼େ ଖାରଇ ଏଚେକା ଆଏ, ରିବିକାନି ତାଣା ଜିକେଏ  
 ଜାଣ୍ଡା ମୀରକା ର ତାଞ୍ଜି ଇସାହାକ ତାଣାଟି ଜାର୍ନୀ ଆହାମାଚେରି,  
 ୧୧ ଏଞ୍ଜାରି ଜାର୍ନୀ ଆନି ନଚେଏ, ଅଡ଼େ ଏଞ୍ଜାରି ନେହାଁଣି ଲାଗେଏତାଣି  
 କିନି ନଚେଏ, ଇଞ୍ଜାରି ବିତ୍ରାଟି ରଅସି ମାହାପୁରୁ ଲଡ଼ା ତାକି  
 ବାଟି କିଞ୍ଜିଆଡ଼େସି, ୧୨ ରିବିକାଇଁ ମାହାପୁରୁ ଏଲେଇଞ୍ଜାମାଚେସି,  
 “କାଜା ତାୟି ଉଣା ତାୟିତି ସେବା କିନେସି ।” ମାହାପୁରୁ ଏଦାଆଁ  
 ଝେସାମାଚେସି ଏଞ୍ଜାରି କାମା କିତି ତାଣାଟି ଆଏ, ଖାରଇ ମାହାପୁରୁ  
 ଆଡ଼ିତାକି ଏଞ୍ଜାରି ହାଟୁକି ଆଡ଼େରି । ୧୩ ସାପ୍ତେରିତା ରାସ୍କି  
 ଆହାମାନେ, “ନାନୁ ଜାକୁବଇଁ ଜୀଞ୍ଜୁ ନଡ଼େଏଁ, ସାମା ଏସାଞ୍ଜୁଇଁ  
 ଅପାଆଡ଼େଏଁ ।”

୧୪ ଆଡ଼ିହିଁ ଏଦାଆଁ ଇନାୟି, ମାହାପୁରୁ ଲାଗେଏତି କାମାକିନାସି  
 କି ? ଏଡ଼ି ଏଚେଲା ଜିକେଏ ଆଆପେ । ୧୫ ଏଦାଆଁତାକି ମସାଇଁ  
 ଏଲେଇଚେସି, “ଆମ୍ବାଆରାଇଁ ନା କାର୍ମା ଆନାୟି ମାନେ ଏଞ୍ଜାଣାଇଁ  
 କାର୍ମା ଆଇଁ, ଆମ୍ବାଆରାଇଁ ସାୟେମି କିନାୟିମାନେ ଏଞ୍ଜାଣାଇଁ ନାନୁ  
 ସାୟେମି କଇଁ ।” ୧୬ ଏଦାଆଁତାକି ଆମ୍ବାଆସି ମନ କିନେସି, ଆଆଡ଼  
 ଆମ୍ବାଆସି ପାରିନାସି କି କିନାସି, ଏଞ୍ଜାଣି ତାଣାଟି ଏନାୟି ଆହାଲି  
 ଆଡ଼େଏ, ସାମା କାର୍ମାମେହନି ମାହାପୁରୁ ତାଣାଟି ଆନେ । ୧୭ ଦାମ୍ବୁ  
 ସାପ୍ତେରିତା ରାସ୍କି ଆହାମାନି ଲେହେଁ, ମାହାପୁରୁ ମିସରତି ରାଜା  
 ପାରଇଁ ଏଲେଇଚେସି, “ନୀ ତାଣାଟି ନା ବାଡ଼ୟୁ ତସାଲି ଇଞ୍ଜା ବାରେ

ଦାର୍ତ୍ତତା ନା ଗାଝୁରମି ତସାଲି ତାକି ନାନୁ ନିଙ୍ଗେ ରାଜା କିହାମାଞ୍ଜାଇଁ ।” ୧୮ ଏଦାଆଁତାକି ମାହାପୁରୁତି ଅଣ୍ଟପୁ ଲେହେଁ ଆମ୍ବାଆରାଇଁ କାର୍ମା ମେହ୍ନେସି ଇଞ୍ଜା ଆମ୍ବାଆରାଇଁ ଆଟ୍ଝା ହିୟାଁ କିନେସି ।

### ମାହାପୁରୁତି କାର୍ବି ଇଞ୍ଜା କାର୍ମାମେହ୍ନାୟି

୧୯ ଏମ୍ବାଟିଏ ନାନୁ ନାଙ୍ଗେ ଏଲେଇଞ୍ଜାଦି, “ମାହାପୁରୁ ଏନାଆଁତାକି ଦହ ଆହ୍ନେସି ? ଆମ୍ବାଆସି ମାହାପୁରୁତି କପାତଲେ ଏନାଆଁ କିହାଲି ଆଡ଼ିମାନେସି ?” ୨୦ ସାମା ଏ ସୟି, ନାନୁ ଆମ୍ବାଆତି, ମାହାପୁରୁଇଁ ଝେଣ୍ଡେ ଝେସାଲି ନିଙ୍ଗେ ସାସା ମାନେକି, ଗାଡ଼ି ଆଡ଼ି ଆସ୍ତି ଗାଡ଼ି କିତାଣାଇଁ “ନାଙ୍ଗେ ଏନାଆଁତାକି ଇଲେକ୍ ଗାଡ଼ି କିୟାତି ଇଞ୍ଜା ଏଲେଇଞ୍ଜାଲି ଆଡ଼ିନେ କି ?” ୨୧ ର ଇରଥା ତେପଲାଟି ଜାହାରା ଇତା ତଲେ ଡକା କେପାଲି କୁମ୍ପେ ଏଣାକି ବାରେ ଅଦିକାରା ମାନେ, ରଣ୍ଡାଆଁ ବାରେ କାମାତି ଦିନାତା ଲେମ୍ବାଲି ଅଡ଼େ ରଣ୍ଡାଆଁ ଉଜେଏ ଦିନାତା ଲେମ୍ବାଲି ତାକି ।

୨୨ ମାହାପୁରୁ ଜିକେଏ ଏଲେକ୍ କିହାମାନେସି, ତାନି କାର୍ବି ତସାଲି ଇଞ୍ଜା ବାଡ଼ୟୁତି ପୁଣ୍ଡି କିହାଲି ଅଣ୍ଟପିମାତେସି, ସାମା ଆମିନି ଗାଟାରି ଏଞ୍ଜାଣି କପାତଲେ ନାସା ଆନାୟି ମାତେ, ଏଞ୍ଜାରି ତାକି ମାହାପୁରୁ ହାରେକା କାର୍ମା ଆହ୍ନାନା ଅରହା ମାନେସି । ୨୩ ଅଡ଼େ ଗାଝୁରମି ତାକି ତାନିତାଣାଟି ନକେଏ ଆହ୍ନାନି ସାୟେମିତି ଲକୁ ମାର ଇତିହ୍, ମା ତାଣା ତାନି ଗାଝୁରମିତି ଦନ ତସାଲି କିହାମାନେସି, ଆତିହ୍ ନାନୁ ଏନାଆଁ ଇଞ୍ଜା ? ୨୪ ଏଦାଆଁତାକି ଏଞ୍ଜାସି ଝାରଇ ଜୀହୁଦି ଲକୁ ତାଣାଟି ମାଙ୍ଗେ ହାଟା ମାଞ୍ଜଅସି, ସାମା ଜୀହୁଦିଆଆତି ଲକୁ ତାଣାଟି ଜିକେଏ ମାଙ୍ଗେ ହାଟାମାଞ୍ଜାନେସି, ୨୫ ଇ କାତାତି ହସେୟ ପତିତା ମାହାପୁରୁ ଝେସାମାନେସି;

“ଆମ୍ବାଆରି ମା ଲକୁ ହିଲାଆତେରି, ଏଞ୍ଜାରାଇଁ ‘ମା ଲକୁ’ ଲେହେଁ ହାଟା କଡ଼ିତମି;

ଆମିନି କୁଡ଼ାତାରାଇଁ ଜୀଝୁ ନହାଁ ହିଲାଆତମି ଏଞ୍ଜାରାଇଁ ମା ‘ଜୀଝୁତି ଲକୁ’ ଇତମି,

୨୬ ଆମିନି ଟାୟୁତା ଏଞ୍ଜାରାଇଁ ଝେସାମାତମି, ‘ମୀରୁ ମା ଲକୁ ଆଏ’

ଏଦାଆଁ ଏଞ୍ଜାରି ଜୀଞ୍ଜୁଗାଟି ମାହାପୁରୁତି ମୀରକା ଇଞ୍ଜୁଁ ଝେଞ୍ଜିନେରି

୧୭ ଇଞ୍ଜା ଇସ୍ରାୟେଲ ଲକୁତି କାତା ଜିସାୟ କାଜା ଗିୟାତଲେ  
ଝେସାମାନେସି, “ଇସ୍ରାୟେଲତି ଲକୁ ସାମଦୁରିତି ଏଜିକିହାଲି  
ଆଡାଆଗାଟି ବାଃଲି ଲେହେଁ ଆତିହୁଁ ଜିକେଏ, ଏଞ୍ଜାରି ବିତ୍ରାଟି  
ଏଚର ଜାଣାଦେଁ ଗେଲ୍ପି ଆନେରି; ୨୮ ଏନାଆଁତାକି ଇତିହୁଁ ପ୍ରବୁ  
ତବେ ଦାରତିତା ବାରେ ନୀହାଁୟି ବିଚାରା କିନେସି ।” ୨୯ ଏନିକିହୁଁ  
ଜିସାୟ ତଲିଏ ଅଡେ ଝେସାମାଚେସି, “ବାରେ ବାଡ଼ୟୁ ଗାଟି ପ୍ରବୁ  
ଏଚେକା ମା କୁଡାତି ଲକୁଣି ଗେଲ୍ପାଆତିମାଁ, ସଦମ ଅଡେ ଗମରାତି  
ଲକୁଲେହେଁ ମାଢେ ଜିକେଏ ଆୟାତେମା ।”

**ପାଞ୍ଜୁଲ ଇସ୍ରାୟେଲ ତାକି ପ୍ରାତାନା**

୩୦ ଏଦାଆଁତାକି ଜୀହୁଦିଆଆତି ଲକୁତି କାତାତା ଇଲେ ଇଞ୍ଜାଲି  
ଆଡିନାୟି, ଏଞ୍ଜାରି ଦାମ୍ବୁଗାଟାରି ଆହାଲି ଅଣପି ହିଲାଆତେରି, ସାମା  
ଏଞ୍ଜାରି ନାମୁ ତାକି ଦାମ୍ବୁଗାଟାରି ଆଡେରି । ୩୧ ସାମା ଇସ୍ରାୟେଲ ଲକୁ  
ଦାମ୍ବୁଗାଟାରି ଆହାଲି ଅଣପାନା ମେରା ତଲେ ଦାମ୍ବୁଗାଟାରି ଆହାଲି  
ଆଡାଆତେରି । ୩୨ ଏନାଆଁତାକି ? ଇତିହୁଁ ଏଞ୍ଜାରି ନାମୁତଲେ  
ଏଦାଆଁ ପାରାଆନା, କାମା ତଲେ ପାରିମାଚେରି । ଏଦାଆଁତାକି  
ଏଞ୍ଜାରି ଆଞ୍ଜିମାନି ଖାଲିତା ପୁଟି କିହାନା ତରଗିତେରି । ୩୩ ସାସ୍ତେରିତା  
ରାସ୍ତକି ଆହାମାନେ;

“ସିନିକିଦୁ, ମାମ୍ବୁ ସୁୟନତା ର ପୁଟିକିନି କଟା ଖାଲି

ଇଞ୍ଜା ଆଞ୍ଜିନି ପାକା ଖାଲି କେପାମାନମି,  
ଆମ୍ବାଆସି ଏଞ୍ଜାଣି ତାଣା ନାମିନେସି ଏଞ୍ଜାସି ଲାଜା ବେଟାଆଅସି ।”

**୧୦**

୧ ଏ ତାୟି ତାଞ୍ଜିସ୍ତାତେରି, ମା ଲକୁ ଏନିକିହୁଁ ଗେଲ୍ପି ଆନେରି,  
ଏଡି ନା ହିୟାତି ଅଣପୁ, ଇଞ୍ଜା ଏଞ୍ଜାରି ତାକି ମାହାପୁରୁ ତାଣା ରଣ୍ଡିଏ  
ଅଣପୁ ତଲେ ନା ପ୍ରାତାନା । ୨ ଇତିହୁଁ ମାହାପୁରୁ ସେବା କିହାଲି  
ଏଞ୍ଜାରାକି ହାରେକା ମନ ଅଡେ ରାହାଁ ମାନେ, ଇଦାଆଁ ନାନୁ ଏଞ୍ଜାରି  
ଞ୍ଜାକିଟି ଝେସିମାଢ୍, ସାମା ଏ ମନ ଅଡେ ରାହାଁ ବୁଦିଗାଟାୟି ଆଏ ।  
୩ ମାହାପୁରୁ ହାତି ଦାମ୍ବୁତି ଜିରୁ ପୁନାଆନା ଜାହାରା ତୀରି କିହାମାନି

ଦାର୍ମୁତି ଜିରୁଟି ତାକାନା ମାହାପୁରୁ ହୀତି ଦାର୍ମୁତି ଜିରୁଟି ଆସିହିଲଅରି । ୪ କ୍ରୀସ୍ତ ଫେରାତି ରାପ୍ନାସି, ଝାରୁଇ ଏଝାଣି ତାଣା ନାମିସାରେ ମାଣସି ମାହାପୁରୁ ନକିତା ଦାର୍ମୁଗାଟାସି ଆନେସି ।

**ବାରେ ଜାଣାକି ଗେଲ୍ପି ଆନାୟି**

୫ ମସା ରାତାମାନେସି, “ଆମିନି ମାଣସି ଫେରା ମାନି କିହାନା ଦାର୍ମୁଗାଟାସି ଆନେସି, ଏଝାସି ଏମ୍ପାଟି ନୀତିନେସି ।” ୬ ସାମା ନାମୁତଲେ ଦାର୍ମୁ ଗାଟାତାୟି ଆନାୟି ଇଞ୍ଜିଁ ସାସ୍ତେରିତା ରାସ୍କି ଆହାମାନେ, “କ୍ରୀସ୍ତୁଇଁ ରେପ୍ନା ତାଚାଲି ତାକି ଆମ୍ପାଆସି ଲାକପୁରୁ ହାଜାଲି ଆଡିନେସି ?” ମୀରୁ ଇ କାତା ଏଲେଇନାଆଦୁ । ୭ ଇଞ୍ଜିଁ “କ୍ରୀସ୍ତୁଇଁ ହାଡାରି ତାଣାଟି ନିକ୍ହା ତାଚାଲି, ଆମ୍ପାଆସି ତାଡେପୁରୁ ହାନେସି ? ଇ କାତା ଜିକେଏ ମୀରୁ ଏଲେଇନାଆଦୁ ।” ୮ ଏନାଆତାକି ଇଚିହିଁ ସାସ୍ତେରିତା ରାସ୍କି ଆହାମାନି ଲେହେଁ, “ମାହାପୁରୁଟି ବଲୁ ମୀ ତାଣା ମାନେ, ଅଡେ ମୀ ଗୁତି ଇଞ୍ଜିଁ ହିୟାତା ମାନେ, ଆମିନି ନାମୁତି ବଲୁ ମାମ୍ପୁ ଝେକ୍‌ହି ମାନମି, ଏ ବଲୁ ।” ୯ ମୀରୁ ଜୀସୁଇଁ ଗୁତି ତଲେ ପ୍ରୁ ଇଞ୍ଜିଁ ଜଲିଦେରି, ଇଞ୍ଜିଁ ମାହାପୁରୁ ଏଝାଣାଇଁ ହାଡାରି ତାଣାଟି ନିକ୍ହାମାନେସି ଇଞ୍ଜିଁ ହିୟାଁ ତଲେ ନାମିସାରେ, ଆତିହିଁ ମୀରୁ ଗେଲ୍ପି ଆଦେରି; ୧୦ ଇଚିହିଁ ଦାର୍ମୁଗାଟି ଲକୁ ଆହାଲି ମାଣସି ହିୟାଁ ତଲେ ନାମିନେସି, ଇଞ୍ଜିଁ ଗେଲ୍ପି ଆହାଲି ଗୁତି ତଲେ ଜଲିନେସି । ୧୧ ଦାର୍ମୁ ସାସ୍ତେରିତା ରାସ୍କି ଆହାମାନେ, “ଆମ୍ପାଆସି ଜିକେଏ ତାନି ତାଣା ନାମିନେସି, ଏଝାସି ଲାଜା ବେଟାଆଆସି ।” ୧୨ ଜୀହୁଦି ଇଞ୍ଜିଁ ଜୀହୁଦିଆଆତାରି ବିତ୍ରା ପାରଡା ବାଚି କିନାୟି ହିଲେଏ; ବାରେଜାଣା ତାକି ରଣ୍ଡିଏ ପ୍ରୁ, ଏଚେକା ଲକୁ ଏଝାଣି ତାଣା ପ୍ରାତାନା କିନେରି, ବାରେ ଜାଣାକି ଏ କାର୍ମାମେହନାୟି ଆନେ । ୧୩ “ଆମ୍ପାଆସି ପ୍ରୁ ଦରୁ ଆସାନା ପ୍ରାତାନା କିନେସି, ଏଝାସି ଗେଲ୍ପି ଆନେସି ।”

୧୪ ସାମା ଆମ୍ପାଆରାଇଁ ନାମା ହିଲଅରି ଏନିକିହିଁ ଏଝାରି ଏଝାଣି ତାଣା ପ୍ରାତାନା କିନେରି ? ଇଞ୍ଜିଁ ଏଝାଣି ନେହିଁ ବଲୁ ଝେନାଆନା ଏଝାରି ଏନିକିହିଁ ନାମିନେରି ? ଝେକ୍‌ନାରି ଝେକ୍‌ଆସାରେ ଏ ବଲୁ ଏଝାରି ଏନିକିହିଁ ଝେନେରି ? ୧୫ ଅଡେ ବଲୁ ଝେକ୍‌ହାଲି ତାକି ପାଣ୍ଡୁଝି ଆଆସାରେ ରଅସି ଏନିକିହିଁ ବଲୁ ଝେକ୍‌ନେସି ? ଇ କାତା

ସାଢ଼ସ୍ତରିତା ରାସ୍ତକି ଆହ୍ୱାମାନେ, “ଆମିନି ଗାଟାରି ନେହୁଁ ବଲୁତି କାରୁ ତାନେରି ଏଞ୍ଜାରି କତାୟାଁ ଏଚେକା ଅଜ୍ଞିତାଇ !” ୧୭ ସାମା ବାରେଜାଣା ଏ ନେହୁଁ ବଲୁ ଆବା ହିଲଅରି, ଏଦାଆଁତାକି ଜିସାୟ ଏଲେଇଞ୍ଜି ମାନେସି, “ପ୍ରବୁ ମା ହାଡ଼ା ଖେଞ୍ଜାନା ଆମ୍ବାଆସି ନାମା ମାନେସି ?” ୧୭ ଏନିଇଚିହୁଁ ନାମୁ ଖେନି ତାଣାଟି ଖାରେ, ଅଡ଼େ ଖେନାୟି କ୍ରାସ୍ତତି ନେହୁଁ ବଲୁଟି ।

୧୮ ସାମା ନାମୁ ଏଲେଇଇଁ, ଏଞ୍ଜାରି ଏନାଆଁ ଏ ବଲୁ ଖେଞ୍ଜାହିଲଅରି କି ? ଖେଞ୍ଜାମାନେରି, ଏନାଆଁତାକି ଇଚିହୁଁ ସାଢ଼ସ୍ତରିତା ରାସ୍ତକି ଆହ୍ୱାମାନେ;

“ଏଞ୍ଜାରି ହାଡ଼ା ବାରେ ଦାର୍ତ୍ତିତା ଖେଞ୍ଜାମାନେ,  
ଏଞ୍ଜାରି କାତା ବାରେ ଦାର୍ତ୍ତି ମୁଟ୍‌ପୁଲି ପାତେକା ଖେଞ୍ଜାମାନେ  
।”

୧୯ ଅଡ଼େ ର ଦେବା ନାମୁ ଖେଞ୍ଜାଲି ଅଣପିମାଇଁ, ଇସାୟେଲ ଲକୁ ଏଦାଆଁ ତେଲୁହାଲି ଆଡ଼ାଆତେରି କି ? ହାରେକା ବାର୍ଯ୍ୟା ନଡ଼େକଏ ମସା ଇ କାତା ଖେସାମାନେସି,

“ମା ଲକୁଣି କାର୍ବି କିହାଲିତାକି ର ଉଣା କୃଡ଼ାତି ଲେମ୍ବିନମି,  
ଏଲେକିହୁଁ ଏ ରୁଦି ହିଲୀଆଗାଟି କୃଡ଼ା ତଲେ ଏଞ୍ଜାରାଇଁ  
କାର୍ବି କିଞ୍ଜି କିନମି ।”

୨୦ ଅଡ଼େ ଜିସାୟ ସାସାତଲେ ଖେସାମାନେସି,

“ଆମିନି ଗାଟାରି ମାଞ୍ଜେ ପାରିମାଞ୍ଜାଆତେରି, ଏ ଲକୁ ମାଞ୍ଜେ  
ବେଟାଆୟାତେରି;

ଆମିନି ଗାଟାରି ମା କାତା ଖେଞ୍ଜିମାଞ୍ଜାଆତେରି, ଏଞ୍ଜାରି ନକିତା  
ମାମୁ ତୁଞ୍ଜାଆଡ଼ମି ।”

୨୧ ସାମା ଏଞ୍ଜାସି ଇସାୟେଲ ଲକୁତି କାତା ଖେସାମାନେସି, “ର ମାନି  
କିଆନା ନା କପାଟି ନିଜିନି କୃଡ଼ାତି ନାମୁ ଖେଡ଼ା ତୁଗ୍ୱେ କେୟୁ ଦାସା  
ମାଇଁ ।”

## ୧୧

ଇସାୟେଲ ଲକୁଣି ମାହାପୁରୁତି କାର୍ମା

୧ \* ଅଡ଼େ ନାନୁ ଖେଞ୍ଜାଲି ଆଡ଼ିଇଁ, ଆଡ଼ିହିଁ ମାହାପୁରୁ ତାନି ଲକୁଣି ପିସାମାନେସି କି ? ଏଲେଆହିଁ ଏଚେଲା ଜିକେଏ ଆଆପେ, ଏନାଆଁତାକି ଇଚିହିଁ ନାନୁ ଜିକେଏ ଅବ୍ରାହାମତି କୃତାତା ଜାର୍ନାଆଡ଼ି ବିନ୍ୟାମିନ୍ ଗଚିତି ଇସ୍ରାୟେଲ ଲକୁତେଏ । ୨ ମାହାପୁରୁ ତଲିଚିଏ ବାଚି କିହାଁ ହାଟାମାନି ତାନି ଲକୁଣି ଏଚେଲା ଜିକେଏ ପିସାହିଲଅସି, ମୀରୁ ଦାମ୍ନୁ ସାସ୍ତେରିତା ପଡ଼଼ି ଆହାହିଲଅତେରି ? ଏନିକିହିଁ ଏଲିୟ ମାହାପୁରୁ ନକିତା ଇସ୍ରାୟେଲ ଲକୁ କପାତଲେ କାତା ଜଲ୍ଲାମାଚେସି, ୩ “ପୁରୁ ଏଝାରି ମାହାପୁରୁ ଅଶ୍ପୁତି ବଲୁ ଖେହ୍ନାରାଇଁ ଏନିକିହିଁ ପାୟାମାନେରି ଇଞ୍ଜା ପୂଜା ପିଣ୍ଡାଣି ତିକହାନା ନାସ଼ି କିହାମାନେରି, ଝାରଇ ନାନୁ ରଅତେଏଁ ଗେଲ୍ପି ଆହାମାଇଁ; ଏଝାରି ନା ଜୀଝୁ ଜିକେଏ ଅହାଲି ଅଶ୍ପିମାଞ୍ଜାନେରି ।” ୪ ଏଲିୟଇଁ ମାହାପୁରୁ ଖେଣ୍ଡେ ଏନାଆଁ ଏଲେଇଚେସି, “ନାଡ଼ିକିନି ବାଲ୍ ପେନୁ, ପୂତଲା ନକିତା ମେଣ୍ଡା କୁତା ହିଲଅରି ଇଲେତି ସାତା ମାଣା ଲକୁଣି ମାଞ୍ଜେତାକି ଇଟାମାନମି ।” ୫ ଏଲେକିହିଁ ଏ ନୀଏଁ ଜିକେଏ କାର୍ମାମେସାନା ଆଟାମାଚେସି, ଏଝାରି ବିତ୍ରାଚି ଏଚର ଜାଣାଦେଁ ମାନେରି । ୬ ସାମା ତାନି କାର୍ମାମେହ୍ନି ତାଣାଚି ଆଡ଼ିହିଁ, ଏଡ଼ି କାମାଲଡ଼ା ତାକି ଆହାଲି ଆଡ଼େଏ; ଇଞ୍ଜା ତାନି କାର୍ମାମେହ୍ନାୟି ସାତା ତଲେ କାର୍ମାମେହ୍ନାୟି ଆଏ ।

୭ ଆଡ଼ିହିଁ ଏନାଆଁ ଆଡ଼େ ? ଇସ୍ରାୟେଲତି ଲକୁ ଏନାଆଁ ପାରିମାଚେରି, ଏଦାଆଁ ବେଟାଆଆତେରି; ଝାରଇ ମାହାପୁରୁ ଆଟାମାନି ଏଚରଜାଣା ଲକୁ ଏଦାଆଁ ବେଟାଆଡ଼େରି, ଏଟକାତାରି ଆମ୍ବାଆରି ଜିକେଏ ମାହାପୁରୁ ହାଟାମାନାଣି ମନ ହାଆତେରି । ୮ ସାସ୍ତେରିତା ରାସ୍ତକି ଆହାମାନେ, “ମାହାପୁରୁ ନୀଞ୍ଜୁପାତେକା ଏଝାରାକି ଆଟ୍ଝା ଜୀଝୁ ହୀହାମାନେସି, ଅଡ଼େ ଇଲେତି କାଶକା ହୀହାମାନେସି, ଏନିକିହିଁ ଏଝାରି ମେସାଲି ଆଡ଼ି ହିଲଅରି, ଅଡ଼େ ଇଲେତି କୀର୍କା ହୀହାମାନେସି ଏଝାରି ଖେଞ୍ଜାଲି ଆଡ଼ିହିଲଅରି ।”

୯ ଏଝାରି କାତା ଦାଝୁଦ ରାଟାମାନେସି,

“ଏଝାରି ପାରୁଡ଼ି ରାନ୍ଦା ତିନା ଉନାଚି ପାନ୍ଦାତା ରିପାରି,  
ଏଝାରି ତରଗାନା ତଣ୍ଡୁ ବେଟାଆପେରି ।

☆ ୧୧:୧ ୧୧:୧ ପିଲିପି ୩:୫

୧୦ ଏଞ୍ଜାରି ଏନିକିମ୍ ମେସାଲି ଆଡ଼ଅରି, ଏଦାଆଁତାକି ଏଞ୍ଜାରି କାଣାୟା  
ଆପେରି,  
କାଲେଏ ଦୁକୁ କସ୍ତ ବେଟାଆହାନା ଏଞ୍ଜାରି ଟେଡେଲି ଚୁଡୁଞ୍ଜା  
ଆପେ ।”

୧୧ ନାନୁ ଏଲେ ଇଞ୍ଜିମାଲ୍, ଏଞ୍ଜାରି ନାସକ୍ତି ଆହାଲି ପୁଟି କିହା  
ମାନେରି କି ? ଆଏ ଏଚେଲ୍ଲା ଜିକେଏ ଆଆପେ, ସାମା ଏଞ୍ଜାରି ପାପୁ  
କିତାକି, ଏଞ୍ଜାରାଇଁ କାର୍ବି କିହାଲିତାକି ଜୀହୁଦିଆଆତାରି ନକିତା  
ଗେଲ୍ପିଆନି ଅଦିକାରା ମେଡାଆଡେ । ୧୨ ଜୀହୁଦି ଲକୁଡି ପାପୁ  
ଦାର୍ଡିତି ବାରେ ଲକୁଡାକି ହାରେକା ବାଡକୁ ଲେହେଁ ଆହାମାନେ,  
ଜୀହୁଦି ଲକୁ ରିତାକି ଜୀହୁଦିଆଆତି ଲକୁଡାକି ବର ହାରେଏ ଗାଡି  
ଲାବା କିହାମାନେରି, ଇଞ୍ଜା ବାରେ ଜୀହୁଦି କୁଡା ଗେଲ୍ପି ଆଡିହୁଁମା  
ଏମ୍ପାଟି ଏଚେକା ଗାଡି ବର ବେଟାଆଅରି !

### ଜୀହୁଦିଆଆତାରି ଗେଲ୍ପି ଆନାୟି

୧୩ ଜୀହୁଦିଆଆତି ଲକୁଣି ନାନୁ ଏଲେ ଇଞ୍ଜିମାଲ୍, ନାନୁ  
ଜୀହୁଦିଆଆତି ଲକୁଡାକି ପାଣ୍ଡୁଞ୍ଜି ଆହାମାନାକି ନା ସେବା କାମାତି  
ପାଣା ତାକି ନାନୁ ବଡପଣ ଆହିମାଲ୍ । ୧୪ ଏନିକିହୁଁ ଆପେ ଜାହାରା  
କୁଡାତି ଲକୁଣି ରାହାଁ କିଞ୍ଜିକିହାନା ଏଞ୍ଜାରି ତାଣାଟି ଏଚର ଜାଣାଇଁ  
ଗେଲ୍ପାଲି ଆଡିଲ୍ । ୧୫ ଏନାଆଁତାକି ଇଚିହୁଁ ଏଞ୍ଜାରି ପିସ୍ପିଆଡାକି  
ଦାର୍ଡି ତଣେ ଆଡେ । ଆଡିହୁଁ, ମାହାପୁରୁ ବାରେ ଜୀହୁଦି କୁଡାତି  
ଆବିସାରେ, ଏଦାଆଁତି ପାଡେୟି ଏନାଆଁ ଆନେ ? ଏଦି ହାଡି ମାଣ୍ଡି  
ଜୀଞ୍ଜୁ ବେଟାଆଡି ଲେହେଁ ।

୧୬ ରଚାଣି ରୁଟି ମାହାପୁରୁ ଦରୁତଲେ ହେରପି ଆହାମାଚିହୁଁ,  
ବାରେ ରୁଟି ଜିକେଏ ହେରପି ଆହାମାନେ ଇଞ୍ଜୁଁ ଇନାୟି; ର  
ମାର୍ନୁଡି ହୀରୁ ହେରପି ଆହାମାଚିହୁଁ, ଏଦାଣି କମା କାନ୍ଦି ଜିକେଏ  
ହେରପି ଆହାମାନୁ ଇଞ୍ଜୁଁ ଅଣ୍ଡିନାୟି । ୧୭ ସାମା ଏଚେକା  
କମାୟା ରାଡପି ଆଡୁ ଅଡେ ମୀରୁ ଜାଡାତି ଜୀତ ମାର୍ନୁଡି କମାୟା  
ଆଡିଜିକେଏ ଏ ବିଡ୍ରା ଦୁସ୍ପିଆଡେରି, ଅଡେ ଏଞ୍ଜାରିତଲେ ଜୀତ  
ମାର୍ନୁଡି ତାକିତି ରାସାତା ଆଣ୍ଡିତେରି । ୧୮ ଆଡିହୁଁ ଏ କମାୟା  
କପାତଲେ ବଡପଣ ଆଆଦୁ; ସାମା ମୀରୁ ବଡପଣ କିଦେରି,



ମୀରୁ ମାର୍‌ନୁତି ତାକିତି ଆସା ହିଲଅତେରି, ସାମା ତାକି ମିଙ୍ଗେ ଆସାମାଞ୍ଜାନେ, ଇଦାଆଁ ମୀରୁ ପୁଞ୍ଜା ଡୟାଦୁ ।

୧୯ ଆତିହିଁ ମୀରୁ ଏଲେଇଞ୍ଜାଲି ଆଡ଼ିଦେରି, “ନାଙ୍ଗେ ଟାୟୁ ହୀହାନା ଦୁରସାଲି ତାକି ଏ କମାଣି ରାଡ଼ପି ଆହାମାରୁ ।” ୨୦ ଏଡ଼ି ସାତା, ଏଞ୍ଜାରି ନାମାଆଲିଏ ରାଡ଼ପି ଆଡେରି, ମୀରୁ ୱାରୁଇ ନାମାଲିଏ ଏ ଟାୟୁ ଅଦିକାରା କିହାମାଞ୍ଜେରି, ସାମା ବତପଣ ଆଆନା ଆଜାଦୁ; ୨୧ ମାର୍‌ନୁତା ଗାଲୁହାମାନି କମାୟାଁ ଲେହେଁ ଜୀହୁଦି ଲକୁଣି ମାହାପୁରୁ ତଣ୍ଡ ହୀଆନା ପିସାହିଲଅସି ଇତିସାରେ, ଏଞ୍ଜାସି ମିଙ୍ଗେ ଜିକେଏ ପିସୁଅସି । ୨୨ ଇମ୍ବାଆଁ ସିନିକିନି କାତା, ମାହାପୁରୁ ଏନିକିହିଁ କାର୍ମା ମେହ୍‌ନାସି ଇଞ୍ଜା କାର୍‌ବି ଆନାସି; ଆମ୍ବାଆରି ପାପୁତା ତରଗା ମାନେରି, ଏଞ୍ଜାରାଇଁ ଏଞ୍ଜାସି କାର୍‌ବି ଆନେସି; ସାମା ଏତରଦିନା ପାତେକା ତାନି କାର୍ମାମେହ୍‌ନି ତାଣା ଡୟିଦେରି, ଏତରଦିନା ମିଙ୍ଗେତାକି କାର୍ମା ମେସ୍ତାନାସି, ତାନି କାର୍ମାମେହ୍‌ନାଣି ଜାକ୍‌ହିସାରେ; ମୀରୁ ଜିକେଏ ରାଡ଼ପି ଆଦେରି । ୨୩ ଜୀହୁଦି ଲକୁ ଏଞ୍ଜାରି ନାମୁତି ପିହ୍‌ଅରି, ଆତିହିଁ ଏଞ୍ଜାରି ତଲିମାତି ଟାୟୁତା ୱେଣ୍ଡେ ତୀରି ଆନେରି । ମାହାପୁରୁ ଇଦାଆଁ କିହାଲି ଆଡ଼ିମାନେସି । ୨୪ ଜୀହୁଦିଆଆତି ଲକୁ ଜାଡ଼ାତି ଜୀତ ମାର୍‌ନୁତି ଗମାୟାଁ ଲେହେଁ । ଏଞ୍ଜି ରାଡ଼ପି ଆହାନା ଏମ୍ବାତାଇ ଆଆତି ଜିକେଏ ବାଡ଼ାତା ପାଡ଼ିକିହାମାନି ଜୀତ ମାର୍‌ନୁ ତଲେ ଦୁସ୍‌ପି ଆହାମାନୁ । ଜୀହୁଦି କୁଡ଼ାତି ଲକୁ ବାଡ଼ାତା ପାଡ଼ିକିହାମାନି ଜୀତ ମାର୍‌ନୁ ଲେହେଁ । ଇ ମାର୍‌ନୁତି ରାଡ଼ପି ଆହାମାନି ଗମାଣି ୱେଣ୍ଡେ ମାର୍‌ନୁ ତଲେ ଦୁରସାଲି ମାହାପୁରୁ ଆଡ଼ିନେସି ।

### ବାରେ ଜାଣାକି ମାହାପୁରୁତି କାର୍ମାମେହ୍‌ନାୟି

୨୫ ଏ ତାୟି ତାଙ୍ଗିସ୍ତାତେରି, ମୀରୁ ଏନିକିଁ ମିଙ୍ଗେତାକି ମୀରୁଏ ବୁଦିଗାଗାତମି ଇଞ୍ଜିଁ ଅଣ୍‌ପଅତେରି, ଇଦାଆଁତାକି ମୀରୁ ଇ ଡ଼ଗୁମାନି କାତାତି ପୁନାଆନା ମାଣ୍‌ମେରି ଇଞ୍ଜିଁ ନା ମନ ହିଲେଏ, ଇତିହିଁ ଜୀହୁଦିଆଆତି ଲକୁ ବାରେ ହଡ଼ୁଆ ପାତେକା ଇସ୍ତାୟେଲତି ଏତେକା ଲକୁ ନାମାଆନା ଡୟିନେରି; ୨୬ ଇଲେଆହିଁ ବାରେ ଇସ୍ତାୟେଲ ଲକୁ ଗେଲ୍‌ପି ଆନେରି, ଏନିକିଁ ରାସ୍‌କି ଆହାମାନେ,

“ଗେଲ୍‌ପି କିନାସି ସିୟନଟି ଖାନେସି,  
 ଜାକୁବ କୁଡ଼ାତା ମାନି ବାରେ ଲାଗେଏତାଣି ହେକ କିନେସି ।  
 ୨୭ ଏଚିବେଲା ନାନୁ ଏଞ୍ଜାରି ପାପୁ ବାରେ ହେକ କିଇଁ,  
 ଏଚିବେଲା ଏଞ୍ଜାରିତଲେ ଈ ରାଜିମାନା କିନମି ।”  
 ୨୮ ନେହୁଁ କାରୁତି ଆହୁଆ ଜୀହୁଦି ଲକୁ ମିଙ୍ଗେତାକି ମାହାପୁରୁକି  
 ସାତୁୟା ଆହାମାନେରି, ସାମା ମାହାପୁରୁ ଆଡ଼ାମାନି ଆକୁ ଆବାୟା  
 ତାକି ଏଞ୍ଜାରି ମାହାପୁରୁକି ଜୀଞ୍ଜୁ ନନାର ଆହାମାନେରି । ୨୯ ଇଚିହୁଁ  
 ମାହାପୁରୁ ଆଡ଼ାମାନାୟି ଅଡ଼େ ତାନି କାର୍ମାତି ଦାନା ଏଚେଲାଖା  
 ଭଜେଏ ଆଏ । ୩୦ ଜୀହୁଦିଆଆତି ଲକୁତେରି ତଲି ମୀରୁ ମାହାପୁରୁଇଁ  
 ମାନି କିହାହିଲାଆତେରି; ସାମା ନୀଏଁ ଜୀହୁଦି ଲକୁ ମାନି କିଆତାକି  
 ମାହାପୁରୁତି କାର୍ମାମେହନାଣି ବେଟାଆଡ଼େରି, ୩୧ ଏଲେଆହୁଁଏ  
 ଏଞ୍ଜାରି ଜିକେଏ ନୀଏଁ ମାନି କିହାହିଲଅରି, ଏନିକିହୁଁ ମିଙ୍ଗେତାକି  
 ତଞ୍ଜାଆହାମାନି କାର୍ମାମେହନାଣି ତଲେ ଏଞ୍ଜାରି ଜିକେଏ ନୀଏଁ  
 କାର୍ମାମେହନାଣି ବେଟାଆନେରି । ୩୨ ଏନିଇଚିହୁଁ ମାହାପୁରୁ ବାରେ  
 ଜାଣାଇଁ କାର୍ମା ମେସାଲି ତାକି ମାହାପୁରୁ ବାରେଜାଣାତି ମାନି  
 କିଆରେଟୁ ହେରପା ମାନେସି ।

### ମାହାପୁରୁକି ଗାଞ୍ଜୁରମି

୩୩ ଅହତା ! ମାହାପୁରୁତି ବୁଦି ଇଞ୍ଜା ପୁନି ବାଡ଼ୟୁ ଏଚେକା କାଜାୟି  
 ! ତାନି ଅଶ୍‌ପୁତି ଆମ୍ବାଆସି ତେଲୁହି କିୟାନେସି ? ଇଞ୍ଜା ତାନି  
 ଜିରୁତି ଆମ୍ବାଆସି ପୁଞ୍ଜାଲି ଆଡ଼ିମାନେସି ? ୩୪ ସାଢ଼େସ୍‌ରିତା ରାସ୍‌କି  
 ଆହାମାନେ;

“ଆମ୍ବାଆସି ମାହାପୁରୁତି ଅଶ୍‌ପୁତା ମାନାଣି ତେଲୁହିନେସି ?

ଆମ୍ବାଆସି ଏଞ୍ଜାଣାଇଁ ଖେସାଲି ଆଡ଼ିନେସି ?

୩୫ ମାହାପୁରୁକି ଆମ୍ବାଆସି ଏଚେଲା ଏନାଆଁ ହୀହାମାନେସି,

ଏଦାଆଁତାକି ଏଞ୍ଜାଣାକି ଏଞ୍ଜାସି ଖେଶ୍‌ଶେ ହୀନାୟି ମାନେ ?”

୩୬ ☆ବାରେ ଗାଡ଼ି ଆଡ଼ାୟି ତାନିତାଣାଟି, ତାନି କେୟୁତଲେ, ଅଡ଼େ  
 ତାଙ୍ଗେତାକି ଆହାମାନେ; କାଲାକାଲା ତାକି ଏଞ୍ଜାଣାକି ଗାଞ୍ଜୁରମି  
 ଆପେ ! ଆମେନ୍ ।

# ୧୨

## କ୍ରୀସ୍ତ ତାଣ୍ଡା ପୁଝନି ଜୀଝୁ

୧ ଇଦାଆଁତାକି ତାୟି ତାଜିସ୍ତାତେରି, ମାଙ୍ଗେତାକି ମାହାପୁରୁତି ହାରେକା କାର୍ମାମେହନାଣି ତାକି ମିଙ୍ଗେ ନାନୁ ବାତିମାଲିମାଞ୍ଜାଇଁ, ମୀରୁ ମୀ ଆଙ୍ଗାତି ଜୀଝୁ, ସୁଦୁ ତଲେ ଇଞ୍ଜା ମାହାପୁରୁ ଅପିନି ଲେହେଁତି ପୁଜା ହୀଦୁ, ଇଦିଏ ମାହାପୁରୁତି ସାତା ସେବା । ୨ ମୀରୁ ଇ ଜୁଗୁତି ମାଣକିତା ମାନାଆଦୁ, ସାମା ଏନିକିହିଁ ମାହାପୁରୁତି ଅଣ୍ପୁ ଏନାୟି, ଇଚିହିଁ ନେହାୟି, ଅପିନାୟି ଇଞ୍ଜା ଟିକ୍‌ଶାତାୟି ଏନାୟି, ଇଦାଆଁ ତାୟିପାରି କିହାନା ପୁଞ୍ଜାଲି ଆଡିଦେରି, ଇଦାଆଁତାକି ମୀ ହିୟାଁତି ପୁଝନି କିହାନା ବାଦ୍‌ଲି କିଦୁ ।

୩ ମାହାପୁରୁ ନାଙ୍ଗେ କାର୍ମାମେହନାଣି ହୀହାମାଞ୍ଜାନାକି ବାରେଜାଣା ତେରି ମିଙ୍ଗେ ନାନୁ ଝେସିମାଞ୍ଜାଇଁ, ଆମ୍ବାଆତେରି ଜିକେଏ ମୀ ତାକି ମୀରୁ ଏନିକିହିଁ ଅଣ୍ପିନାୟି ମାନେ ଏଦାଆଁ କିହାଁ କାଜାତମି ଇଞ୍ଜାଁ ଅଣ୍ପାଆଦୁ; ସାମା ମାହାପୁରୁ ଆମ୍ବାଆରାକି ଏତେକା ନାମୁ ହୀହାମାନେସି, ଏଲେକିହିଁଏ ବାରେଜାଣା ପୁଞ୍ଜାକଡିନି ଲେହେଁ ମୀ ତାକି ମୀରୁ ଅଣ୍ପା କଡାଦୁ । ୪ \*ଇଚିହିଁଏ ଏନିକିହିଁ ମା ଆଙ୍ଗାତା ହାରେକା ଆଙ୍ଗା ଅଡେଲିକା ମାନୁ, ସାମା ବାରେ ଆଙ୍ଗା ଉଡେଲିକାତି କାମା ରଲେଏତାୟି ଆଏ । ୫ ଏଲେଆହିଁଏ, ମାର ହାରେକା ଜାଣାତାୟି, ସାମା ବାରେଜାଣା କ୍ରୀସ୍ତ ତଲେ ଆଣ୍ଡାମାନାକି, ମାର ରଣ୍ଡିଏ ଆଙ୍ଗା ଇଞ୍ଜା ଆଙ୍ଗାତି ଆଙ୍ଗା ଉଡେଲିକା ଲେହେଁ ମାର ରଅସି ରଅଣା ତଲେ ଆଣ୍ଡାମାନାୟି । ୬ \*ଏଦାଆଁତାକି ମାଙ୍ଗେ ମାହାପୁରୁ ହୀହାମାଞ୍ଜାନି କାର୍ମାତଲେ ହାରେକା ଦାନା ବେଟା ଆହାମାନାୟି, ମାର ମାହାପୁରୁତି ବଲୁ ଝେକ୍‌ହାଲି ତାକି ବାଡୁୟୁ ବେଟା ଆହାମାନାୟି, ମାର ଆଟ୍‌ଝା ନାମୁତଲେ ଏ କାମା କିନାୟିମାନେ; ୭ ଏଦାଆଁ ସେବା କାମା କିହାଲି ବାଡୁୟୁ ବେଟାଆହାମାନାୟି, ଆତିହିଁ ମାର ସେବା କାମା କିନାୟିମାନେ; ଜାପ୍‌ହାଲି ବାଡୁୟୁ ବେଟାଆହାମାନାୟି, ଆତିହିଁ ଜାପ୍‌ନାୟି ମାନେ; ୮ ବାର୍ସୁତି କାତା ଝେସାଲି ବାଡୁୟୁ ବେଟାଆହାମାତିହିଁ, ବାର୍ସୁତି କାତା ଝେସପାସି; ଦାନା କିହାଲି

☆ ୧୨:୪ ୧୨:୪ ୧କର ୧୨:୧୨ ☆ ୧୨:୬ ୧୨:୬ ୧କର ୧୨:୪-୧୧

ବାଡ଼ୁୟ ବେଟାଆହାମାନି ମାଣ୍ଠି ରାହାଁତଲେ ଦାନା ହାପେସି ।  
 ଏଟକା ଲକ୍ଷୁତି କାମାତି ସିନିକିହାଲି ଅଦିକାରା ବେଟାଆହାମାତିହି  
 ଖାହୁତଲେ କାମା କିନାୟିମାନେ; ଆମ୍ବାଆସି କାର୍ମା ମେହ୍ନାସି, ରାହାଁ  
 ମନତଲେ ସାୟେମି କିପାସି ।

୯ ଜୀଝୁନନାୟି କୁରୁ ହିଲାଆଗାଟାୟି ଆପେ; ଏନାୟି ଲାଗେଏତାୟି  
 ଏଦାଆଁ ଅପାଆଦୁ; ଏନାୟି ନେହାୟି ଏଦାଆଁ ଆହ୍‌ଦୁ; ୧୦ କ୍ରୀସ୍ତ ନାମୁତି  
 ତାୟି ତାଜି ଲେହେଁ ରଅତେରି ରଅଣାଜ୍ ଜୀଝୁ ନଦୁ; ଇଞ୍ଜାଁ ରଅତେରି  
 ରଅଣାଜ୍ ମାନି କିହାଲି ରାହାଁ ଆଦୁ; ୧୧ ରାହାଁତା ଉଣା ଆଆଦୁ;  
 ସୁଦୁଜୀଝୁତା ପାର୍‌ସାଡ଼ା ଆହାଁ ତୟାଦୁ; ହିୟାଁ ଜୀଝୁ ହାହାନା ପ୍ରବୁଜ୍  
 ସେବା କିଦୁ । ୧୨ ବାର୍ସୁ ଇଟାନା ରାହାଁ କିଦୁ; ଦୁକୁ କସ୍ତ ବେଲାତା ସାସା  
 ଆହ୍‌ଦୁ; ଜମାଆନା ପ୍ରାତାନା କିଦୁ; ୧୩ ମାହାପୁରୁ ଲକ୍ଷୁକି ଲଡ଼ାମାନାଣି  
 ସାୟେମି କିଦୁ; ଇଜ ଖାନି ଗତାୟିଣି ସେବା କିଦୁ ।

୧୪ ✧ଆମ୍ବାଆରି ମିଜେ ସାସ୍ତି ହିୟାନେରି, ଏଞ୍ଜାରି ନେହେଁତାକି  
 ମାହାପୁରୁ ତାଣା ପ୍ରାତାନା କିଦୁ; ଏଞ୍ଜାରାକି ବର ହୀଦୁ; ବାକା ଇଟାଆଦୁ  
 । ୧୫ ଆମିନି ଗାଟାରି ରାହାଁ କିନେରି ଏଞ୍ଜାରିତଲେ ରାହାଁ କିଦୁ;  
 ଆମ୍ବାଆରି ତାନେରି ଏଞ୍ଜାରିତଲେ ତୀଦୁ । ୧୬ ବାରେଜାଣା ରଣ୍ଡିଏ  
 ଅଣ୍‌ପୁ ଅଣ୍‌ପାଦୁ, ଖାରଇ କାଜାରି ତଲେ ତଣେ ଦହ୍‌ଆନା ଇଟାରି  
 ତଲେ ଜିକେଏ ଆଣ୍ଡୁଝି ଆହାନା ମାଞ୍ଜୁ । ମୀରୁ ମୀ ବୁଦିତଲେ  
 ବୁଦିଗାଟାମି ଇଞ୍ଜା କତାଆଦୁ । ୧୭ ଆମ୍ବାଆସି ମିଜେ ଲାଗେଏ  
 କିୟାତିହିଁ, ଏଞ୍ଜାଣାଜ୍ ଲାଗେଏ କିଆଦୁ; ବାରେ ଲକୁ ନକିତା  
 ଏନାୟି ନେହାୟି, ଏଦାଆଁ କିଦୁ । ୧୮ ଆଡ଼ିତିହିଁ ବାରେଜାଣା ତଲେ  
 ହିଡ଼ଡ଼ି ତଲେ ନୀତାବାଡ଼କାଲି ତାକି ଏନି କିନାୟିମାନେ ଏଲେକିଦୁ ।  
 ୧୯ ଏ ଜୀଝୁତି ତଣେସିଜା, ମୀରୁ ଆମ୍ବାଆରି କପାତି ବାଦୁଲି ଆଆଦୁ  
 । ମାହାପୁରୁତି କପାତି ଲକୁ ଆହାଲି ପିସାଡୁହ୍‌ଦୁ । ଏନାଆଁତାକି  
 ଇତିହିଁ ସାସ୍ତେରିତା ରାସ୍‌କି ଆହାମାନେ, ପ୍ରବୁ ଏଲେଇଞ୍ଜି ମାନେସି,  
 “ବାଦୁଲି ଅନାୟି ନା ଅଦିକାରା, ନାନୁ ତାମି କାମାତି ପାଡ଼େୟି ହୀଜ୍  
 ।” ୨୦ ଅଡ଼େ ଜିକେଏ, “ମୀ ସାଡୁ ହାକି ଆହାମାତିସାରେ, ଏଞ୍ଜାଣାକି  
 ତିଞ୍ଜାଲି ହୀଦୁ; ଏଞ୍ଜାସି ଏସ୍‌କି ଆହାମାତିସାରେ ଗସାଲି ହୀଦୁ; ଇଲେ

✧ ୧୨:୧୪ ୧୨:୧୪ ମାତି ୫:୪୪; ଲୁକ ୭:୨୮

କିତିସାରେ ଏଞ୍ଜାଣିଲାକ ଡ଼ାଞ୍ଜିମାନି ହିରୁତି ରାଜ୍ୟାୟାଁ ଏକହି ମାଞ୍ଜେରି  
 ।”<sup>୨୧</sup> ଲାଗେଏତି କାମା ତଲେ ଜୀଣା ଆଆନା, ନେହିଁ କାମା ତଲେ  
 ଲାଗେଏତି କାମାତି ଜୀଣା ଆଦୁ ।

## ୧୩

### ସାଲୁଝି କିନାରାଇଁ ମାନି କିନାୟି

<sup>୧</sup> ବାରେଜାଣା ସାଲୁଝି କିନାରାଇଁ ମାନି କିନାୟିମାନେ, ଏନାଆଁତାକି  
 ଇତିହିଁ ମାହାପୁରୁତି ହେଲ ଆଆତିହିଁ ଆମ୍ବାଆସି ଜିକେଏ  
 ସାଲୁଝି କିନି ପାଣା ବେଟାଆଅସି, ପାଣାତା ମାନି, ସାଲୁଝି କିନାରି  
 ମାନେରି; ଏଞ୍ଜାରି ମାହାପୁରୁ ତାଣାଟି ଆଚୁଝି ଆହାମାନେରି ।  
<sup>୨</sup> ଏନାଆଁତାକି ଆମ୍ବାଆସି ପାଣାତା ମାନି ସାଲୁଝି କିନାରି କପାତଲେ  
 ନିଜିନେସି, ଏଞ୍ଜାସି ମାହାପୁରୁ ମେରାତି କପାତଲେ ନିଜିନେସି;  
 ଆମ୍ବାଆରି ଏଲେକିନେରି ଏଞ୍ଜାରି ତାମ୍ବୁ ତାମ୍ବୁଞ୍ଜେ ଡ଼ଣ୍ଡ ବେଟାଆହାଲି  
 ତାକି କିନେରି ।<sup>୩</sup> ଇତିହିଁ ସାଲୁଝି କିନାରି ନେହିଁ କାମାତାକି  
 ଆଜିଗାଟାରି ଆଏ, ସାମା ଲାଗେଏତି କାମାତାକି ଆଜିଗାଟାରି  
 ଆନେରି । ସାଲୁଝି କିନାରାଇଁ ଆଜାଆନା ଡ଼ୟାଲି ମନ ମାନେକି  
 ? ଆତିହିଁ ନେହିଁ କାମା କିଦୁ, ଆତିହିଁ ଏଞ୍ଜାରି ତାଣାଟି  
 ନେହିଁ ବେଟାଆଦେରି,<sup>୪</sup> ମୀ ନେହିଁ ତାକି ଏଞ୍ଜାସି ମାହାପୁରୁତି  
 ସେବା କାମା କିନାସି ଆହାମାନେସି । ସାମା ମୀରୁ ଲାଗେଏତି କାମା  
 କିଦେରି, ଆତିହିଁ ସାଲୁଝି କିନାଣାଇଁ ଆଜାଦୁ, ଏନାଆଁତାକି ଇତିହିଁ  
 ଏଞ୍ଜାସି ଉଜେଏ କାଣ୍ଡା ଆହୁଅସି, ଏନିଇତିହିଁ ଏଞ୍ଜାସି ମାହାପୁରୁତି  
 ସେବା କିନାସି, ଇତିହିଁ ଏଞ୍ଜାସି ତାନି କପାତଲେ ଲାଗେଏତି  
 କାମା କିନାରାକି ଡ଼ଣ୍ଡ ହୀନାସି ।<sup>୫</sup> ଏନିଇତିହିଁ, ଝାରିଇ କାର୍ବିତି  
 ଆଜିତାକି ଆଏ, ସାମା ମା ହିୟାତା ମାନି ଅଣ୍ଡୁ ପୁଞ୍ଜାହାଁ ସାଲୁଝି  
 କିନାରି କାତା ମାନି କିନାୟିମାନେ ।

<sup>୬</sup> ☆ଇଦାଆଁତାକି ମୀରୁ ସିସ୍ତୁ ଜିକେଏ ହୀହିମାଞ୍ଜେରି, ଏନାଆଁତାକି  
 ଇତିହିଁ ମାହାପୁରୁତି ସେବା କିନେରି ଲେହେଁ ଆହାନା ସାଲୁଝି  
 କିନି କାମା ଜିକେଏ କିନେରି ।<sup>୭</sup> ଏନାଆଁତାକି ଏଞ୍ଜାରି ଏନାଆଁ  
 ବେଟାଆନାୟି ମାନେ, ଏନାଆଁ ହୀଦୁ; ଆମ୍ବାଆରାକି ସିସ୍ତୁ ହୀନାୟି

☆ ୧୩:୭ ୧୩:୭ ମାତି ୨୨:୨୧; ମାର୍କ ୧୨:୧୭; ଲୁକ ୨୦:୨୫

ମାନେ ଏଞ୍ଜାଣାକି ସିସୁ ହୁଏ; ଆମ୍ବାଆରାକି ଆସଲି ହୀନାୟି ମାନେ ଏଞ୍ଜାଣାକି ଆସଲି ହୁଏ; ଆମ୍ବାଆରାକି ଆଜିନାୟି ମାନେ ଏଞ୍ଜାଣାକି ଆଜାଦୁ; ଆମ୍ବାଆରାକି ମାନି କିନାୟିମାନେ ଏଞ୍ଜାଣାକି ମାନି କିଦୁ ।

**ରଅସି ରଅଣାକି ଜୀଞ୍ଜନନାୟି**

୮ ରଅତେରି ରଅଣାକି ଜୀଞ୍ଜ ନଞ୍ଜିଆନି ପିସ୍‌ପେ ଅଡେ ଏନଞ୍ଜା ଆମ୍ବାଆରି ତାଣା ଜିକେଏ ରୀଣା ଆଆଦୁ; ଏନାଆଁତାକି ଇଚିହିଁ ଆମ୍ବାଆସି ଏଟକାତାଣାକି ଜୀଞ୍ଜ ନନେସି, ଏଞ୍ଜାସି ମସାତି ମେରା ମାନଞ୍ଜି ଆହିମାନେସି । ୯ “ଦାରି କିଆଦୁ, ଲକୁଣି ପାୟାଆଦୁ, ସରୁ କିଆଦୁ, ଏଟକା ଲକୁତି ଦିଶସୁତି ଜୁପୁକା ଆଆଦୁ,” ଇ ବାରେ ହୁକୁମି ର ହୁକୁମିତା ମାନେ, “ପାଡ଼ିତି ଲକୁଇଁ ମୀ ଜୀଞ୍ଜୁତି ଜୀଞ୍ଜୁ ନହାଁ କଡ଼ିନି ଲେହେଁ ଜୀଞ୍ଜନଦୁ ।” ୧୦ ଜୀଞ୍ଜନନାୟି ପାଡ଼ିତି ଲକୁତି ଲାଗେଏ କିଏ; ଏନିଇଚିହିଁ ଜୀଞ୍ଜନନାୟି ମସାତି ମେରା ପୁରା କିନେ ।

୧୧ ଇଚିହିଁ ଇଦାଟି ତେଞ୍ଜିଲିନି ବେଲା ଏଦାତେୟିଏ, ଇଦାଆଁ ପୁଞ୍ଜା ନୀର୍ବ ମୀରୁ ଇ ବାରେ କିଦୁ; ଇଚିହିଁ ମାର ନାମିତି ଦିନାଟିଏ ଗେଲ୍‌ପି ଆନାୟି ତଲିତି କିହା ହାରେକା ତାଗେ ଝାଡେୟିଏ । ୧୨ ଆନ୍ଦେରି ହାଜିମାନେ, ଲାଲ୍ ଝେୟିମାନେ । ଏଦାଆଁତାକି ଝାଦୁ ମାର ଆନ୍ଦେରିତି କାମା ବାରେ ପିସାନା ଉଜେଡ଼ିତା ଜୁଜୁ କିହାଲି ଟିକାଣାତି ସାଜୁ ତୁରନ । ୧୩ କାଡ଼ୁ ଗସାହାଁ ମନକିତି ରାହାଁ, କାଡ଼ୁ ଗସାହାଁ ହଡ଼ିନାୟି, ମାନି ହିଲାଆଗାଟାୟି, ଲାଗେଏତି ମାଣକି, ତାହାରା, ଗଡ଼ହା କିନିତାଣା କାମାତା ଆଣ୍ଡାଆନା ଝାଦୁ, ଉଜେଡ଼ିତି କାମାତା ମାନି ଲକୁ ଲେହେଁ ନେହଁ ମାଣକି ତଲେ ମାନ । ୧୪ ପ୍ରୁ ଜୀସୁ କ୍ରୀସୁଇଁ ମୀରୁ ହିମ୍ପରିଲେହେଁ ପରଦୁ, ପାପୁ ଇଞ୍ଜା ଆଜାପତି ଲାଗେଏତି ଅଣ୍ପୁ ତଲେ ରାହାଁ କିହାଲିତାକି ହିୟାତା ଅଣ୍ପାଆଦୁ ।

**୧୪**

**ଏଟକା ଲକୁଣି ଦହ ଦହଆଦୁ**

୧ ☆ନାମୁତା ଆଟ୍‌ଞ୍ଜା ହିଲାଆଗାଟାରାକି ଆବାଦୁ, ସାମା ତାନି କାତାତି ଅଣ୍ପୁ ତାକି ତାନିତଲେ ବାଦ୍‌ହାରା କିଆଦୁ । ୨ ବାରେ

☆ ୧୪:୧ ୧୪:୧ କଲସି ୨:୧୭

ତିଞ୍ଜାଲି ତାକି ରଅଣାକି ନାମୁ ମାନେ, ସାମା ଆମ୍ବାଆସି ନାମୁତା ଉଣା ମାନେସି ଏଞ୍ଜାସି ୱାଋଇ ଜାୟୁ କୁଚା ତିନାପେସି ।<sup>୩</sup> ଆମ୍ବାଆସି ବାରେ ତିନେସି, ଏଞ୍ଜାସି ତିନାଆଗାଟାଣାଲ୍ ହୀଣି କିଆପେସି; ଇଞ୍ଜା ତିନାଆଗାଟାସି ତିନାଣାଲ୍ ନୀହାୟି କିଆପେସି, ଏନିଇତିହ୍ ମାହାପୁରୁ ଏଞ୍ଜାଣାଲ୍ ଆବା ମାନେସି ।<sup>୪</sup> ନୀନୁ ଆମ୍ବାଆତି ଅର ରଅଣି ହଲେଏଣାଲ୍ ନୀହାୟି କିହିମାଞ୍ଜି ? ଏଞ୍ଜାସି ତାନି ସାଞ୍ଜୁକାରି ତାଣା ତୀରି ଆନେସି କି ତୀରି ଆଅସି; ଏଞ୍ଜାଣାଲ୍ ତୀରିକିହାଁ ଇଟାଲି ପ୍ରୁ କେୟୁତା ବାଡ଼ୟୁ ମାନେ ।

<sup>୫</sup> ରଅସି ର ଦିନାତି କିହାଁ ଅର ଦିନାତି ହାରେକା ମାନି କିନେସି, ଅଡ଼େ ରଅସି ବାରେ ଦିନାତି ରଲେଏତାଇ ଇଞ୍ଜା ଅଣ୍ପିନେସି, ବାରେଜାଣା ତାନି ମନତା ତୀରି କିହାନା ମାନୁଞ୍ଜି ଆପେରି ।<sup>୬</sup> ଆମ୍ବାଆସି ର ଦିନାତି ହାରେକା ନେହାୟି ଇଞ୍ଜା ଅଣ୍ପିମାନେସି, ମାହାପୁରୁତି ଗାଞ୍ଜୁରମି ତାକି ଏଲେଇଞ୍ଜି ଅଣ୍ପିପାପେସି । ଆମ୍ବାଆସି ବାରେ ତିନେସି, ମାହାପୁରୁ ଦରୁତଲେ ତିନେସି ଇଞ୍ଜା ମାହାପୁରୁଲ୍ ଜହରା କିନେସି; ଆମ୍ବାଆସି ତିଞ୍ଜାଲି କୁନେସି, ଏଞ୍ଜାସି ମାହାପୁରୁ ଦରୁତଲେ କୁନେସି ଇଞ୍ଜା ମାହାପୁରୁଲ୍ ଜହରା କିନେସି ।<sup>୭</sup> ଆମ୍ବାଆସି ତାଞ୍ଜେତାକି ନୀତଅସି, କି ଆମ୍ବାଆସି ତାଞ୍ଜେତାକି ହାଅସି ।<sup>୮</sup> ମାର ନୀତାମାନାୟି ଇତିସାରେ, ପ୍ରୁ ତାକି ନୀତାମାନାୟି ଇଞ୍ଜା ହାଡ଼ିସାରେ ପ୍ରୁ ତାକି ହାନାୟି । ଏଦାଆଁତାକି ନୀତିନାୟି କି ହାନାୟି ମାର ପ୍ରୁତି ଲକୁ ।<sup>୯</sup> ଏଦାଆଁତାକି ଇତିହ୍ କ୍ରୀସ୍ତ ହାହାନା ୱେଣ୍ଡେ ନିଙ୍ଗାମାନି ତାଣାଟି ନୀତାମାନାରି ଇଞ୍ଜା ହାଡ଼ାରି ବାରେଜାଣାତି ପ୍ରୁ ଆହାମାନେସି ।<sup>୧୦</sup> ନୀନୁ ଏଦାଆଁତାକି ମୀ ତାୟିଲ୍ ବେରଣି କିହିମାଞ୍ଜି ? ଏଦାଆଁତାକି ମୀ ତାୟିଲ୍ ହୀଣି କିହିମାଞ୍ଜି ? ମାର ବାରେଜାଣା ବେରଣି ଆହାଲି ମାହାପୁରୁ ନକିତା ନିନାୟି ।<sup>୧୧</sup> ଏଦାଆଁତାକି ଇତିହ୍ ସାସ୍ତେରିତା ରାସ୍ତକି ଆହାମାନେ;

“ପ୍ରୁ ୱେସିମାନେସି, ଇତିହ୍ ନାନୁ ଜୀଞ୍ଜୁଗାଟି ମାହାପୁରୁ,  
ବାରେଜାଣା ନା ନକିତା ମେଣ୍ଡା କୁତିନେରି,  
ବାରେଜାଣା ନାଞ୍ଜେ ମାହାପୁରୁ ଇଞ୍ଜା ଜଲିନେରି ।”

୧୨ ମାର ବାରେକାଣା ମାହାପୁରୁ ନକିତା ମାର କିତି କାମାତି ଲେକା ହୀନାୟି ।

**ତାୟିଇଁ ପାପୁ କିଝି କିଆଦୁ**

୧୩ ଏଦାଆଁତାକି ରଅତେରି ରଅଣାଇଁ ବିଚାରା କିଆଦୁ; ଇଲେକିହିଁ ଏନାଆଁ ଜିକେଏ କିଆଦୁ, ଏନିକିଁ ମୀ ତାୟି ପୁଟି କିହାନା ପାପୁତି ପାନ୍ଦାତା ରିଅସି । ୧୪ ପ୍ରବୁ ଜୀସୁ ତାଣାଟି ପୁଞ୍ଜାନା ସାତା ତଲେ ଖେସିମାଞ୍ଜାଇଁ, ଏନି କାଦି ତାନୁଏ ଲାଗେଏତାୟି ଆଏ । ସାମା ଆମ୍ବାଆସି ଏନି କାଦିତି ଲାଗେଏତାୟି ଇଞ୍ଜିଁ ଅଣ୍ପିନେସି, ଏଞ୍ଜାଣାକି ଏଦି ଲାଗେଏତାୟି ଆନେ । ୧୫ ମୀରୁ ଏନି କାଦି ତିନି ତାଣାଟି ର ତାୟି ଅଣ୍ପୁତା କସ୍ତ ହୀହିମାଞ୍ଜେରି, ଆତିହିଁ ଏଞ୍ଜାଣାଇଁ ମୀରୁ ଜୀଞ୍ଜୁନଞ୍ଜୁତା ତାକି ହିଲଅତେରି, ଆମିନି ତାୟି ତାକି କ୍ରୀସ୍ତ ହାଡେସି, ଏ କାଦି ତାକି ଏଞ୍ଜାଣାଇଁ ଲାଗେଏ କିଆଦୁ । ୧୬ ମୀରୁ ଏନାଆଁ ନେହାୟି ଇଞ୍ଜିଁ ଅଣ୍ପିମାଞ୍ଜେରି, ଏଦାଆଁତାକି ମୀରୁ ଲାଗେଏତାତେରି ଆଆଦୁ; ୧୭ ମାହାପୁରୁତି ରାକି ତିନାୟି ଉନାୟି ଆଏ । ସାମା ଏଦି ଦାମ୍ବୁ, ହିଡ଼ଡ଼ି ଇଞ୍ଜା ସୁଦୁଜୀଞ୍ଜୁ ହୀତି ରାହାଁଗାଟାୟି । ୧୮ ଆମ୍ବାଆସି ଇଲେକିହିଁ କ୍ରୀସ୍ତତି ସେବା କିନେସି; ଏଞ୍ଜାସି ମାହାପୁରୁ ନକିତା ନେହାସି ଇଞ୍ଜା ମାଣ୍ସିୟାଁ ନକିତି ତାୟିପାରିତା ଜୀଣା ଆଡାସି ତଞ୍ଜାଆନେସି । ୧୯ ଏଦାଆଁତାକି ଖାଦୁ, ଏନା ଏନାୟି ହିଡ଼ଡ଼ି ଗାଟାୟି, ଅଡ଼େ ଏନା ଏନାଆଁତଲେ ରଅସି ରଅଣାକି ବାସୁଁ ହୀନେସି, ଏ ବାରେତି ମାର ଅଣ୍ପିନ ୨୦ ଏ ଉଜେଏତି କାଦି ତାକି ମାହାପୁରୁତି କାମାଇଁ ନାସଝି କିଆଦୁ, ବାରେଏ ସୁଦୁ କିଝିଆହାମାନେ, ସାମା ଏନି କାଦି ତିନି ତାଣାଟି ମୀରୁ ଏଟକା ଲକୁଣି କସ୍ତ ହୀହିମାଞ୍ଜେରି, ଆତିହିଁ ଏ କାଦି ତିନାଆଦୁ । ୨୧ ମୀରୁ ଉଞ୍ଜା ତିନାୟି, ଅଞ୍ଜୁରି ରାସା ଗହ୍ନି ତାଣାଟି ମୀ ତାୟିକି କସ୍ତ ଆହିମାଟିସାରେ ତିନି ଉନି ତାଣାଟି ହେକ ଆନାୟି ନେହେଁ । ୨୨ ମୀ ଏମିନି ନାମୁ ମାନେ, ଏଦାଆଁ ମୀରୁ ମୀ ହିୟାଁତା ମାହାପୁରୁଇଁ ନକିତା ଇଟାଦୁ, ଆମ୍ବାଆସି ଏନାଆଁ ନେହାୟି ଇଞ୍ଜିଁ ଅଣ୍ପିନେସି, ଏଞ୍ଜାସି ଏମ୍ବାଆଁ ତାଞ୍ଜେ ଦହଗାଟାସି କିଅସି, ଆତିହିଁ ଏଞ୍ଜାସି ନେହାସି । ୨୩ ସାମା ଆମ୍ବାଆସି ଆନାମାନା ଆହାନା ରାନ୍ଦା ତିନେସି, ଏଞ୍ଜାସି ମାହାପୁରୁ ନକିତା ଦହଗାଟାସି ଆନେସି, ଇତିହିଁ



ଏଞ୍ଜେଲି ନାମୁତଲେ ତିଞ୍ଜା ହିଲଅସି; ଅଡ଼େ ଏନାୟି ନାମୁତଲେ ଆଏ, ଏଡ଼ି ପାପୁ ।

## ୧୫

ଏଟ୍‌କା ଲକୁଣି ରାହାଁ କିଦୁ

୧ ମାର ନାମୁତା ଆଟ୍‌ଞ୍ଜା ଗାଟାତାୟି, ବାଡ଼ୁୟୁ ହିଲାଆଗାଟି ଲକୁଣି ମାର ସାସା ହାନାୟି ମାନେ, ଆମ୍ବାଆସି ଜିକେଏ ଜାହାରାଲ୍ ରାହାଁ କିହାଲି ଅଣ୍‌ପାଆପେସି । ୨ ସାମା ଏଟ୍‌କା ଲକୁତି ନେହେଁତାକି ଇଞ୍ଜା ଏଞ୍ଜାରି ନାମୁତି ଆଟ୍‌ଞ୍ଜା କିହାଲିତାକି ଏଞ୍ଜାରାଲ୍ ରାହାଁତଲେ ଇଟିନାୟି ମା କାମା । ୩ କ୍ରୀସ୍ତ ଜିକେଏ ତାନି ସୁକୁ ତାକି ଏନାଆଁ କିହି ହିଲାଆତେସି; ସାମା ସାସ୍ତେରିତା ରାସ୍‌କି ଆହାମାନି ଲେହେଁ, “ମିଙ୍ଗେ ନିନ୍ଦା କିନ୍ଦାତାରା ନିନ୍ଦା ନା ମୁହେଁ ଖାଡ଼େ ।” ୪ ସାସ୍ତେରିତି ଜାପ୍‌ନାଇ ବାରେ ମା ନେହେଁତାକି ଲଡ଼ା ଆନୁ । ବାସ୍ତୁ ତଲେ ତାରିଆହାଁ ଡ଼ୟାଲି ତାକି ସାସ୍ତେରି ମାଙ୍ଗେ ସାସା ଇଞ୍ଜା ରାହାଁ ହାହିମାଞ୍ଜାନେ । ୫ ଆଟ୍‌ଞ୍ଜା ଅଡ଼େ ଦୁକୁ ଡୁକହାନି ମାହାପୁରୁ ମିଙ୍ଗେ କ୍ରୀସ୍ତ ଜୀସୁତି ମାଣ୍‌କି ତଲେ ବାରେତେରି ମିଙ୍ଗେ ରଣ୍ଡିଏ ମନ ଆହାଲି ହିନ୍ଦାପେସି, ୬ ବାରେଜାଣା ଆଣ୍ଡିଞ୍ଜି ଆହାନା ରଣ୍ଡିଏ ହିନ୍ଦା ରଣ୍ଡିଏ ଗୁତି ତଲେ ପ୍ରବୁ ଜୀସୁ କ୍ରୀସ୍ତ ଆବା ମାହାପୁରୁତି ଜହରା କିତେରି ।

ଜୀହୁଦି ଇଞ୍ଜା ଜୀହୁଦିଆଆତି ଲକୁତାକି ନେହୁଁ କାରୁ

୭ ମାହାପୁରୁତି ଗାଞ୍ଜୁରମି ତାକି କ୍ରୀସ୍ତ ଏନିକିହୁଁ ମିଙ୍ଗେ ଆବା ମାଞ୍ଜାନେସି, ମୀରୁ ଜିକେଏ ଏଲେକିହୁଁ ରଅତେରି ରଅଣାଇଁ ଆବାଦୁ । ୮ ଇତିହୁଁ ନାନୁ ଏଲେ ଇଞ୍ଜିମାଇଁ, କ୍ରୀସ୍ତ ମାହାପୁରୁତି ସାତା ତାକି ତଲୁ ଦାପି ଆତି ଲକୁତି ସେବା କିନାସି କିଞ୍ଜିଆହା ମାତେସି, ଏନିକିହୁଁ ଏଞ୍ଜାସି ଆକୁ ଆବାୟାକି ଆଞ୍ଜାନା ହାହାମାନାଣି ତାରି କିନେସି, ୯ ଅଡ଼େ ମାହାପୁରୁତି କାର୍ମାମେହୁନାଣି ତାକି ଜୀହୁଦିଆଆତି ଲକୁ ଜିକେଏ ଏଞ୍ଜାଣି ଗାଞ୍ଜୁରମି କିନେରି; ଇ କାତା ସାସ୍ତେରିତା ରାସ୍‌କି ଆହାମାନେ;

“ଇଦାଆଁତାକି ଜୀହୁଦିଆଆତି ଲକୁତାଣା ନୀ ଜହରା କିଇଁ,  
ବାରେଦିନା ନୀ ପାରୁ ପାଡ଼ିଇଁ ।”

୧୦ ଅଡ଼େ ଜିକେଏ ଏଲେଇଞ୍ଜି ମାନେସି,  
 “ଜୀହୁଦିଆଆତି ଲକୁ ମାହାପୁରୁତି ଲକୁତଲେ ରାହାଁ କିଦୁ !”

୧୧ ଅଡ଼େ ଜିକେଏ,  
 “ଜୀହୁଦିଆଆତି ଲକୁ ବାରେ ପ୍ରୁରୁଇଁ ଜହରା କିଦୁ,  
 ଅଡ଼େ ବାରେ ଲକୁ ଏଞ୍ଜାଣି ପାରୁ ପାଡ଼ାପେରି !”

୧୨ ଅଡ଼େ ଝେଣ୍ଡେ ଜିସାୟ ଝେସାମାନେସି,  
 “ଜିସି କୁଡ଼ାଟି ରଅସି ତଞ୍ଜାଆଡ଼େସି,  
 ଏଞ୍ଜାସି ଜୀହୁଦିଆଆତି ଲକୁଣି ସାଲଞ୍ଜି କିନେସି  
 ଇଞ୍ଜା ଜୀହୁଦିଆଆତାରି ଏଞ୍ଜାଣି ତାଣା ବାର୍ସୁ ଇଚିନେରି ।”

୧୩ ବାରେ ବାର୍ସୁଗାଟି, ମାହାପୁରୁ ମୀ ନାମୁ ତାକି ମିଙ୍ଗେ ରାହାଁ ଇଞ୍ଜା  
 ହିଡ଼ତି ହିୟାପେସି । ଏନିକି ସୁଦୁଜୀଞ୍ଜୁତି ବାଡ଼ୁୟୁ ତଲେ ମୀ ବାର୍ସୁ  
 ପାଡ଼ାଆନେ ।

**ଜୀହୁଦିଆଆତି ଲକୁତାଣା ପାଞ୍ଜୁଲତି ସେବା**

୧୪ ତାୟି ତାଙ୍ଗିସ୍ତାତେରି, ମୀରୁ ବାରେ ନେହୁଁ ଗୁଣ୍ଡୁ ଏନିକିହୁଁ  
 ବାରେ ବୁଦିତଲେ ଇଞ୍ଜା ରଅତେରି ରଅଣାଲ୍ ଜାପୁହାଲି ତାକି  
 ଆଡ଼ିଦେରି ନା ନାମୁ ମାନେ । ୧୫ ଆଡ଼ିଜିକେଏ ମାହାପୁରୁ  
 ହୀହାମାଞ୍ଜାନି କାର୍ମାତି ବାଡ଼ୁୟୁତି ନାନୁ ମିଙ୍ଗେ ଅଣ୍ଡପି କିହାଲି ହାଡ଼େକା  
 ସାସାତଲେ ମୀ ତାଣା ଇ ଆକୁ ରାଡ଼ିମାଞ୍ଜାଇଁ । ୧୬ ଏନାଆଁତାକି  
 ଇଚିହୁଁ କ୍ରୀସୁ ଜୀସୁତି ହଲେଏଣା ଲେହେଁ ଜୀହୁଦିଆଆତି  
 ଲକୁତାକି କାମା କିହାଲି ମାହାପୁରୁ ନାଙ୍ଗେ ପାରୁ ହୀହାମାଞ୍ଜାନେସି  
 । ମାହାପୁରୁତି ନେହୁଁ କାରୁ ଝେକ୍‌ହାଲି ତାକି ନାନୁ ର ପୂଜେରାତି  
 କାମା କିହିମାଇଁ । ଜୀହୁଦିଆଆତି ଲକୁ ସୁଦୁଜୀଞ୍ଜୁ ତଲେ ହେରପିଆଡ଼ି  
 ଲେହେଁ ମାହାପୁରୁ ତାଣା ଆବିନାରି ଆପେରି, ଇଦି ନା ଅଣ୍ଡପୁ ।  
 ୧୭ କ୍ରୀସୁ ଜୀସୁତଲେ ଆଣ୍ଡାନା ମାହାପୁରୁ ତାକି ଇ ସେବା କାମା  
 କିହାମାନାକି ନାନୁ ବତପଣ ଆହିମାଇଁ । ୧୮ ଇଚିହୁଁ ଜୀହୁଦିଆଆତି  
 ମାହାପୁରୁ ତାଣା ତାଗାଲି କ୍ରୀସୁ ନା ତାଣାଟି ବଲୁତା ଅଡ଼େ କାମାତା  
 ଇଚିହୁଁ ହାଡ଼େକା ସିନାୟାଁ କାବାଆନି କାମାୟାଁ ତଲେ, ସୁଦୁଜୀଞ୍ଜୁତି  
 ବାଡ଼ୁୟୁତି ଏନା ଏନାଆଁ କିହାହିଲଅସି, ଇଲେତି ଏନି କାମା କିହାଲି  
 ସାସା କିହିହିଲଅଁ । ୧୯ ସିନା ଅଡ଼େ କାବାଆନି କାମାତି ବାଡ଼ୁୟୁତି

ଅଡ଼େ ମାହାପୁରୁ ସୁଦୁଜୀଝୁତି ବାଡ଼ୁୟୁତି ନା ତାଣାଟି କିହାମାନେସି । ଏନିକିଁ ନାନୁ ଜିରୁସାଲମ ଟଟ ସାରିଝାକି ଇଞ୍ଜା ଇଲୁରିକମ ପାତେକା କ୍ରୀସ୍ତତି ନେହୁଁ କାରୁ ଝେକହାମାଇଁ । ୨୦ ଆମ୍ବିୟା ଲକୁ କ୍ରୀସ୍ତତି କାତା ଝେଞ୍ଜାହିଲଅରି, ଏମ୍ବାଆଁ ଏଝାଣି ବଲୁ ଝେକହାଲି ନା ଅଣ୍ପୁ, ଏନାଆଁତାକି ଇଚିହୁଁ ଏଟକାତି ଲକୁ କିହାମାନି ପୁନାଦି ଲାକ ଇଲୁ କିହାଲି ନାନୁ ଅଣ୍ପି ହିଲଅଁ । ୨୧ ସାପ୍ତେରିତା ଏନିକିହୁଁ ରାସକି ଆହାମାନେ;

“ଆମିନି ଗାଟାରି ଏଝାଣି ବଲୁ ବେଟାଆହା ହିଲଅରି,  
ଏଝାରି ମେହନେରି; ଆମ୍ବାଆରି ଝେଞ୍ଜାହିଲଅରି, ଏଝାରି  
ଡେଲୁହିନେରି ।”

### ରମ୍ପତା ହାଜାଲି ପାଝୁଲତି ଅଣ୍ପୁ

୨୨ ☆ହାରେକା ଦେବା ମୀ ତାଣା ଝାହାଲି ତାକି ନା ଅଣ୍ପୁ ଉଜେଏତାୟି ଆଡେ । ୨୩ ସାମା ଇ ରାଜିତା ନା ସେବା କାମା ରାହାମାନେ ଅଡ଼େ ନା ଆସା, ମିଙ୍ଗେ ମେସାଲି ତାକି ନା ହାରେକା ବାର୍ସାତି ଅଣ୍ପୁ ନୀଏଁ ପୂରା ଆନେ । ୨୪ ନାନୁ ସ୍ତେନ୍ ଦେସା ହାନିବେଲାତା ମୀ ତାଣା ଝାଲୁଁ; ଇଚିହୁଁ ଜିରୁତା ମୀ ତଲେ ତଲିଏ ଆଣ୍ଡାନା କାତା ଆହାଁ ଏଚରଦିନା ଡୟିତି ତାୟୁ ଏ ଟାୟୁତା ହାଜାଲି ଜିରୁତା ଇଟିଝାୟାଦେରି ଇଞ୍ଜୁଁ ଆସା କିହିମାଇଁ । ୨୫ ☆ନୀଏଁ ମାହାପୁରୁ ଲକୁତି ସେବା କିହାଲି ନାନୁ ଜିରୁସାଲମତା ହାଜିମାଇଁ । ୨୬ ଜିରୁସାଲମତା ମାହାପୁରୁ ଲକୁ, ଆମ୍ବାଆରି ହିଲାଆ ଗାଟାରି ମାନେରି, ଏଝାରି ତାକି ମାକିଦନିୟା ଅଡ଼େ ଆକାୟାତି କୁଲମିକା ଆଣ୍ଡାଲି ତାରୁୟାଁ କୃତିକିହାଲି ତାରି କିହାମାନେରି । ୨୭ ☆ହାଅ ଏଝାରି ଏଦାଆଁ ନେହେଁ ଅଣ୍ପା ମାନେରି ସାତା, ଆତିହୁଁ ଏଝାରି ଏଝାରିତାଣା ରୀଣା ଜିକେଏ ଆହାମାନେରି; ଜୀହୁଦିଆଆତାରି ଏଝାରି ଦାମ୍ବୁତି ଜୀଝୁତା ଆଣ୍ଡାମାନେରି ଇଚିହୁଁ, ଏଝାରି ଦାରୁତି କାମାତା ଜିକେଏ ସେବା କିହାଲି ରୀଣା ଆହାମାନେରି । ୨୮ ଜିରୁସାଲମତା ଏ ତାରୁୟାଁ ଲକୁକି ହୀହାନା ନା କାମା ରାପୁହି ତାୟୁ, ନାନୁ ସ୍ତେନ୍

☆ ୧୫:୨୨ ୧୫:୨୨ ରମି ୧:୧୩ ☆ ୧୫:୨୫ ୧୫:୨୫ ୧କର ୧୭:୧-୪ ☆ ୧୫:୨୭ ୧୫:୨୭ ୧କର ୯:୧୧

ଦେସାତା ହାନାଟି ଏ ଜିରୁଟିଏ ମିଙ୍ଗେ ବେଟି ଖାଇଁ । ୨୯ ନାନୁ ପୁଞ୍ଜାମାଇଁ, କ୍ରୀସ୍ତ ତାଣାଟି ହାରେପୁରେ ବର ବେଟାଆହାନା ନାନୁ ମୀ ତାଣା ଖାଇଁ ।

୩୦ ଜୀବୁତି ତାୟି ତାଙ୍ଗି, ନାନୁ ମା ପ୍ରବୁ ଜୀସୁ କ୍ରୀସ୍ତ ଦରୁତଲେ ଇଞ୍ଜା ସୁଦୁଜୀବୁ ହୀହାମାଞ୍ଜାନି ଜୀବୁ ନନାଣି ତାକି ମିଙ୍ଗେ ବାତିମାଲିମାଞ୍ଜାଇଁ, ନାଙ୍ଗେ ତାକି ମାହାପୁରୁ ତାଣା ରଣ୍ଡିଏ ଅଣ୍ପୁ ତଲେ ପ୍ରାତାନା କିଦୁ । ୩୧ ନାନୁ ଜୀହୁଦା ଦେସାତି ନାମାଆତି ଲକୁ ତାଣାଟି ଏନିକିହ ଗେଲପି ଆଇଁ ଇଞ୍ଜା ଜିରୁସାଲମତା ନା ଏମିନି ସେବା କାମା, ଏଦିଏମ୍ପାଆଁ ମାହାପୁରୁ ଲକୁ ଅପିନେରି, ଏଦାଆଁତାକି ପ୍ରାତାନା କିହେମାଞ୍ଜୁ । ୩୨ ମାହାପୁରୁ ଅଣ୍ପୁ ତଲେ, ନାନୁ ମୀ ତାଣା ହାରେକା ରାହାଁତଲେ ଖାଇଁ ଇଞ୍ଜା ମୀ ତଲେ ଏତରଦିନା ପାତେକା ଡୟାନା ନା ହିୟାଁତା ରାହାଁ ବେଟାଆଇଁ । ୩୩ ବାରେ ହିଡ଼ଡ଼ି ହିୟାନି ମାହାପୁରୁ ମୀ ତଲେ ମାଣ୍ଡେସି । ଆମେନ ।

### ୧୭

#### ପାଞ୍ଜୁଲତି ଜହରା

୧ କେଙ୍ଗେୟା କୁଲମିତା ସେବା କାମା କିହିମାନି ମା ତାଙ୍ଗି ପୟିବିଇଁ ମୀ ତାଣା ପାଣ୍ଡିମାଞ୍ଜାଇଁ, ୨ ପ୍ରବୁତି ଦରୁତଲେ ଏଦାନି ଆବାଦୁ, ମାହାପୁରୁ ଲକୁ ଲେହେଁ ଲେମ୍ପାଦୁ । ତାନି ଲଡ଼ାମାନି ଲେହେଁ ସାୟେମି କିଦୁ । ଏଦି ନାଙ୍ଗେତାକି ଅଡ଼େ ହାରେକା ଲକୁତି ସାୟେମି ତଡ଼ୁ ।

୩\*କ୍ରୀସ୍ତ ଜୀସୁତି ସେବା କାମାତା ନା ତଲେ କାମା କିହିମାନି ପ୍ରିସ୍ତିଲା ଇଞ୍ଜା ଆକ୍ଫିଲାଇଁ ନା ଜହରା ଖେହ୍ଦୁ । ୪ ଏ ଲକୁ ନା ତାକି ତାମି ଜୀବୁତା କସ୍ତୁ ଆହାମାନେ । ଖାରଇ ନାନୁ ଆଏ, ବାରେ ଜୀହୁଦିଆଆତି କୁଲମି ତାମି ତାଣା ଜହରା । ୫ ଏ ଲକୁତି ଇଜ ରୁଣ୍ଡା ଅହିମାନି କୁଲମିତି ଲକୁଣି ଜିକେଏ ନା ଜହରା ଖେସିମାଇଁ । ନା ଜୀବୁତି ତଡ଼ୁ ଏପାୟିନେତଇଁ ନା ଜହରା ଖେହ୍ଦୁ । ଆସିୟା ଦେସାତି ଏଞ୍ଜାସି ରଅସି ମୂଲୁଏ କ୍ରୀସ୍ତଇଁ ନାମିତାସି । ୬ ମୀ ନେହେଁତାକି ଜମାଆନା କାମା କିହିମାନି ମରିୟମଇଁ ନା ଜହରା । ୭ ଆନ୍ଦନିକ ଇଞ୍ଜା ଜୁନିୟଇଁ ନା ଜହରା । ଇ ରିଆରି ଜୀହୁଦିୟାଁ ନା ତଲେ କାୟିଦି ଇଲୁତା ମାଚେରି ।

☆ ୧୭:୩ ୧୭:୩ କାମା ୧୮:୨

ନା ନବେଏ କ୍ରୀସ୍ତୁଇଁ ନାମା ମାଚେରି ଇଞ୍ଜା ପାଣ୍ଡୁଝିଆଡ଼ି ସୀସୁ ତାଣାଟି ଏଞ୍ଜାରି ପୁଣ୍ଡି ଆଡାରି ।

୮ ପ୍ରବୁ ତାଣା ନା ଜୀଝୁତି ତଡ଼ ଥୁାମ୍ବିୟାତଇଁ ଜହରା । ୯ କ୍ରୀସ୍ତୁତି ସେବା କାମାତା ନାଜେ ସାଢ଼େମି କିହିମାଞ୍ଜାନି ଉର୍ବାନ ଇଞ୍ଜା ଜୀଝୁତି ତଡ଼ ସ୍ତ୍ରୀକିୟଇଁ ଜିକେଏ ନା ଜହରା । ୧୦ କ୍ରୀସ୍ତୁତି ମାନି ତଲେ କାମା କିନି ଆପେଲା ଇଞ୍ଜା ଆରିସ୍ତୁରୁଲ କୁଟମିତି ବାରେ ଜାଣାଇଁ ନା ଜହରା ଝେହ୍ଦୁ । ୧୧ ନା କୁଡ଼ାତି ହେରଦିୟନ ଇଞ୍ଜା ନାକିଏ କୁଟମିତି କ୍ରୀସ୍ତୁତି ତାୟିୟାଣି ଜିକେଏ ନା ଜହରା ।

୧୨ ପ୍ରବୁତି ସେବା କାମାତା ମାନି ତ୍ରିପେନା ଇଞ୍ଜା ତ୍ରିପଯାଇଁ ଇଞ୍ଜା ପ୍ରବୁ ତାକି ହାରେକା କାମା କିହାମାନି ଜୀଝୁତି ପସିଏଇଁ ନା ଜହରା । ୧୩ ପ୍ରବୁ ଆଚାମାନି ରୁପସ ଇଞ୍ଜା ନା ତାଲି ଲେହେଡ଼ି ତାନି ଇୟାନି ଜିକେଏ ନା ଜହରା । ୧୪ ଅସୁକ୍ରିତ, ପ୍ଲେଗନ, ହର୍ମିସ, ପାତ୍ରବା, ହର୍ମିସ ଇଞ୍ଜା ଏଞ୍ଜାରିତଲେ ମାନି ବାରେ କ୍ରୀସ୍ତୁଇଁ ନାମିମାନି ତାୟି ତାଙ୍ଗିଇଁ ଜହରା ଝେହ୍ଦୁ । ୧୫ ପିଲଲଗ ଇଞ୍ଜା ଜୁଲିୟା, ନିରୁସ ଇଞ୍ଜା ତାନି ତାଙ୍ଗି ଅଡ଼େ ଅଲୁମ୍ପା ଅଡ଼େ ଏଞ୍ଜାରିତଲେ ମାନି ବାରେ ମାହାପୁରୁ ଲକୁଣି ନା ଜହରା ଝେହ୍ଦୁ ।

୧୬ ସୁଦୁ ହିୟାଁ ତଲେ ନଶ୍ଚି ଆହାନା ଜହରା ଝେହ୍ଦୁ । କ୍ରୀସ୍ତୁତି ବାରେ କୁଲମିକା ମିଜେ ଜହରା କିହିମାଞ୍ଜାନୁ ।

**ପାଝୁଲତି ରାନି ବେଲାତି ବଲୁ**

୧୭ ତାୟି ତାଙ୍ଗିସ୍ତାତେରି, ମୀରୁ ଆମିନି କାତା ଜାପାମାଞ୍ଜେରି, ଏ କାତାତି ପିସାନା ଗତି ଗତି କିନାସି ଅଡ଼େ ଲାଗେଏ କିୟାନେସି ଏଞ୍ଜାରାଇଁ ପୁଞ୍ଜା ତୟାଦୁ, ଏଞ୍ଜାରି ତାଣାଟି ଏଟକା ଆୟାଲି ନାନୁ ବାଡ଼ିମାଲିମାଞ୍ଜାଇଁ । ୧୮ ଇତିହୁଁ ଇଲେତି ଲକୁ ମା ପ୍ରବୁ କ୍ରୀସ୍ତୁତି ହଲିୟାଙ୍ଗା ଆଏ, ସାମା ତାନି ବାଣ୍ଡିତି ହଲିୟାଙ୍ଗା ଆହାମାନେରି, ଅଡ଼େ ସୁଞ୍ଜାଲା ହାଡ଼ାତଲେ ଲକୁ ମନତି ନାଡ଼ି କିନେରି । ୧୯ ନେହୁଁ ବଲୁ ତାକି ମୀ ତୀରପୁ କାମା ବାରେ ଲକୁ ଝେଞ୍ଜାମାନେରି, ଇଦାଆଁତାକି ନାନୁ ହାରେକା ରାହାଁ । ନାନୁ ଅଶ୍ପିମାଇଁ, ମୀରୁ ସାତା କାତାତା ବୁଦି ଗାଟାତେରି ଆଦୁ ଇଞ୍ଜା ଉଜେଏତି କାତାତା ଆଣ୍ଡାଆଦୁ

☆ ୧୭:୧୩ ୧୭:୧୩ ମାର୍କ ୧୫:୨୧

। ୨୦ ଆତିହ୍ନି ହିତ୍ତି ହିୟାନି ମାହାପୁରୁ ତବେ ସୟତାନଇଁ ମୀ କଡ଼ାଁ  
ଡ଼ଇ କିନେସି । ମା ପ୍ରବୁ ଜୀସୁତି କାର୍ମାମେହ୍ନାୟି ମୀ ତଲେ ମାଣ୍ଡମ୍ବେ

୨୧ ✱ନା ତଲେ କାମା କିହିମାନି ତିମତି ଇଞ୍ଜା ମା ଜୀହୁଦି ତାୟିୟାଁ  
ଲୁକିୟ, ଜାସନ ଇଞ୍ଜା ସସିପାତ୍ରୁ ମିଙ୍ଗେ ଜହରା କିହିମାଞ୍ଜାନେରି ।

୨୨ ଈ ଆକୁ ରାଚାମାନି ତତ୍ତୟ, ପ୍ରବୁତି ଦରୁତଲେ ମିଙ୍ଗେ ଜହରା  
କିହିମାଞ୍ଜାଇ ।

୨୩ ✱ନାଙ୍ଗେ ଅଡ଼େ କୁଲମିତି ସେବା କିନି ଗାୟସ ମିଙ୍ଗେ ଜହରା  
କିହିମାଞ୍ଜାନେସି, ଅଡ଼େ ଈ ଗାଡ଼ାତି ଗୁମୁସ୍ତା ଏରାସ୍ତ ଇଞ୍ଜା ତାୟି କ୍ୱାଡ଼ି  
ଜିକେଏ ମିଙ୍ଗେ ଜହରା କିହିମାଞ୍ଜାନେରି ।

୨୪ ପ୍ରବୁ ଜୀସୁତି କାର୍ମାମେହ୍ନାୟି ମୀ ବାରେ ଜାଣାକି ଆପେ ।

**ପ୍ରାଚୀନା ଇଞ୍ଜା ଜହରା ତଲେ ଆକୁ ରାପ୍ନାୟି**

୨୫ ୱାଦୁ, ମାର ମାହାପୁରୁତି ଗାଞ୍ଜୁରମି କିନ । ନାନୁ ୱେକ୍‌ହାମାନି  
ଜୀସୁ ଜୀସୁତି ନେହ୍ନି ବଲୁ ଇଞ୍ଜା ତଲି କାଲାଟିଏ ଡ଼ଗୁମାନି ସାତା  
ଲେହେଁ ମୀ ନାମୁ ତାରିକିହାଁ ଇଟାଲି ମାହାପୁରୁ ଆଡ଼ିନେସି । ୨୬ ଏ  
ଡ଼ଗୁମାନି ସାତା ମାହାପୁରୁ ଅଣ୍ଡପୁତି ବଲୁ ୱେହ୍ନାରି ସାସ୍ତେରିତା  
ରାସ୍‌କି ଆହାମାନେ ଅଡ଼େ ଏଡ଼ି ନୀଏଁ କାଲାକାଲାତି ପ୍ରବୁ ମାହାପୁରୁ  
ତାଣାଟି ବାରେ କୁଡ଼ା ବିତ୍ରା ୱେପ୍‌କି ଆହିମାନେ । ଈଦାଆଁ ତଲେ  
ବାରେଜାଣା ନାମାନା ମାହାପୁରୁଇଁ ମାନି କିହାଲି ଆଡ଼ିନେରି ।

୨୭ ବାରେ କାତା ପୁନି ମାହାପୁରୁ ପ୍ରବୁ ଜୀସୁ ତାଣା କାଲାକାଲା ତାକି  
ଗାଞ୍ଜୁରମି ବେଟାଆପେସି । ଆମେନ୍ ।

✱ ୧୭:୨୧ ୧୭:୨୧ କାମା ୧୭:୧ ✱ ୧୭:୨୩ ୧୭:୨୩ କାମା ୧୯:୨୯; ୧କର ୧:୧୪; ୨ତିମ ୪:୨୦

## ପୁସ୍ତକ ଫେରା

# The New Testament in the Kuvi language of India: ପୁସ୍ତକ ଫେରା (Bible)

copyright © 2020 The Word for the World International

Language: କୁଭି (Kuvi)

Contributor: The Word for the World International

## ପୁସ୍ତକ ଫେରା, କୁଭି ପୁସ୍ତକ ଫେରା, 2020

The New Testament in Kuvi Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-12

---

PDF generated using Haiola and XeLaTeX on 21 Feb 2024 from source files dated 13 Apr 2023

081337bf-dba3-542b-bc85-280acfb14d33